

# سوڀن ته سوڀ

ترلوڪي ناتھ درڪندن

सोपुन तु सोंच  
sópún tû sònych

त्रिलोकी नाथ दर 'कुन्दन'

इंटरनेट देवनागरी एडिशन  
म.क.रैना

अगस्त २००८



# मोती लाल साक्री साँबुनि नावु



## सोपुन तु सोंच

कॅम्य ताम गाटुल्य छु वोनमुत “तोह्य छिवु वुछान तु दपान क्याज़ि ? बु छुस सोंचान तु दपान क्याज़ि नु ?” शॉयिर छु वुछान ति तु सोंचान ति । वुछान छु अँद्य पॅख्य अँछव तु बोज़ान छु कनव । च़ेनान ति छु तु प्रथ कुनि छु साम ह्यवान । अथ मंज़ यि कॅह अँमिस छु स्वंदर बोज़नु यिवान, तथ छु यि पूज करान । यि कॅह बद तु बदसूरत छुस बासान, तथ कुन वुछिथ छुस दिलस लगान दकु । तमि पतु छु सोंचुन ह्यवान, सोपुनन हुंद अख नोव सम्सार बनावान । स्वंदर तु रुपठ । सु छु पनुनिस सोपुनस तु सोंचस शकल दिवान । प्रानिच पूर तु नविच तखलीक । यिहोय छु शॉयिरी हुंद फन । यिहोय छु शॉयिर सुंद कारुबार ।

सम्सारस मंज़ यि कॅह छु तु यि कॅह अँस्य छि यछान जि आसुन गोछ, अथ मंज़ छे स्यठाह फर्क । यिहँय फर्क छि सानि तकलीफुक तु कश्टुक वजह । शॉयिरस छुनु सोन यि तकलीफ बरदाश गछान । तस ह्य पिलिहे, सु ज़ुरविहे नु ओश टार्यन प्यठ बहारस न काँसि मोसिमस अँछन मंज़ । अमी छु सोपनु सजावान, अकि तिथि समसारुक तसवुर करान यथ मंज़ न गम आसन तु न दूख । यथ मंज़ वरताव आसि लोलुक तु मायि हुंद तु व्यवहार आसि इनसाफुक तु बाँय बंदत्युक ।

प्रथ कांह शॉयिर छु आसान अकि परम्परा, अकि सिलसिलुक अंग । ति कॅरिथ छु सु आसान ब्योन तु बेजोड । तस छे आसान पनुन्य अख अलग पहचान, अख ब्योन रंग त, हयत । सु छु ती वनान यि तस बोज़नु छु

यिवान। युथ तसुंद सोंच, तिथुय तसुंद ग्यवुन। तसुंदि वुछनुक अंदाज़ छु आसान ब्योन तु सोंचनुक तैरीक अलग, तमी छु तसुंद कलाम आसान जुदा तु तसुंद मकाम अलग। सु छु पनुनि वक्तुक राग ग्यवान, पनुनि वक्तुक तकाज़ पूर करान तु यिनु वालि वक्तुच शक्ल गरान तु तम्युक वचुन वनुवान।

मे ति वोत बालु पानु प्यठय वुछान, बोज़ान तु सोंचान। यि छु, ति वुछुम। यि सूंचुम, ति सोरुम। अथ सॉरिसुय दिचुम विज़ि विज़ि ज्यव। गरा नज़ुमन मंज़ तु गज़ुलन मंज़, गरा बॉतन मंज़ तु गरा वचुनन मंज़। यि कैह येमि अनवानु शूबिहे, ति थोवुम तमी अनवानु रँछरिथ तु सोंबुरिथ। यि शॉयिरी हुंद म्योन सफर छु स्यठाह ज्यूठ। अथ मंज़ गॅयि मे वारियाहन शॉयिरन, अदीबन, फनकारन तु ग्वनुमातन हुंज़ ज्ञान। केंचन ज़िठचन, केंचन हम-उमर तु केंचन कुंस्यन हुंज़। दीना नाथ नॉदिम, रहमान राही, अमीन कामिल, गुलाम रसूल संतोश, अर्जुन देव मजबूर, मोती लाल साक्री, मोहन निराश, उमेश कौल, अली मुहम्मद लोन, मोती लाल क्यमू, सोम नाथ जुत्शी, शंभूनाथ भट हलीम, मखन लाल बेकस, चमन लाल चमन, वासदेव रेह ... .. नाव छि बेशुमार। काँत्याह गँज़रख ?

युहुंद फन तु युहुंद खयाल ति वुछ मे स्यठाह नज़दीखु प्यठ। अमा पोज़, बु पोकुस नु काँसि हुंज़ि वति। मे कॅड पनुन्य वथ तु तँथ्य प्यठ रूदुस पकान। बु रूदुस कॅशीरि न्यबर ति तु दीशु न्यबर ति। यथ यथ जायि गोस, ततिचि जिंदुगी हुंद असर प्यव म्यान्यन नज़ुमन प्यठ। अँर्यनिमालि हुंद्य वचन, परमानंद तु कृष्ण राजुदानुनि लीलायि तु महजूरन्य गज़ुल ऑस्य ल्वकुचारु

प्यठय मे कनन गौमुत्य । बँडिथ पोर मे बेयन ग्वनमातन हुंद कलामु, ताहम चौर्य मे पनुन्य मोजूह ति पानु तु पनुनि अंदामय कॅरुम तिमन हुंज वखनय ।

यि सोरुय सरमायि पनुन छुस बु लोलु तु मायि सान, शोकु तु चावु सान परन वाल्यन ब्रोंह कनि थवान । आश छम तिम ति परन यि कलामु लोलु तु मायि सान, शोकु तु चावु सान तु तव पतु आसन फुरसथ तु फरागतु विजि म्यौन्य शार गुंगुरावान ।

तिमन दोस्तन, यिमव म्यौनिस यथ शौरी सफरस मंज मे साथ द्युत, म्यान्यन वचुनन दाद द्युत तु म्यौनिस कलामस कद्र कोर, म्योन शुक्रियाह । म्यौनिस टॉटिस मोती लाल साकी साँबस ऑसिन स्वर्ग । सु ओस दिली यछान जि म्योन कलामु गोछ किताबि हुंदिस सूरतस मंज पेश सपदुन । तसुंद यि कांछुन कोर पूर तसुंद संतान विजय जियन । तस म्योन दन्यवाद तु ऑही । दय दियिन तस स्वख तु शाँती तु तरक्की । तँम्य तुल यथ कामि दस तु वातुनावन अंद । बु छुस स्वरगिया साकी साँबुनिस शागिर्द वली मुहम्मद ख्वशबाश साँबुन ति शुक्र गुजार तिव्याजि यि कॉम अंद वातुनावनस मंज शेहलोव तिमव विजय जियुन अथु ।

बेयि अँक्य गाटुल्य छु वोनमुत “छारुन गव फीरिथ थूरिथ तोतथुय वातुन येति प्यठु सफर शुरू कर्योव तु स्व जाय ज़ानुन ग्वडनिचि लटि ।” खबर मे ति मा कोर ती ।

त्रिलोकी नाथ दर 'कुन्दन'

## सूची

१. त्रे द्युतथम दिलासा	०७	२४. अख खयाल	४५
२. साकीयस कुन	०८	२५. पोशि फोट	४७
३. अज्यकि वक्तु	०९	२६. गुल बहारुक गाशि	५०
४. नबुक तारुक	१०	२७. ज़िन्दुगी हुंद सौथ	५२
५. ग्वनमाथ	११	२८. फलसफन हुंज़ छम	५४
६. यि द्रींठ्य आव	१२	२९. टाठचो वंदुयो जुव	५६
७. यारन कुन	१४	३०. मति रटुथा नालुमते	५८
८. माजि हँज़ शैछ	१५	३१. येलि हर्दनि छटु छय	६०
९. मुबारक	१७	३२. फवलुन येछिनय	६२
१०. गज़ल	१८	३३. मदुनन कॅर्यनम	६४
११. नज़रानु	१९	३४. अख अख कॅर्यन	६६
१२. नूरस मय गॅछ छाय	२१	३५. दूह तु दूह	६९
१३. दिख ना मेति त्युथ	२२	३६. चाव येलि चावय	७१
१४. लवि क्याह सु सौत	२४	३७. प्रोन पथ त्रॉविव	७३
१५. शोक्लम कॅरिथुय	२६	३८. बु फेरान बाज़ुरस छुस	७५
१६. येलि अॅस्य समखव	२८	३९. सॉन्य मयकश आयि	८२
१७. यिहय वथ यिहय कथ	२९	४०. नाद लोय आबुशारव	८५
१८. बॉथ तु टुख	३१	४१. पोशि माल	८७
१९. रौव हय करुवय	३३	४२. लालु फोल	९१
२०. मे मा वोन अपुज़ अज़	३४	४३. कनि मोजुरेन्य	९४
२१. तलु सॉ वॅन्यतव	३७	४४. अथुवास	९८
२२. अकत्रुहिम अक्तूबर	४०	४५. शोक तु प्वनुसुन	१०१
२३. खबर कवु	४३	४६. गोश थव म्यान्यन कथन	१०४

४७. म्वख्तु	१०६	७२. चोन तसवीर	१७३
४८. शेछ नितम	११०	७३. सिरु कथ	१७६
४९. दिवान कथ छुख	११२	७४. अख मंज़र अख खयाल	१७८
५०. जवॉनी हिश रवॉनी	११४	७५. थनु प्यव तमि विज़ि	१८०
५१. समुयस ज़िठचव छु	११५	७६. कथ हसॉ कथ	१८३
५२. वुछिथ गुलि लालु अंदकुन	११७	७७. वॅन्य तु थॅन्य	१८६
५३. कनन कनु वॉल्य स्वंदर	११८	७८. कुल तु थॅर	१८९
५४. मस चनु रोस्तुय मस्ती	१२०	७९. दिल	१९२
५५. जेनि ऑखुर म्यॉन्य	१२२	८०. इन्कलाब	१९५
५६. आव अज़ सोन	१२४	८१. लोसुवुन अखताबु	१९७
५७. बागन मंज़ मुचरि अँछ	१२६	८२. मे छि यार वनान	२००
५८. रिक्शा वोल	१३०	८३. सिरु कथ	२०३
५९. मुलाकात	१३२	८४. ज्यव कॅज छम	२०६
६०. नोव वॅरी	१३५	८५. गज़ल - वनय लोलुक	२०९
६१. मुसॉफिर	१३७	८६. गज़ल - अज़ छि म्यॉनी	२११
६२. खबर छय मा ?	१३९		
६३. स्यज़र कोताह च़े छुय ?	१४२		
६४. बु शॉयिर	१४४		
६५. बजर इनसानु सुंद	१४८		
६६. जवॉहिर लाल	१५२		
६७. ल्वकुचार	१५४		
६८. पोज़, रुत तु स्वंदर	१५७		
६९. सोदरुक लाल	१६१		
७०. सोपुन तु सॉच	१६५		
७१. वक्तुक जंग	१७१		



१

### त्रे द्युतथम दिलासा

त्रे द्युतथम दिलासा, युहय लसि गिलासा ।  
छु बचपन बे-फिकरी, जवॉनी पेप्यासा ॥

अँछव वोन अँछन कुन, करव अथुवासा ।  
मे आँस्य यारि जाँनी, कोडुख लचि टासा ॥

ग्वडन्य मामु यारज़, पँतिस करतु च़ासा ।  
पनुन वादु मँशरिथ, लोबुथ कुस त्रे लासा ॥

पनुन गव पनुन पान, न मामन्य न मासा ।  
अपुज़ छुय पज़ान योद, चंदस आसि सासा ॥

वनेमस मे पँज़ कथ, मे त्रुवुन टपासा ।  
छु कुन्दन येमिस मोत, सु कांह आसि खासा ॥



२

## साकीयस कुन

दूहय ज़ॉनिथ च़े ज़न अँस्य चॉर्य साकी ।  
 मगर अँस्य तोति रूदी लॉर्य साकी ।।  
 च़े होवुथ प्यालु असि कुन चोथ पानस ।  
 दिच़ुथ मा ज़ांह चनस अनुवॉर्य साकी ।।  
 च़े ब्रॉह युस ओस साकी ओस बेहतर ।  
 मगर तँम्य पोतससुय अँस्य मॉर्य साकी ।।  
 तँमिस अँस्य मोकु दिमुहव साँचनुक नोव ।  
 मगर गाशस च़े थँव्यथस तॉर्य साकी ।।  
 नशस मंज़ अँस्य अँस्य, फश हा औनुथ च़े ।  
 कोरुथ लूठा हरुद्य तय हॉर्य साकी ।।  
 मोहबत गव छोरुय रूद कारुबारा ।  
 च़ु चाव प्याला, बु कडु चंदु द्यॉर्य साकी ।।  
 दप्योव असि प्यालु चावख मोहबतुक मय ।  
 मगर द्राख च़ूर साकी ज़ॉर्य साकी ।।  
 तिमय रिद त्रेशि हँत्य छी चानि बर तल ।  
 यिमव गोत्यन यवय वछ दॉर्य साकी ।।  
 गज़ल अलमस्तुनय ल्यूख दर्दु बोरतुय ।  
 मे कुन्दन आयि यँच अँश्य टॉर्य साकी ।।

\* \* \*

३

## अँज्यकि वक्तु

बु छुस कौशुर, मे कौशुर आसनच तेह ।  
बु छुस शौयिर, मे छुम प्रथ कौंसि हुंद स्नेह ।।

छु कर्मुन फल, ववौ यूत त्यूत लोनव ।  
मत्यो दुनियाह न छुय ट्यठव्यन न छुय वेह ।।

न खर रौंजी, न खर वोलुय यिमन ख्वश ।  
वन्यूबा गव अड्यन बाक्य तिमन हेह ।।

दज्ञान आलम मगर यिम छी करान आँश ।  
यिमन क्याह छुय यिमन गोमुत अँकिस सेह ।।

गँरीबस सारिवुय वोन नाबुकारुय ।  
अमी किन्य वोटमुत छुय मा ख्यनस वेह ।।

स्यज़र यिमनुय तिमय अदु चौर्य ज़ौनिख ।  
दूहय हेचहख अड्यव न्यथ तय अड्यव नेह ।।

मे वन कुन्दन चू कथ सौंचस चू कथ कुन ।  
लोगुय मा चारु व्वलु प्युहमुत चू बेयि पेह ।।

\* \* \*

४

## नबुक तारुक

वारिनय मंज टूरिनय अज वुछ मे फवलनुच त्राय हय ।  
कोंछिमख यी ऑस्यनख व्वन्य रुम रेशुन आय हय ।।

जिंदुगी हँदे सरुक पम्पोश खसनुच ग्राय ह्यथ ।  
आबिडल होख्यतन तँमिस तमिकुय छु मा परवाय हय ।।

दूरि दूरे छुख करान अँछ नाट नबु कुय तारुखा ।  
लाल लूसिम अँछ मे पुन्ननेयि छय न फेरान माय हय ।।

नार सफरुक बोनि शेहजारन ति शेहलोव कुत्यनुय ।  
छुस बु बे-गम, छम मे सथ, छुम चानि जुल्फुक सायि हय ।।

गाश चेश्मन हुंद वथुरमख, गोछ नु ऑखुर प्योन वनुन ।  
चाय यिम यव सुन्ननि बँर्य किन्य, हँस्य बरन्य अज द्राय हय ।।

राथ शामन प्रुछ मे वॉलिंजि दुब दुब कुय मानि क्या ?  
तँम्य मे वँन्य वँन्य शेछ दपन छस वाय यूर्य यी नाय हय ।।

व्वन्य छु कुंदन युथ समय येलि मस चवान दयि नाव ह्यथ ।  
दय दपान मा आसि मयखानय बन्योव म्यॉन्य जाय हय ।।

\* \* \*

५

## ग्वनमाथ

बबरि लंजन द्रायि बामन, आयि शामन सॉन्य यार ।  
शेछ कॅरिव तोह्य खास आमन, आयि शामन सॉन्य यार ।।

गुल गज़ल फ्वलि, टुख यँबुरज़ल, बेयि रुबॉयी लालु वख ।  
गीत सबज़ार बालु दामन, आयि शामन सॉन्य यार ।।

कथु लेखन अँड्य मेछि मेछय, ज़ेछि नावल पेचदार ।  
हुर्य वचन तिम शहरु गामन, आयि शामन सॉन्य यार ।।

अँड्य लेखन नाटक ल्वकुट्य बँड्य, गोब्य तु गाटुल्य लेख नँव्य ।  
डेर लगी हज़लन तु पामन, आयि शामन सॉन्य यार ।।

सॉन्य चलि येलि वथ तु कथ, अदु न्वकतुचीन मा रोज़ि पथ ।  
म्वल तु त्वल लगी बेयि कलामन, आयि शामन सॉन्य यार ।।

\* \* \*

६

## यि द्वींत्थ आव

ग्वडु ज़ायि च्चु तु बु पतु ज़ाव बब तय ।  
दूह पौंशि दब गव ज़ाव बुड्य बब तय ॥

रुदस पतु छय मुश्कस रब तय ।  
रबि पतु खुर तय दुस तय दब तय ॥

ओश हॉर्य हॉरी लोच्चरुन वॉलिंज ।  
राठा वॉजिन नोन गव नब तय ॥

डल दंद्यसय तल ख्यल क्याह तंदले ।  
जूना असुवन्य तारक नब तय ॥

वर्नि दार आरस डुलु पल मालाह ।  
यारन हँज ज़न लँजमुच्च सब तय ॥

राम राम बँदरुन्य दून्या द्राये ।  
सिरयस किच्च छय रंगुदार डब तय ॥

रुत रुत येछ्यनख रुच्च छख अमलाह ।  
अँक्य दँर अँठम अँक्य दौर शब तय ॥

सगुवनि कनि येम्य लंग लंजि फुटर्यख ।  
हॉलिस तस कोर कुलिवुय ज़ब तय ।।  
दर दिथ करतख वज़नाह द्वशुन्य ।  
अँक्य ख्योव अँज्य मँज्य बेय कोर यब तय ।।

निकु येति आसन हेकि कुस 'कुन्दन' ।  
डुल म्योन कति छुय डुल म्योन लब तय ।।

\*\*\*

७

## यारन कुन

करु हा बु ग्राव यारन हर रंगु तु आनु यारो ।  
दूर्यर मगर रटुन ह्योत मेय पॉन्य पानु यारो ॥

दिलु किन्य बु छुस त्वही निश, अँज्य मँज्य अँती बु रुज़िथ ।  
दूर्यर अगरचि वुन्यक्यन असि दरमियानु यारो ।

तनु किन्य अगर जुदा अँस्य, मनु किन्य ति ज़ांह नु सपनव ।  
'पयवंद आदनुक छा शुर्य दोस्तानु यारो ?'

कॉत्यह मे निश तुहिँद्य सिर, कॉत्याह छि म्यॉन्य त्वहि निश ।  
अँस्य अँस्य बाँगरावान लोलुक्य फसानु यारो ॥

सॉथी मशन नु हरगिज़, मशि मा तिहिँज रफाकत ।  
पेच-ओ-खमन तिमव कॅर्य विज़ि विज़ि मे शानु यारो ॥

स्वख द्रख छे ज़िंदगी सॉन्य, सँन्य तय व्वगुन्य छि मंज़िल ।  
डुंग दिथ छि असि ति खारुन्य कम म्वख्तु दानु यारो ॥

आँही कॅरिव जि अरमान अलमन खसन मे सॉरी ।  
फेरुन ज़र्या यि कुन्दन ज़ांह वानु वानु यारो ॥

\* \* \*



८  
माजि हँज शोछ

बु यारन मंज योतुय अख यार आमुत ।  
छु ज़न निशि यावनस ल्वक़चार आमुत ॥

स्यठाह गोस शाद डीशिथ कॉशिर्यन अज़ ।  
मे ब्रोंतुय योत छु सुय शोहजार आमुत ॥

फेक्यव पेठ्य माज़ खोत मे साज़ डीशिथ ।  
बु छुस संतूरची ह्यथ तार आमुत ॥

बु छुस गुलि लालु, छुम मे दाग जिगरस ।  
मगर ह्यथ अज़मुकुय व्वज़जार आमुत ॥

बु सूज़ुस माजि पोत्रन हँज अनुम शोछ ।  
छि ज़ानान लारकुय योत दार आमुत ॥

तँमिस बालन छि लँग्यमुत्य लाल वेरे ।  
चँलिथ येलि तस योतुय संसार आमुत ॥

छि असि तति वारि सोंतुच आव आवय ।  
छु फवलनस सुय पनुन यकरार आमुत ।।

छु कुन्दन रिन्दुनय निशन चलान शर ।  
तमी आशायि छुस बाज़ार आमुत ।।



९  
मुबारक

कुल्यन सोंतु फुलयाह तु बामन मुबारक ।  
 तु छावुन येछिन खासु आमन मुबारक ॥  
 संगर मालु फवलुवन्य खेलिस सुत्य सुती ।  
 पँहँल्य यारनुय बालु दामन मुबारक ॥  
 करान ती ह्यडान यथ बेयिस दँर्य छि दुश्वय ।  
 तिमन दोंकु दोंकन तु पामन मुबारक ॥  
 वुछिथ पोशि थँर हर्दु कालय छोरुय कौड ।  
 दिवान बुलबुलाह चाक जामन मुबारक ॥  
 वुछिथ अज्म गाशुक तु परतव प्रगाशुक ।  
 करान छय सुबहस राथ ज़ामन मुबारक ॥  
 कद्र सोन कति ज़ोन अँम्य खामकारन ।  
 कंदस मुजि कुनुय साद खामन मुबारक ॥  
 छु कुन्दन ग्यवान ज़िंदुगी हँद्य तरानय ।  
 तमी नामवर शहरु गामन मुबारक ॥



१०

## गज़ल

यिम्न रॉन्न ति कांह प्रागाश छारव ।  
दिमव ना जॉल्य गाशस आश छारव ।।

अगर बुतरॉन्न प्यठ स्वर्गस दिमव कुन ।  
छु मा हाजत जि अँस्य आकाश छारव ।।

खबर मोठमुत छु कव पनुनुय तमहुन ।  
वॅलिव बेयि रोवमुत यादाश छारव ।।

ग्रुहुन चलि ना तु ग्रहद्यन छाय डलि ना ।  
नोवुय ज़ातुख लेखव नॅव राश छारव ।।

तिमन हॉसिल नु कॅह गाशी स्वतान छुख ।  
यिमव दोप सूरु मंज़ु खशखाश छारव ।

वं गछि आसुन्य नॅवुय कहवॅट तु कुन्दन ।  
सॅमिथ अज़ पासु स्वनुची चाश छारव ।

\* \* \*

११

नज़रानु

येम्य मोहबत कुन तु दुकानाह कोरुन ।  
नाँगरायुन खानु वॉरानाह कोरुन ॥

सानि दर्मुक वुछतु कोताह छुय बजर ।  
येम्य यि कोर तस ती वौनुख जानाह कोरुन ॥

लोलु युस आव, लोलु तस कोर नालुमोत ।  
प्रथ अखाह येति लोलु मस्तानाह कोरुन ॥

शीशु ह्यू ऑव्युल दितुन दिल शॉयिरस ।  
अँश्य फेर्यन ताम कदरि दुरदानाह कोरुन ॥

म्यानि मन्नरुक केंह ति मा तकसीर मे ।  
चेश्म अख अख टोठ पैमानाह कोरुन ॥

रहमतस छा तँम्य सँदिस अख रछ कॅमी ।  
यूत बोड दूख, त्यूत बोड बानाह कोरुन ॥

लोल थोवुन शायि शाये मायि मोत ।  
पूज़ि लायक हुस्न बुतखानाह कोरुन ॥

लोल गव बदनाम लेकिन ज़िंदु रूद ।  
हुस्नसुय पथ पान क्वरबानाह कोरुन ॥

क्वदरतुक हुस्ना बोरुन कश्मीरसुय ।  
कॉशिर्यन क्युत पॉदु अरमानाह कोरुन ॥

उल्फतुक मय बॉगरोव कुन्दन जीयन ।  
ज़िंदु कोलस बॉथ नज़रानाह कोरुन ॥



१२

### नूरस मय गॅछ छाय आसुन्यये

नूरस मय गॅछ छाय आसुन्यये  
यावनस ज़रन त्राय आसुन्यये

चेश्मन वुछ वुछ चेश्मय लोसन  
शूब्या यि च़े माय आसुन्यये

जुव येम्य लालन लोलस आलुव  
स्वरुगस गॅछ तस जाय आसुन्यये

बागस ग्वड बरुहव प्रथ कुलिसुय  
ग्वडु गॅछ्य अँस्य यक-राय आसुन्यये

अमनुक्य तु सलहुक्य दम दिथ वात्या  
इनसानस लायि-लाय आसुन्यये

कॉशरि ज़ेवि युथ मेछर तिछ गॅछ  
स्वंदर लेखन त्राय आसुन्यये

कुन्दन छुम यँचकॉल्य अज़ आमुत  
तस किच़ गॅछ सौत चाय आसुन्यये



१३

## दिख ना मेति त्युथ कांह व्यस्ताराह

दिख ना मेति त्युथ कांह व्यस्ताराह  
गंडु हा बु ति युथ बोड दसताराह

केंचन दसतार मलमलि खाराह  
केंचन नॅन्य व्वड बोड दसताराह

वॉलिजि वुहवान छुम ज्यत् नाराह  
चेश्मन लॅजिमुच अशिची दाराह

समखी योदवय सुय म्योन याराह  
कॅर्यज्यस म्योनुय ज़ाराहपाराह

युस वोथ आबस लोब तॅम्य ताराह  
बॅठचसुय ब्यूठ युस सुय बे-चाराह

यवु कोर यिमवुय बोड आंकाराह  
अज़ कोर तिमवुय च़कि इनकाराह

ज्यव मुचरनुसुय मा छुम वाराह  
दय रॅछिनम गोमय केंह फ्याराह



द्वन लफ़जन हुंद त्युथ गोछ शाराह

माने यथ ज़न वाराह वाराह

प्रथ अँकिसुय येति ज़न च़लु लाराह

सफरस मंज़ छुनु सॉथी याराह

ख्वश कोताह छुम लूक अटुहाराह

ख्वश कोताह छुम खलवक याराह

**कुन्दन** व्वलु छावव शेहजाराह

गोन सब्ज़ाराह, कथु दरबाराह



१४

### लवि क्याह सु सोंत लालो

लवि क्याह सु सोंत लालो, खरि युस गुलन तु सोम्बुलन  
परि क्याह सु बॉथ कांछाह, खरि युस गुलन तु सोम्बुलन

कथ किछ छि बॉतु बॉजी, यथ प्यठ नु लूख रॉजी  
स्व ति बोज़ तु जालसॉजी, खरि युस गुलन तु सोम्बुलन

वनु क्याह बु मीलि कलमस, बरि र्वपयि म्वहरु हलमस  
मंदुछावि तिलु तु स्वलुमस, खरि युस गुलन तु सोम्बुलन

वनु किथु तॅमिस बु जानय, करि हीलु तु बहानय  
बरि युस पनुन्य खज़ानय, खरि युस गुलन तु सोम्बुलन

युस तुरु च़ानि लालन, टख द्यावि म्वख्तु मालन  
तस मा छि जल ति च़ालन, खरि युस गुलन तु सोम्बुलन

बुलबुल ति मोत छु पोशन, ख्वश छुम मे रोज़ि रोशन  
करि क्याह सु स्वछ मनोशन, खरि युस गुलन तु सोम्बुलन

योद जल ति पॉज़ लागे, पनुन्यन पखन सु ज़ागे  
करि क्याह सु कुकलि रागे, खरि युस गुलन तु सोम्बुलन

वुछतोन यि सोन कुन्दन, ख्वश छुय यिवान यि रिंदन  
खरि सुय यिमन परिंदन, खरि युस गुलन तु सोम्बुलन



१५

## शोकलम कॅरिथुय हेयिव वनुवोनुय

शोकलम कॅरिथुय हेयिव वनुवोनुय, अदु चलि गाशस ग्रोनुये  
नोव नोट गछि अदु प्रथ कांह प्रोनुय, अदु चलि गाशस ग्रोनुये

सुबहुक वक्ताह क्याह छु नुंदबोनुय, पवति पवति गाशस गॅयि अम्बार  
सिरिं बगवान यी सालस सोनुय, अदु चलि गाशस ग्रोनुये

बागाह वुछतन छुय पवलुवोनुय, पोश फॅल्यमुत्य तलु न्यूल सब्जार  
पनु पोंपुर छुय सुति नचुवोनुय, अदु चलि गाशस ग्रोनुये

मतु सॉ कॅर्यतव चोनुय तु म्योनुय, ह्यमतो समतो कॅर्यतव कार  
अदु वुछतव क्याह पवलि डचकु सोनुय, अदु चलि गाशस ग्रोनुये

पथ कुन त्रॉव्यतव प्रथ कैह प्रोनुय, नवि सरु दीतव नोव व्यस्तार  
कॅर्यनवु यॉरी रेश्य पीर म्योनुय, अदु चलि गाशस ग्रोनुये

क्याह मे ओसुम करमय लोनुय, अकि लटि होवनम मा दीदार  
हाव्यम ना सुय वय रम्बुवोनुय, अदु चलि गाशस ग्रोनुये

व्यसुनुय पूशिन सुय व्यसु तोनुय, यारस मूजूद रूज़िन यार  
ब्द गॅयि अँक्य वोन बेय जॅन्य मोनुय, अदु चलि गाशस ग्रोनुये

मूजूद रूऒ्यनय अकृ नंदोनय, येछिनय अँम्यसुंद वुछुन बहार  
तूशनय मालिन्य तु वॉरिव क्रोनय, अदु चलि गाशस ग्रोनये



१६

## येलि अँस्य समखव

तारख नब असि, येलि अँस्य समखव  
अछु रछु यिन व्वसि, येलि अँस्य समखव

हँज वँज सुम गछि, गुमु सँर्य रुम गछि  
बुथ छलि थपि थ्वसि, येलि अँस्य समखव

बरतल बुथि नेरि, दवि वसि नवि हेरि  
कमि चिकु चावु खसि, येलि अँस्य समखव

कृष्णस नय मशि, गूपियन पय मशि  
यूगियन मद वसि, येलि अँस्य समखव

सोंतस ड्यकु फवलि, सुम्बुलस तु मसवलि  
पेचानु रजि खसि, येलि अँस्य समखव

आरु वसि कमि अमि, म्यवु कुल ब्वन नमि  
मोत यावुन लसि, येलि अँस्य समखव

पम्पोश मँत्य करि, ख्यल आलुव्यस नरि  
**कुन्दन** लसि बसि, येलि अँस्य समखव

\* \* \*

१७

यिहय वथ यिहय कथ

पोम्पुर करान शमुहस गथ  
यिहय वथ यिहय कथ  
पकान आयि पतय वथ  
यिहय वथ यिहय कथ

ज़्यवान सास मरान हथ  
दिवान अख अँकिस लथ  
कडान खूंत्य कडान रथ  
ख्यवान छल ह्यवान न्यथ  
खनान मेच च़टान जथ  
यिहय वथ यिह्य कथ

अँड्य छि त्रेशि हँत्य प्यथ  
अँड्यन प्राचु बँरिथ च्यथ  
अँड्यन लोगमुत ख्यत तु ख्यत  
अँड्यन वोत फाकु र्यथ  
खबर पेयख कम हापत  
यिहय वथ यिह्य कथ

मनुश मा छु ह्यवान पथ  
अँमिस वँरमुच मायि दथ  
मरान अख अँकिस पथ  
लँगतन जुव व्वथिसा छथ  
कंडचन दिवान पोशि प्रथ  
यिहय वथ यिह्य कथ

कुन्दन छुम मे यी ताकत  
मे छुम गछान मनस मथ  
गँछुम पोशुन्य तसुंज वथ  
पोशुवनी सतुच वथ  
पोम्पुर करान शमुहस गथ  
यिहय वथ यिह्य कथ





१८

### बॉथ तु दुख

शाम हय सपनुम रॉस्य  
व्वदॉस्य गॉयस बो  
व्यसुरेयम मे मस खॉस्य  
व्वदॉस्य गॉयस बो

मोत मे लटि यी ना  
मटि छस दर्शुन दी ना  
अँद्य अँद्य फेरु बु तॉस्य  
व्वदॉस्य गॉयस बो

तारुकव खोतु ज़्यादय  
तँम्य कॅर्य ना मे वादय  
ऑद्य ताम तस याद ऑस्य  
व्वदॉस्य गॉयस बो

पादन त्रावस सर  
मदन वार यियम कर  
हटि ची च़टि हेम फाँस्य  
व्वदॉस्य गॉयस बो

मे गॅछ स्यँज नज़राह  
चलिहेम वॅह्य तु वाह  
पानस छॉव्यतन सॉस्य  
व्वदॉस्य गॅयस बो

छॅर नज़राह मॉनिम  
स्वय गॅनीमथ जॉनिम  
नतु मे ति हावस ऑस्य  
व्वदॉस्य गॅयस बो

वावन कॅर ठसराय  
मे दोप फीरुस माय  
नैदुरॅय गॅयि मे पाटॉस्य  
व्वदॉस्य गॅयस बो

**कुन्दन** फेरानय  
वुछ तोन वानु वानय  
छत गॅयि छल पेयि वॉस्य  
व्वदॉस्य गॅयस बो



१९

## रोव हय करुवय

रोव हय करुवय शेहजारस तय, शेहजारस तय  
वनुवनु सुय तुलिवुय दस तय, तुलिवुय दस तय

बोथाह तुल तय मोदुराह म्यूठाह, मोदुराह म्यूठाह  
दर्य गंडुनस युथ असि यी रस तय, असि यी रस तय

लालय गोमुय अनुने बाज़र, अनुने बाज़र  
हटि कुय होंज़ुर कनुकुय वस तय, कनुकुय वस तय  
हतु बँद्य दीनस सथ छम तँम्यसुंज़, सथ छम तँम्यसुंज़  
लगसय पॉरी दसतारस तय, दसतारस तय

अरशुक कॅर्यनस विज़ि विज़ि रॉछाह, विज़ि विज़ि रॉछाह  
लोलुक मस दिथ कॅरुनस मस तय, कॅरुनस मस तय

ज़ी कुल्यसुय तस पँद्य मा लूसिम, पँद्य मा लूसिम  
यी कर ही कदुमन वथुरस तय, मन वथुरस तय

कुन्दनु सुंद रुत नज़माह बोथाह, नज़माह बोथाह  
गछ बा मॉलिस माजे लस तय, माजे लस तय

\* \* \*

२०

### मे मा वोन अपुज़ अज़

मे मा वोन अपुज़ अज़  
छु अज़ सोंत आमुत  
मे अज़ वोंत वुछने  
छु अज़ सोंत आमुत

अगर ज़न वोनुम रोशि चिकु चाव सोंतुक  
अपुज़ योद वोनुम रोशि नोव वाव सोंतुक  
मे मा वोन अपुज़ अज़

च़लन जल तु बुलबुल, च़मन वारि हँघ गुल  
फुलय डोट बुज़्य गछि नबस फेरि सोसुन  
मे मा वोन अपुज़ अज़

अपुज़ योद वोनुम सोंत मा रोज़ि सोंतुय  
च़वापोर सोंतुक फकत आसि ब्रोंतुय  
मे मा वोन अपुज़ अज़

छु सोंतस स्यज़र बालु पानुक स्यज़र ह्यू  
छु सोंतस नव्यर ल्वकुचारुक नव्यर ह्यू  
मे मा वोन अपुज़ अज़

लगान सौंतु कालय छु ग्वड ज़िंदुगौनी  
 अँछन गाश ज़ोतान ज़्यवान मीठ वौनी  
 मे मा वोन अपुज़ अज़

छु सौंतय फवलान वारि बादम फुलय नँव  
 करान कोरि हिकटा गंडान दैर्य करान रोव  
 मे मा वोन अपुज़ अज़

ज़्यवान व्वस्तु हाक वारि मंज़ हाक कानुल  
 करान बोल बोश दारि तल टोट बुलबुल  
 मे मा वोन अपुज़ अज़

छु सौंतस ति अनहार सुबहुक प्रबातुक  
 छु सौंतय ल्यखान ज़िंदुगौनी ति ज़ातुक  
 मे मा वोन अपुज़ अज़

छु फेरान स्वंदर मालनुय गाश स्वंदर  
 छु सब्ज़ार पिशलान फवलान पोशि ग्वंदर  
 मे मा वोन अपुज़ अज़

लिहाज़ा बु वनु पोज़  
 पज़ी वातु खनुबल  
 अमा पोज़ चु अन कन  
 वनय पोज़ कनस तल

मे मा वोन अपुज़ अज़  
छु अज़ सोंत आमुत  
लिहाज़ा बु वनु पोज़  
मगर वनु कनस तल

\* \* \*

२१

तलु साँ वॅन्यतव

कुन्दन छा यथ नाव शॅरीरस  
किनु कलु ख्वपरि अंदर कुनि कॅछा  
फुटजि वॅलिथ ज़न चूरि खॅटिथ कॅह  
ऑकुल यथ ज़न अक्ल वनान छी  
तॅथ्य मा नाव वनान यिम कुन्दन

किनु सीनस खोवुर्य किन्य म्यॉनिस  
कुछि मंज़ क्याहताम, यथ ज़न ऑठन  
पॅहरन दुब दुबरारय आसान  
तॅथ्य मा नाव वनान यिम कुन्दन

या मा म्यान्यन तिमन खयालन  
यारन बायन यिम छुस बावान  
या मा सोंचस तिमन दूलाबन  
वॉलिंजि यिम वथुवार करान छिम  
तॅथ्य मा नाव वनान यिम कुन्दन

या अनुहारस कारस म्यॉनिस  
 या व्यवहारस नतु वरतावस  
 या असुनस या वदुनस म्यॉनिस  
 या पकुनस या रुकुनस म्यॉनिस  
 तेंथ्य मा नाव वनान यिम कुन्दन

अँछ यिम डेशान तिम छय म्यान्यय  
 कन यिम बोजान तिम छी म्यॉनी  
 वुठ कुमलान तय दंद ज़ोतान छिम  
 ज़ेवि हुंज़ टुकु टुख स्व ति छय म्यॉनी  
 तेंथ्य मा नाव वनान यिम कुन्दन

रगुनुय मंज़ युस खून ग्रकान छुम  
 मनुचे मनकलि नार वुहान युस  
 बुमुनुय म्यान्यन च़ख़ य्वसु च़ौरिथ  
 च़ेशमन दून युस खश्मु खसान छुम  
 तेंथ्य मा नाव वनान यिम कुन्दन

म्यॉनिस होशस या एहसासस  
 किनु मशरब तय गफलेंच़ म्याने  
 म्याने मायि तु लोलस म्यॉनिस  
 किनु दुय तय बेयि नफरेंच़ म्याने  
 तेंथ्य मा नाव वनान यिम कुन्दन



कूदस चुन करान युस शीशस  
क्रकि खसु ओबुरस वुजमलु ज़ालान  
शोरस कनुनुय ज़र पावान युस  
शाँती खसु ज़न शुनिहिच छ्वपु हिश  
तँथ्य मा नाव वनान यिम कुन्दन

वँन्यतव बायव तलु साँ वँन्यतव  
कुन्दन छा यथ नाव शँरीरस  
दिलस द्यमागस किनु अनुहारस  
व्यवहारस छा किनु एहसासस  
कथ साँ नाव वनान यिम कुन्दन  
कथ बा नाव ह्यवान यिम कुन्दन  
कथ छी नाव दिवान यिम कुन्दन  
वँन्यतव बायव तलु साँ वँन्यतव



२२

## अकत्रुहिम अक्त्तूबर

येलि व्यपदा वतुनस प्यठ छि यिवान  
तेलि छेपि छु प्यवान द्युन पान पनुन  
क्वरबान करुन जुव जान पनुन

रतु छफ ह्यू वंदनु यिवान वतुनस  
कांह ज़ीवाह, दीवाह या दीवी  
कांह मनुशाह रुत या ज्युठ कांछा  
कांह लोलु बोछा कांह मायि मोताह  
कांह ड्यक् बोड या कांह बख्तु बोडाह

यस म्वल नु किहिन्य यथ समसारस  
यस छल नु कपट, यस मल नु मनस  
सुय वंदनु यिवान पनुनिस वतुनस  
क्वरबान करान जुव जान पनुन

युथ सूरत बचिनुच बनि कांछा  
सरपोश सिरन प्यठ रोज़ि वुरुन  
युथ रोज़ि अथन अथवास कॅरिथ

युथ नेकन लङि अढृतकुय सग  
 युथ रोज़ि प्रज़लवुन अढनुक रव  
 युथ साज़न प्यठ कम सोज़ वज़न  
 युथ ढायन हुंघ ग्यव चाँग्य दज़न  
  
 यियि कोर्यन हिकटन वार दूहय  
 यियि न्यंदु बाँतन व्यस्तार दूहय  
 युथ ज़ेनि दूहय येति हक तय पोज़  
 युथ ग्वरबत दूख तय दाँघ च़लन  
 युथ सीनन हुंघ यिम छ्वख ति बलन  
  
 रतु छफ ह्यू वंदनु यिवान वतुनस  
 कांह ढनुशाह या कांह ढायि ढोताह  
  
 युथ दूर्यर च़लि बेयि च़लि क्रीर्यर  
 दूह गेन्य च़लि ड्यकुची बेयि फ़ह्यर्यर  
 युथ साँरी येति बेयि ढँत्य करुनय  
 वसढेच़ हुंघ युथ बेयि फ़त्य बरुनय  
  
 युथ साँरी शेरन रँछुरन व्वन्य  
 युथ लूहरुन फुटरुन साँचि नु कांह  
 अँस्य ढाय बरव प्रथ इनसानस  
 अँस्य राँछ करव अढनुस वतुनस

बस यी ऑस सोंचान इन्द्राजी  
बस यी ऑस कांछान इन्द्राजी

तमि पान वौदुय अँथ्य आदर्शस  
छेपि पान दितुय पनुनिस वतुनस

यिनु राव्यव तँम्य सुंज़ क्वरबॉनी  
यिनु पान वंदुन गछि बे-मानी  
अथुवास वॅरिव बेयि लोल बॅरिव  
यथ अमुनस वतुनस रॉछ वॅरिव

प्रथ कांह बॅनिन येति लोलु बोछा  
प्रथ कांह बॅनिन येति मायि मोता



२३

## खबर कवु

खबर कवु छख खयालन मंज चु रावान ?

अँती आसख बिहिथ वातख खबर कोत  
कमन ताम हॉरिसातन मंज सनेमुच  
ग्वतन गॉमुच, कमन सॉचन चु पेमुच  
चिहिस अंदर छंडान छख मील कॉत्याह  
खबर कम गम पखन प्यठ निथ गछान छी  
खबर कम फिकरु छय व्यसुतोन हावान

मे वोनुमय बार हा गम गछि नु ह्योन ज्रांह  
छु सॉचुन पोज अमा पोज सॉच क्युथ ह्यू ?  
छि आसान प्रथ अँकिस कथि र्वख दु-तरफय  
अगर गाशुक च़े सूंचुथ सॉच बर-हक  
अगर ज़न सॉच गटि हुंद तेलि नज़र छोट  
छु सॉचुन पोज अमा पोज सॉच त्युथ ह्यू  
सनेयस यस पँदिस म्वंजि कॉठ रथ आस  
दोपुन 'द्रामुत बु ज़ंगि ओसुस रुची अज़  
खबर ड्यकि मा मे ओसुम वॉरदाताह  
अंगुय मा राविहेम फुटिहेम मे नॅर ज़ंग

खबर बतु थाल वॅम्यसुंद ब्रूँठ्य मे आम  
यिथय रतु रछ मे आयम, दॅय रोछुस अज़'

नतय तॅम्य दिच उचकस चॅड पान मोरुन  
'मे कस बद बख्तुसुय बुथ ओस वुछमुत'  
रतस चॅर चॅर वुज़िन्य लागि नागु रादुच  
हुर्यस दग तलु पॅदिस थवि चीरु थफ दिथ  
वॅमी क्या तस गछी दौदिस तु दगि वन  
कोरुस ज़न पकवुन्यव वति त्राहि त्राहे



२४

## अख खयाल

अख खयालाह ब्यॉल्य फोल अख  
 वोव तु खोत मनि ज्यूठ कुल  
 सौंचि समजुक बेयि व्यचारुक  
 द्रायि बामन लॅज फुलय, बागस  
 च्ववापोर मुश्कि अदफर  
 बुलबुलव तुज शोख कॅत्यजव बेयि जलव  
 नी ज़न पखन प्यठ  
 वातुनॉविख तरफु तरफय कूनु कूनस  
 रेह हेचुन लोलस जनूनस  
 नाव प्यव तस खूनु मजनून

लॉलि पथ देवानु सपन्यव  
 वॅन्य दिचन तस नजदु वनसुय  
 मोत मत्यव ज़न यथ जहानस  
 वॅन्य दिवान गव बे-निशानस  
 छाँड दिच तॅम्य .... ज़ान प्राँवुन  
 वोत सुय अदु ला-मकानस

कर खयालाह  
अख खयालाह  
द्राव कति तय  
वोत कोत .... !

\* \* \*



२५

## पोशि फोट

व्वलु यारु रछव अमारु पनुन  
दिलुक्यन अरमानन रॉछ करव  
आशन अछिदार्यन रख लागव  
ह्यस होशस पॉराव करव

दिलि जिगरस मंज़ थाँविथ ख्वशबू  
गिलु टूर्यन हुंद अनहार रटव

व्वलु यारु दिमव अज़ चुख चांग्यन  
कथु पनुने नवि सरु परखावव  
शोलुनावव सॉचिच नॅव महफिल  
व्वज़लावव लॉव्य खयाल पनुन्य

ह्यथ दज़वुनि व्वज़जि मशालि पकव  
गुलि लालन हुंद व्यवहार रटव

व्वलु अँस्य ति रटव अज़ थज़रुच वथ  
व्वलु अज़मस सुत्य यारानु करव  
दी दय असि कदुमन नॅव बरकत  
युद पॅद्य त्रावव कोहु बालन कुन

व्वलु अँस्य ति लमव थोद ह्योर ह्योर कुन  
येमि पेचानुक अनहार रटव

व्वलु यज़तुक बोड दसतार गंडव  
बेयि शान पनुन्य थावव काँयिम  
लछि लूक मंज़य अँस्य नँन्य नेरव  
तिथ्य ग्वन तय तिथ्य अवसाफ थवव

व्वलु अँस्य ति द्यमागाह त्युथ थावव  
जाफुर्य सुंद अँस्य व्यवहार रटव

व्वलु नेरव डल सॉलस मॉलस  
ज़िंदुगी हुंज़ थावव अलम रँटिथ  
ख्यल वँथुरन त्रावव थज़र नज़र  
सुबह शामन हावव जलवु पनुन

अँस्य अख अँकिसुय मँत्य मीठ्य करव  
पम्पोशन हुंद अनहार रटव

व्वलु अँस्य ति थवव ख्वय सिरियस कुन  
बेयि नूरस गाशस कव थावव  
ज़ुचि वाने हेरि ब्वनु श्रान करव  
प्रवु गाशिक्य वस्त्र लागव नँव्य

अँस्य रोज़व मुदय गँडिथ सिरियस  
गुलि अखताबुक व्यवहार रटव

प्रथ गाचि व्वलो अँस्य पोश बनव  
विरिक्योम सोम्बुल मदहोश बनव  
शोलुनावव ज़गतुच बागु बबुर  
मस चावव बेयि म्वय नोश बनव

यि छु कुन्दन अज़लय पोशि मोताह  
व्वलु अँम्यसंद्य अँस्य अनहार रटव

अनहार रटव व्यवहार रटव  
व्यवहार रटव अनहार रटव



२६

## गुल बहारुक गाशि तारुख

गुल बहारुक गाशि तारुख आशिनय छुम रॉछदर  
ल्वकृचार यस सृत्य गुजर्यव सृत्य यस गुजर्यम बुजर

हरनु चेश्मव छुम वुछान याम तिम छि शूबान क्या वनय  
ज़न तु छी तिम ज़ून गाशस प्यठ लेखिथ बस ज़ुय अछर

चाल क्या छस राज़ होंज़न्य, फाल वुछिथुय आव याम  
तँम्य रँछिम च्यथ सथ मे दिचुनम गटु ति चलि व्वन्य फवलि सहर

वेरि तँम्य सुंज़ि सेरि फम्बुचे कॉर मे लूसम कतान  
ओम अबसुम खाम व्वेछुनुम ज़ांह मे नॅर मा थॅव पथर

हुर्य बु वनुहस शुर्य ति प्रारान छिस बु प्रारान पानु छस  
ओश गव यिम वादु कॅर्य कॅर्य तिम मे गछुनम पूर कर ?

योद बु डीशिथ काँसि हुंद कैह केशहा, व्वश त्रावुहा  
ओस मे सुय दोस लॉगिथ यी व्वनान ज़न छुय मचर

वुन्यक्यनस तस लोलु फोतिसुय मारु मँत्यसुय लँज खबर  
ही थर्यन हुंद अँरनि रंग क्या गव बजर क्या गव ल्वचर

अज़ तँमिस क्याहताम बास्यव कलु छु कोडमुत वँम्य गुलन  
कुस सना कोस्तूर बोल्योव, नूर फोल कुस क्या खबर ?

कम संगर मालय वुछम तँम्य अज़ असान कुमलान वुठ  
वावुनुय यी बोवनस तथ मा वुन्युक ताम द्राव तर

वादु छुम कोरमुत मे कुन्दन याम शेछ ह्यथ योर यी  
ज़ी कुलिस तस ही बु वथुरस पादुनुय त्रावस बु सर



२७

## ज़िन्दगी हुंद सोंथ

ज़िन्दगी हुंद सोंथ मो व्वन्य रावुराव  
चाव मति अज़ चाव प्यालाह चावुनाव

आसि हे युद लोल बरुनस म्वल तु बाव  
बिलुहनस तेलि क्याज़ि पेयिहे चूर नाव

कालिदासन सूज़ कवु शेछ ह्यथ ओबुर  
यस मतिस यिथु कॅन्य दिलुक अरमान द्राव

पोशि टूर्यो! फवलनु रोस छुय क्या हसर  
रंग रूपाह हाव नोन कड नेछुनाव

हवनुकुय होतुशीश ज़न लागन अँछन  
व्वथ तिथय पनुन्यव अथव कैह ख्यावुनाव

लोल वुछनस तँम्यसुंदिस वंदु जुव पनुन  
दोल वुछनस जिगरुकुय तोत आमताव

लाल सुंघ पॉठ्यन कौडुम मा दाग नोन  
दोप मै व्वसतादन गमस खंगालु त्राव

वैरिधि कौत्याह खैत्य मे अज ताम क्याह अंदोव  
चंद्रमय बेहतर दूहन मंज माह बन्याव  
द्राव कुन्दन लोलु बाजुर्य चावु सान  
काहवैनी आनन पेयस ग्वरदौल्य पाव



२८

### फलसफन हुंज छम नु लालो कैह खबर

फलसफन हुंज छम नु लालो कैह खबर  
रुत यि बासान छुम वनान छुस तँथ्य ज़बर

नेरवुन पोत नज़रि वुछ मे चेश्म जूर्य  
टॉर्य बॅर्य बॅर्य हॉर्य तिम ज़न पोशि सर

स्यद वॅथुर पम्पोशिकी येति म्वखतु द्राव  
दुब थविथ वॅथरव प्यठन कोर तँम्य सफर

सुब दमस च़लि यार सपुनान सीनु चाक  
शामु शामय च़ोल सु योद बासान कहर

ज़ून पछ गटु पछ मे मोनुम ब्योन हना  
राथ गॅयि राथुय सहर ऑखुर सहर

आमुतावन हुंद वुहुन छुम कम हना  
बेह हना, ब्रुंज़ा, च्युहा, साथा, पॅहॅर



रातु म्बगुलस यस दूहय गोट द्रींठ्य आव  
ज़िंदुगी हुंद कंद लगान तस छुय ज़हर

मोत गुलालाह शॉयिराह कुन्दन दपान  
दीनु सीनुक्य छी कुनी यिम नामवर

\* \* \*

२९

## टाळ्यो वंद्यो जुव जान

टाळ्यो वंद्यो जुव जान, पदमान छसय पेशकश  
 श्वन्य श्वन्य र्वनिदार दामान, जानान छसय पेशकश  
 यिनु चानि गट्ट ज़ोल च़ोल तय, आकाशन गाश वोल तय  
 रव खोत नोन प्रवु त्रावान, प्रज़लान छसय पेशकश  
 सोंतन बागस कोर जोट, बोम्बुर्य पोशाह मति रोट  
 बुलबुल गुल क्याह छावान, पेचान छसय पेशकश  
 पां-चादर गॅयि गॅल्य गॅल्य, वछि वॉलिंजि वॅछ वॅल्य वॅल्य  
 गिल क्या दिल फवलुरावान, शिलुपान छसय पेशकश  
 नीजर फ्यूर सबज़ारस, तन वॅथरुन दिलदारस  
 नेत्रन नूर हुरावान, जानान छसय पेशकश  
 करतो मति म्योन चारय, बलु युथ बु ति बेमारय  
 दाद्यन करतम दरमान, अरमान छसय पेशकश  
 चमका पॅरयाह लालो, गॉमुच छस बे-हालो  
 ह्यसु छुहॅमो व्यसुरावान, जुव जान छसय पेशकश

हाँगनि रोट चावु पां फ्योर, लोलन म्वखताह सुय कोर  
यँच काल मे ति वोत प्रारान, दुरदान छसय पेशकश

मोम बँत्य ओश क्याज़ि हारान, पोम्पुर छुस गथ मारान  
वति चानि नूर छँकरावान, ज़ोतान छसय पेशकश

कथि चानि मेछर तु बेयि रस, चोन क्युत छुम अंगूर्य मस  
मेछर छुम मँचुरावान, तम्बुलान छसय पेशकश

**कुन्दन** छुख चिकुचावय, स्वनु तन क्या बु थ्यकुनावय  
मँत्य मुर ज़न छुस मँदुछान, व्वशलान छसय पेशकश



३०

## मति रटुथा नालुमते

मति रटुथा नालुमते, कति कते छोरमख  
मत्या म्यानि तापु तते, कति कते छोरमख

गोमुत युस ज़न लछि तु लते, बाँतस किथुक्कन्य थाव्यम कन  
वाह वाह करि क्याह वाह यस स्वते, कति कते छोरमख

अनिरस मंज़ वन क्या करु येते, मटि येम्य हेचमुच म्योनी नाव  
सुय येलि गिदि येति ज़ारस पते, कति कते छोरमख

वथ क्या हाव्यम सुय मंज़ वते, असि कुन येम्य ज़न थर फिरनॉव  
तापुनि तावय मस यस छते, कति कते छोरमख

मत्या वनतम ओसुख कते, त्रॉविथ कवु सनु गोमुत मे  
रस कुस ओसुय लोगमुत तते, कति कते छोरमख

मति म्याने नैदरि हते, नज़राह करतो पूरिस कुन  
गाशाह यिवुन वुछ फवति फवते, कति कते छोरमख

सूरत मा छय च़े ति हति शते, नतय ओसुख चु ति ख्वाजाह  
चंदु छरिनय किच़ जाय छा येते, कति कते छोरमख

व्वलु सॉ बायो चु ति ल्वति ल्वते, वॉलिंजि हुंजुय बोज़ दुबुराय  
युथ नो अरमान गछन ख्वते, कति कते छोरमख

सॉरी पॅक्यतव तोह्य म्यानि वते, वुछ तव बोठ किथु वात्यव नाव  
बरकत आस्यव त्वहि हरकते, कति कते छोरमख

रहबर यस गव कातय क्वते, **कुन्दन** क्यथु करि सुय अथुरोट  
येति गछि आसुन मोत युस मते, कति कते छोरमख



३१

### येलि हर्दनि छट छय ग्रायि छटन

येलि हर्दनि छट छय ग्रायि छटन  
 गगरायि फटन येलि रूदु त्रटन  
 तेलि नील गछन छय नीलु वटन  
 ख्यलु वॅथुरन हुंद मति हाल मु पृछ

येलि कालु ओबुर खसि असमानन  
 वुजि वुजुमल बुजि खसु बुस्तानन  
 तेलि अलु अलु अचि ना कोहु बालन  
 ही थरिनय हुंद मति हाल मु पृछ

येलि मायि मशन ज़न छायि बॅनिथ  
 पेयि लोलुय ज़न मुलु मायि छोनिथ  
 प्यन आशि हॅरिथ बेयि रायि छेनिथ  
 मचि वाँलिजि हुंद मति हाल मु पृछ

येलि स्यज़ुरस चार्यर नाव करन  
 येलि पज़रुक मोत चिकुचाव खरन  
 येलि बुलबुलुनय क्युत पंजरु गरन  
 अदु गुलनॅय हुंद मति हाल मु पृछ

येलि लोलस मॅल्य कांह हेयि द्यारन  
येलि हुस्नस तामथ कॅड्य चारन  
तेलि बोन्न्यन हुंद्य ताम ग्वड थारन  
क्वंगु पोशन हुंद मति हाल मु पृछ

तिम आरन ट्वलि दिन आरु पलन  
ज़न नारस पुर दसतार वलन  
अदु ग्रज़ व्वथि आबस आरुवलन  
तमि सॅहलाबुक मति हाल मु पृछ

खसु हालत कुन्दन लालस छम  
स्वय ग्रख यथ मसुकिस प्यालस छम  
या खबराह जूनि गुलालस छम  
छयतु चेश्मन हुंद मति हाल मु पृछ



३२

## फवलुन येछिनय

फवलुन येछिनय च़े गुलि टूराह  
 नचुन येछिनय च़े बम्बूराह  
 तु पोशाह ह्यू असुन येछिनय  
 लसुन येछिनय बसुन येछिनय

च़े वावुक्य पॉठ्य वुफ निन्य छय  
 तु बावुक्य पॉठ्य वॅन्य दिन्य छय  
 चु पेचानाह खसुन येछिनय  
 लसुन येछिनय बसुन येछिनय

दोपुख अँकस दूलाबाह छुय  
 यि हुस्नस युस हिजाबाह छुय  
 दूलाबन मंज़ फसुन येछिनय  
 लसुन येछिनय बसुन येछिनय

दोपुख हुस्नस न्यबर मो पख  
 बे-परदय नेरनुक छा वख  
 दिलन अंदर बसुन येछिनय  
 लसुन येछिनय बसुन येछिनय



नैदुर तारक नबस यी कर  
व्वमेज़न नेरि किथु वॅन्थ तर  
यिमन सनिरन वसुन येछिनय  
लसुन येछिनय बसुन येछिनय

प्रबातुक्य पॉठ्य नोवुरावी  
तु सोंतुक्य पॉठ्य फोलुरावी  
डलुक्य पॉठ्यन च़सुन येछिनय  
लसुन येछिनय बसुन येछिनय

चु कुन्दन ताज़ु बॉथाह पर  
तु आरुक्य पॉठ्य ग्यवुनाह कर  
च़े रासस मंज़ रसुन येछिनय  
लसुन येछिनय बसुन येछिनय



३३

मदनन कॅर्यनम जिगरस पारो

मदनन कॅर्यनम जिगरस पारो  
यारो तॉय तु हॉय  
हायि तु ज़ायि मोत ल्वकुचारो  
यारो तॉय तु हॉय

चमनन चायोव लोलु बेमारो  
लालस ति डीशिन छ्वकुलद तन  
द्वशुवय तिम छी अकि अनहारो  
यारो तॉय तु हॉय

सोदुरस तरुनस गछु तयारो  
हम तुल पानय वायुन नाव  
पर रटि नम कर लोगमुत छु तारो  
यारो तॉय तु हॉय

जाफुर्य गौडमुत बोड दसतारो  
पोशि थॅर माहरेन्य मंदुछान ज़न  
रंगु रंगु पोश छिस यनि वॉल्य यारो  
यारो तॉय तु हॉय

छोकुनुय लागान छुम शुमारो  
 तारक ग्रैदि कस आयि अज़ ताम  
 दरशुन दी सुय बनि बुलगारो  
 यारो तॉय तु हॉय

बे-आर प्योमुत छुम मदनवारो  
 बदनस कोरुनम क्वंग ह्यू रंग  
 छँत्य गोम पँत्य सुय व्वशलुन्य नारो  
 यारो तॉय तु हॉय

मोत मनसूर खोत ना प्यठ दारो  
 पज़रुचि लंजि मा थफ त्रॉवुन  
 मे ति कोरमुत छुय सुय यकरारो  
 यारो तॉय तु हॉय

**कुन्दन** गोमुत छुय गिरिपत्तारो  
 हुस्नन कॅरमुच छस हाँकल  
 तँस्य पतु छुन त्रौवमुत कारुबारो  
 यारो तॉय तु हॉय



३४

**अख अख कॅन्य लॉग्यतोस गॅर्य गॅरिये**

अख अख कॅन्य लॉग्यतोस गॅर्य गॅरिये  
 पॅरिये मॅहलस दीतव कुन  
 रंगु रंगु बोलन जानावॅरिये  
 पॅरिये मॅहलस दीतव कुन

स्वनु लाँकि तामथ अँस्य हसाँ तॅरिये  
 शालुमॉर तामथ रूद कोताह  
 युस यूत पोक तस तीत्य कोठ्य दॅरिये  
 पॅरिये मॅहलस दीतव कुन

कोड युस दार्यव सुय चाव बरुये  
 बरु कोड तु दार्यव बेयि पोत चाव  
 अथ तूफानस थँव्यतव ठॅरिये  
 पॅरिये मॅहलस दीतव कुन

मन गॅछ्य आसुन्य कनि खोतु दॅरिये  
 कन गॅछ्य कावय शुप्य सपनुन्य  
 हेह युथनु गछिहे कम कम फॅरिये  
 पॅरिये मॅहलस दीतव कुन

मतु रावर्यतोन कथु कॅर्यकॅरिये  
 वाँस छवु न्यामथ रथि खॉर्यून  
 रोव कॅर्यतव गँड्यतव तोह्य दॅरिये  
 पॅरिये मॅहलस दीतव कुन

काँसि गॅछ्य नु आसुन्य येति छोट्य नॅरिये  
 ज़ेठ्यव नरिवुय छु ख्योमुत साल  
 प्रथ कुनि नालस जॅर्य तव जॅरिये  
 पॅरिये मॅहलस दीतव कुन

वावन लुहरॉव्य सॉन्य स्वनु मॅरिये  
 तुजि तुजि हेत्य असि बेयि सोम्बरुन्य  
 पूर गॅछि तु बाँगरव अँस्यति च्वचि वॅरिये  
 पॅरिये मॅहलस दीतव कुन

प्रथ नवरैह छुय खसान नोव वॅरिये  
 ज़िंदु रूद सुय यस कैह हॉसिल  
 बाक्य आयि यिथ्य गॅयि तिथी छॅरिये  
 पॅरिये मॅहलस दीतव कुन

हर्दनि वावय कौत्याह हॅरिये  
हॅर्यमॅत्य छि आसान खॅर मॅत्य ज़न  
तिमनुय छु बोश येति यिम छि दॅर्य अॅरिये  
पॅरिये मॅहलस दीतव कुन

**कुन्दन** छुय वनान म्यौन्य रंगु चॅरिये  
चोनुय मोहबत छु वुफुनावान  
विजि वावस नतु वनतु कम दॅरिये  
पॅरिये मॅहलस दीतव कुन



३५

द्वह तु द्वह

द्वह तु द्वह, द्वह तु द्वह  
लूक ति द्वह तु बोड ति द्वह  
रुदु द्वह तु तापु द्वह  
द्वह तु द्वह, द्वह तु द्वह

अँती प्यवान पेठ्य तु कोह  
अँती गछान वुडिथ तोह  
द्वह तु द्वह, द्वह तु द्वह  
वुशुन वुशुन हारु द्वह

लँजिस तुर तु बन्योव पोह  
सोंतु मारान फुलयि छोह  
हर्द करान हो तु हो  
द्वह तु द्वह, द्वह तु द्वह

द्वह तु द्वह, द्वह तु द्वह  
हिकट करव चु तु बो  
चक्रुट्य हरव चु तु बो  
ह्यमत करव चु तु बो

माय बरव चु तु बो  
द्वह तु द्वह, द्वह तु द्वह

अँड्य छि तुकान व्वस्तस द्वह  
अड्यन वती लोसान द्वह  
लोलु मत्यो फुटर कोह  
कुन्दन रँटिथ कलम लोह

द्वह तु द्वह, द्वह तु द्वह  
द्वहय द्वह द्वहय द्वह  
तापु द्वह तु रूदु द्वह

\*\*\*



३६

### चाव येलि चावय सॉनिस दारस

चाव येलि चावय सॉनिस दारस  
यारस पनुनिस पुशरुम पान  
थलि थलि वुछुमय तस दसतारस  
यारस पनुनिस पुशरुम पान

यिनु तॅम्य सुंदि फोत्य गुल गुलज़ारस  
पोशव शबनमु सुत्य कोर श्रान  
बोम्बुर लोग बैयि पनुनिस कारस  
यारस पनुनिस पुशरुम पान

ज़गतन क्रख तुज नरि दिचु नारस  
जानन मतुसॉ कॅर्यतव फान  
कन मा थोव काँसि ज़ारस पारस  
यारस पनुनिस पुशरुम पान

नीजर कॅम्य द्युत यथ सब्ज़ारस  
रज़ि कॅम्य खोरुय मोत पेचान  
ग्रख कॅम्य दिचुनय र्वपु आबुशारस  
यारस पनुनिस पुशरुम पान

चॅर काँटुर लॅग्य कथु दरबारस  
 अख अँक्यसुय छी लोल बावान  
 मँत्य करुहख अथ मँत्य अनुहारस  
 यारस पनुनिस पुशरुम पान

मनसूर येलि ज़न खोरुख दारस  
 तँम्य तति सोरनय सुय बगवान  
 मोतन कोर क्याह तस म्खतारस  
 यारस पनुनिस पुशरुम पान

पज़रुच त्यम्बुराह पैयि अम्बारस  
 सूर गव अपज़िस नोन द्राव पान  
 पूजा कॅर मे पनुनिस यारस  
 यारस पनुनिस पुशरुम पान

खोच़ मो व्वलुरस या विजि वावस  
 तारन वोल छुय सुय नारान  
 रुच़ अमलाह छय उजरत तारस  
 यारस पनुनिस पुशरुम पान

रॉछ कर पछि तय बेयि एतिबारस  
 बॉगर लोल तय बन इनसान  
**कुन्दन** मानि छुय चॉनिस शारस  
 यारस पनुनिस पुशरुम पान



३७

## प्रोन पथ त्रॉविव

प्रोन पथ त्रॉविव नोव नेछिनाँविव  
 लोल बाँगुराँविव छाँविव पोश  
 पोशे बागुक्य गुल छिवु साँरी  
 मिलुच्चार थाँविव छाँविव पोश

ललि हुंघ वाख तय श्रुख नुंद रेश्यनी  
 तोह्य व्यछुनाँविव छाँविव पोश  
 व्वलुरुक बाडव डलुची रोनक  
 यिनु मँशिराँविव छाँविव पोश

अभिनव ममट कल्हन तु कैयट  
 तोह्य याद पाँविव छाँविव पोश  
 अँक्य सुंद आँगरुन बेयि सुंद बाँगरुन  
 यिनु गँजुराँविव छाँविव पोश

फुटरान बेकुल लुहरान नादान  
 तोह्य गरुनाँविव छाँविव पोश  
 साँनी वसमथ साँनी दौलथ  
 अथ पुशुराँविव छाँविव पोश

अथु रटि सुत्यन चलि गोट सोरुय  
प्रागाश प्रॉविव छॉविव पोश  
तोह्य छिवु ऑकुल तोह्य छिवु ऑलिम  
जोदथ हॉविव छॉविव पोश

कॅर्यनवु यॉरी त्वहि म्यॉन्य हॉरी  
अथु मिलनॉविव छॉविव पोश

**कुन्दन** चॉनी रुच रुच वॉनी  
बेयि बोज़नॉविव छॉविव पोश



३८

## बु फेरान बाज़रस छुस वानु वानय

(१)

बु फेरान बाज़रस छुस वानु वानय  
 मै गौमुच बतु फल्यन छम आनु मानय  
 रटान छुस छाय पनुनी वुछ मचर वुछ  
 दवस पतु यूत त्यूताह छम चलानय

(२)

गरज़ छुय प्रथ अँकिस येति वुनु वालान  
 करान खम कारि ख्वद-दौरी छु गालान  
 गरज़-मंद ख्वर छलान ह्वंगुन्यन करान थफ  
 ति ऑसिथ छुय पतव लाकन सु नालान

(३)

अबख छॉनुय प्योमुत येति राजदाने  
 तु लल छँन्य नँन्य स्व दियि क्याह नावि तारस  
 चु वनुहस म्वख्तु जोरमुत प्वख्तु कारन  
 मै बासान ओश छु टार्यन प्यठ बहारस

(४)

शुरिस सॉविथ कलस तल लूंय थॉवन  
 मछव म्वखु व्वडि हुंजुय तस पूच त्रॉवन  
 गॅछिथ कैह काल कॅरुनस प्यांपुरारय  
 कॅडिथ बब नालु किन्य तस आपुरॉवन

(५)

यि मा गव जान वोनुनस ओमुनि माजे  
 वॅछुस स्व ति योद करान छख कालु काजे  
 शुर्यव कॅर हर तु माजव टॅप्य कडय कॅर  
 गिंदान तिम द्राबि हुंदे गोरु माजे

(६)

मोजूरव पॅत्यलु लोग इस्टेशनस प्यठ  
 तिमन ऑस येति ति आमुच चायि हुंज ट्यठ  
 चॅलिथ यिम लारु की दारस दिवान प्युर  
 अमा कुनि वानु चलि ना म्यादुची स्यठ

(७)

'सरायाह छुय यि दुनिया' यी वनान काख  
 बबन वोन 'कारखानाह येति छु अख ब्याख'  
 मे वोनुमख हर्दुची छम वॉर येमि किन्य  
 कंड्यन प्यठ जामुनय बुलबुल दिवान चाख

(८)

वुछुन सुबहस कोहव पॅत्य किन्य खसान रव  
 येम्बुरजलि चेश्मनुय शबनम होखिथ गव  
 शबस ऑसिन नबुक्य तारख गँज़ुरमुत्य  
 छु ऑखुर मोहबतस हुस्नस कुनुय पव

(९)

चुकुट्य चामुत्य परिन्य गौमुत्य मे अंदुवंद  
 छि मा तानस अँकिस क्यथ बो ह्यमख ग्रंद  
 चु सुवहख चाख जिगरुक्य ब्याख कथ ऑस  
 दिवान तुर तुर वपर सुवनुक्य करान फंद

(१०)

म्वलुल म्वख्तय मे चेश्मन हुंद हँरिथ प्यव  
 दिचम क्रकु ह्युर होखुम तालस लँजिम ज्यव  
 लोदुर मा आम अथि पेयि डुंगि मे खारुन  
 अमा अज़ ताम सेज़ि ऑगुजे खोताह ग्यव

(११)

छुसन बो करु फल्यव सुत्य रंजुनावान  
 क्वठ्यन हुंद ह्यस अँछन हुंद गाश संतान  
 फवलान छम ब्बकु तु वॉलिंजि वँथ्य गछान बर  
 युथुय चॉपिथ मे वापस आपुरावान

(१२)

वुठस दूद फ्यरनु नालस बतु फॅली लॉर्य  
 हतो कावो व्वं छी ज़ुय मैड्य लगय पॉर्य  
 वन्योस माजे यि क्या बोज़्यस ति गव  
 अॅमिस छय मास आमूच गोब्य गॅमुत्य टॉर्य

(१३)

मे छोव अॅछ गाश पश्मीनस तु रफलस  
 लोगुम खम कारि वॅह्य खोब च़ाम पुशतस  
 थोवुम येछि सान ब्रॉह कनि गाशुदारस  
 र्वपुल दाह बूज़्यथय तस तालि खॅच़ नस

(१४)

दिवान ओस अख शुराह अख बतखनुय छग  
 हता दिग हा दियी थॅच माजि हॅट्य रग  
 बन्नॉविथ लोरि कुटनस गुर दवान शुर  
 तॅमिस गिंदु बाशि ज़न होति माजि डॅब्य दग

(१५)

छे होकुन चाँद्य योकुन छिम मे अरमान  
 हु छुम वॉलिंग रॅटिथ यि छुम अॅछ नाटु हावान  
 दपान छुस होर गछुहा योर मा वोतुस  
 व्वं गछुहा तूर्य नफ़सस छुस नु पोशान



(१६)

दप्योनम यि मो फुटरुन यि छुय वोंठ  
 मे मा मोनुस कोरुम ब्योन खोंट तय खोंट  
 छोचुय डचुंठुम मे अँम्यसुंद पान सोरुय  
 वुठन फश फश दिवान रुज़ ज़्यव तु होख चोंठ

(१७)

मे मा छुम राह राहस छम रॉश कुन थर  
 शनश्चर छुम बिहिथ ज़न तौर्य दिथ बर  
 मे ते आँखुर छि पँरमुच शारदा ज़्यव  
 बु ह्यमु व्वन्य कॉम कलुमस होख्य करख तर

(१८)

वछस तल दिल दिलस मंज़ जाय चॉनी  
 अँछन मंज़ लाल लालन छाय चॉनी  
 दिलुच दुबुराय चोनुय बास द्यावान  
 अँछन मंज़ रंग रुपुच जाय चॉनी

(१९)

प्रबातुक गाश चोनुय म्वख प्रज़लवुन  
 छु चोन आसुन डलुक पम्पोश प्वलुवुन  
 च्ववापोर सोंत चोनुय रुप तय रंग  
 मे छम मस्ती अमिच अथ क्याह छु म्वलवुन

(२०)

ख्यलव पेठ्य मे दिचुमय छाँड डलनुय  
 वोथुस सनिरन खोतुस बालन तु पलनुय  
 मे काँत्याह डीँठ्य स्वंदर त्रॉव्य पथ कुन  
 दिवान गोसय बु वॅन्य च़े सँदरुबलनुय

(२१)

मे छिम ख्वश यिवान शोख फॅल्यमुत्य गुलालय  
 कडाम्न मा जुहुन्य क्रुथ रटान मा मलालय  
 यिहय नारु छट ज़न यिमय खून मजनून  
 करान सासु बज़ु लॉलु छख दिल हवालया

(२२)

दिल छु येम्य सुंद सौन समंदर छुस गवाह  
 ब्द छि यस आकाश बोड तय बे-पनाह  
 छय नज़र सथ परदु च़ॅट्य च़ॅट्य यस पिलान  
 पाद छलुहोस आसि ना त्युथ आदुमाह

(२३)

यि कोर सान्यव ज़िठ्यव त्युतुय अगर असि कोर तु क्याह कोर  
 कोरय तमि निशि बतर त्यलि चॉर्य अँस्य पानस दगाह कोर  
 तेली गॅयि कथ अगर असि तँज कडुन्य वथ यथ जहानस  
 अगर बुतरॉच़ कोर जनत अगर प्रथ कांह गदा शाह कोर

(२४)

अँछन सोदा छु दीदाराह नजाराह  
 अथन सोदा छु दसबूस्याह कराराह  
 दिलन सोदा पकुन चोनुय तिरथ कुन  
 दिलन सोदा छवखाह यादाह तु याराह

(२५)

हँटिस हाँकल छुनुन्य छय सँहल आसान  
 हच्चन हथकैर्य छुनुन्य मुमकिन छि बासान  
 बु लगुहॉ पॉर्य चॉनिस ज़ोरु ज़बुरस  
 करख क्याह छुम खयालन हुंद मे तूफान

(२६)

शमाह दोद रॉत्य रातस ख्योन अनि गोट  
 सुबुह यामथ सपुद तस क्याह म्वच्च्योव लोट  
 छि यिम गाशस पथुय मारान पनुन पान  
 तिमन क्याह वाँस आसुन्य ज़ीठ या छोट

\* \* \*

३९

सॉन्य मयकश आयि अज़ सालस

सॉन्य मयकश आयि अज़ सालस  
कलुवालस पृछतु म्योन हाल  
कलुवालस टॉठिस लालस  
कलुवालस पृछतु म्योन हाल

कारि पॅत्य वोन दारितल लालस  
तला दिलुकुय वनतु अहवाल  
कांह ति वोतुय नु छ्वकुलद हालस  
कलुवालस पृछतु म्योन हाल

चेरु नॅम्य गॉम चेश्मु गुलालस  
मस मलुर्यन प्यव कुस शाल  
श्रोप्या शीशस किनु श्रेपि प्यालस  
कलुवालस पृछतु म्योन हाल

मीठ्य दिनि लोग ओबुराह बालस  
चे ति किथु कनि मॉरुथ छाल  
बु सॉ अज़मन खोरुस पांचालस  
कलुवालस पृछतु म्योन हाल

सीनु मुचरिथ वुछतु परगालस  
 ज़खन छुम वुनि सुय हाल  
 सुय प्यरन नॉल्य टूफोल नालस  
 कलवालस पृछतु म्योन हाल

यनु लोगुनस लोलु जंजालस  
 कनि फलिनय वुछुमस फाल  
 ह्युर होखुम तय ज़्यव लॅजिम तालस  
 कलवालस पृछतु म्योन हाल

प्रॉर्य प्रॉरी यीतिस कालस  
 मोठमुत छुम प्रोन खतु खाल  
 गाश सोर्योम अथु बो डालस  
 कलवालस पृछतु म्योन हाल

लोलन वोन जुल्फुकिस वालस  
 छोर आसुन छनु कांह गाल  
 नॉग्य राय क्याज़ि वोथ पातालस  
 कलवालस पृछतु म्योन हाल

जुव बु वंदुहा कुन्दन लालस  
कोस्तूरुन्य छस बोल चाल  
खिर तु खंड बो शेरस थालस  
कलुवालस पृछतु म्योन हाल

कलुवालस पथ बु जुव गालस  
कलुवालस पृछतु म्योन हाल



४०

## नाद लोय आबुशारव

नाद लोय आबुशारव व्वलु वेस्य  
 साल कोर शालुमारव व्वलु वेस्य  
 छिरुकोव फम्वारव व्वलु वेस्य  
 वथुरोव सब्जारव! व्वलु वेस्य

यनु कोर असि म्युल तु अथुवास  
 वुछनि लॅग्य असि लछ तय सास  
 व्वपरव योदवय द्युत नु असि बास  
 कथु करि जॉन्य कारव! व्वलु वेस्य

असि योछ यी ती मा सपुन्योव  
 गमु पतु गम असि च़ालुन प्योव  
 व्वन्य द्युत वाँलिंजि नोव आलव  
 कोताह काल प्रारव! व्वलु वेस्य

हुस्नस डीशिथ यॅच तडपान  
 लोलन आसिहे मोरमुत पान  
 आशन प्यठ कोर तॅम्य गुज़रान  
 दिल रोछ दिलदारव! व्वलु वेस्य

कुकिलव कोर कुल्य लंजि कू कू  
 पोशुनूलव कोर गूब्यंद गू  
 पोंपर्य कोर पानस फॅन्य फू  
 दित्य मा तॅम्य बारव ! व्वलु वेस्य

संगरमालन प्योव नोव गाश  
 येलि ज़न समयस वोथ परखाश  
 ग्रहनु लद सिर्यि छुनु असि बरदाश  
 गटि मंज़ गाश सारव ! व्वलु वेस्य

ड्यकु सुय दिमुये माह तय मीठ्य  
 अडुवति प्यठनुय मा अँस्य बीठ्य  
 पँद्य त्रावव व्वन्य वँल्य वँल्य ज़ीठ्य  
 ब्रौह कुन अँस्य लारव ! व्वलु वेस्य

असि येमिकुय शर ती प्रावव  
 लोलस लोलाह अँस्य बावव  
 वति वति नागु वानि तन नावव  
 हुस्नस बोश खारव ! व्वलु वेस्य

कुन्दन मा यियि लोलु निशि बाज़  
 तुलमुत तॅम्य छुय सनुवुन साज़  
 वौनमुत तस छुय अँदरिम राज़  
 अहरुबलु आबुशारव ! व्वलु वेस्य





४१

पोशि माल  
(महजूरस खराजे अक्रीदत)

राथ शामन स्वर्गसुय मॉरुम मे छाल  
श्वन्य करान ऑस वन्य, वज़ान ऑस मीठ ताल

शॉयिरन हुंज़ ऑस लॅजमुच महफिलाह  
ऑस ज़न ब्योन ब्योन रंगन हुंज़ पोशि माल

मीर ऑसुख लल तु सॉरी तंदलि ऑस्य  
सूफियानु ऑस ग्येवन अॅर्यनिमाल

तमि यि वोन छम यारु सुंजुय येति ति शय  
कर सना यी बालनुय लॅग्यमुत्य मे लाल

नूर दीनाह सूर मॅल्यथुय ड्यूठ मे  
तस अॅछन मंज़ सुय जमालाह सुय जलाल

ज़ूनि डेश्यम चूनि दामानस जॅरिथ  
क्वंगु टूर्यन हुंद मे पृछुनम वारु हाल

ऑस आज़ादस ड्यकस प्यठ फिक्र हिश  
क्या सना कॉशुर ति आस्या बा-जमाल

मीर मकबूलस वुछिम कोबुल्य दछ  
वुछनि लोगमुत यार सुंदय खदु खाल

मस्त ओस महमूद गॉमी रस लोगुम  
तॅम्य कलामाह बोज़ुनोवुस बे-ज़वाल

अॅशुकुनुय साज़ाह ह्यथन ओस रसुल मीर  
शाह बादुक सुय गज़ल गो बे-मिसाल

सूफियन लय दय स्वरान ऑस्य मायि सान  
शॉयिरन शय लोत रुवान ऑस्य म्वख्तु माल

कॉतिहन डीठम मे व्वपरन कुन नज़र  
कॉशिर्यन कोस्तूरनुय ईरॉन्य चाल

माजि हुंद ओसुख युहुय द्वाद प्राचि लोर  
याम वुछुहस लोलु वोलहम ताम नाल

इन्कलाबव बानु यिहुंदी पानु रँछ  
ज्रांह ति मशुना काँर्यगर यिथ्य प्रॉन्य क्राल

आलुथाह कँडुमख तु दित्यमख मीठ्य मे  
डॉल्य थँवमख ब्रोंठ कनि मे मेवु थाल

ग्राव कँरुमख ह्यथ चँलिव महजूर सोन  
ज्रानि दय वोनुवोस क्याह त्वहि ज्राल ताल

ताम वोथ महजूर अँस्य साँरी छि तँत्य  
योत यिनस मंज्र मीर कैह युद कैह फचाल

पोशनुय मंज्र गोशनुय मंज्र रोशि आँस्य  
सोन यावुन लाल सोन अज्रमुय छि बाल

शॉयिरन कोर पॉदु नसुलाह शूबुवुन  
मोथ वॉयिन नय तु तथ ज्रांह यी नु काल

सर मे नोमुरिथ वोन छु यी सथ, हक तु पोज्र  
वारि मंज्र महजूरनुय तुल अलु फाल

शॉयिरी हुंज़ वॉर तॅम्य ह्मवार वॅर  
लॉव दिचुनस लय तु द्युतुनस रुत खयाल

तॅथ्य छि वुन्यक्यन अॅस्य छकान रुत्य म्वख्तु पॅल्य  
युथ छु मूसिम तिछ दिवान छिस ब्यॉल्य चाल

अॅथ्य खसन असि अॅश्कु पेचान आशि हुंघ  
गाश फवलि व्वन्य वोत प्रारान कूत काल

कॉशिर्यन सॉराब करि सुय मस मोदुर  
ब्याख अद कुन्दन वुछख चु ति नेक फाल



४२

## लाल फोल

मे वुछ ऊतरु तमि ऊतरु बेयि राथ शामन  
शुराह अख मंगान पोंसु खासन तु आमन  
गंडान गुल्य रटान ख्वर रटान ओस दामन

करान विलुज्जोरी करान आह व ज्जोरी  
दियिव पोंसु कदुमन लगोवु पॉर्य पॉरी  
तु दस्तगीर म्योनुय कर्यव त्वहि ति यॉरी

तॅमिस नॉल्य कुरतन्य फ्यरन जोरु मा ओस  
ख्वरन तस ति पॉज़ार पुलहोर मा ओस  
बिहुन क्युत तॅमिस ख्वपरि अख पोर मा ओस

तॅमिस ज़ॅट ति कामुन्य तॅमिस मेट ति कामुन्य  
वुछान नारु तॅत्य वारु कुरतनि दामुन्य  
थकान पोंसु मँग्य मँग्य करान ओस ज़ामुन्य

सुबुह फोल तु क्वकरन दिचुय बांग यामथ  
तॅमिस नाल अथि मा ज़चन आव तामथ  
गछान छा अॅमिस तॉर छु वातान योतुय न्यथ

छ्यनान छिम अँमिस दूरिथुय पँक्य पँकी पँद्य  
 मे वॉलिंजि हालन अँम्य सुंद्य कँरिम गँद्य  
 तिथी यिथ्य अँमिस तल-पद्यन छी गँमत्य जँद्य

छलस ना बु बुथ अथु छलस ना बु अँछ कन  
 चलयस कालु तमुनुय नन्यस टॉठ र्वपु तन  
 बु डेशन स्वंदर-माल ह्यू कामु दिव ज़न

तिथुय युथ छु आसान ख्वनि ख्वनि ललुवमुत  
 गरुक खानु मोल लालु-फोल माजि रोछमुत  
 च्वंजव मंजलि तुलमुत तु दायव फिरुवमुत

यि छुम गुल वनन मंज छु युस पानु फोलमुत  
 जंडचव तय कंडचव युस छु अँद्य पँख्य ति वोलमुत  
 अमी किन्य बुथ्युक रंग अँमिस ज़न छु डोलमुत

यिवान आश अँम्यसुंद वुछान याम बु केशुन  
 गिंदान बालि शुर्य येलि मशान छुस यि बेछुन  
 व्वकान नरि तु जंगु याम ह्यवान बालि डेशुन

अँमिस लाल दोरान छि प्येदि सूत्य सूती  
गछान गोल चरि पोप करान यि ति छु कुती  
फवलान बक वुछान येलि गिंदान शुर्य छि कुती

तिथुय ह्यस प्यवान छुस तु बेछुन ह्यवान बेयि  
वुछान चूरि छेपि मॉल्य संज मा नजर पेयि  
अँमिस बय छु खूत्यन तलय जुव सु मा हेयि

अमी किन्य यि बेचारु बेछान छु हरदम  
नतय पोज च्चु बोजख अम्युक छुस स्यठाह गम  
यि जन पानु मोठमुत मे पानस खबर छम

यि नम माज म्योन्य अँमिस निश लग्या छ्यन  
मे अँम्य संद्य स्यठाह र्यन तु अँम्य संद्य छि बंदन  
गलान कलि छु अँम्य संजि ज्यत नार कुन्दन

युहय लाल फोल खानु मोल म्योन ति वुछतोन  
तला बद तु रद हालु येमि निश यि रँछतोन

जिगर गोश पम्पोश लेम्बि जन छु फोटमुत  
अँमिस हायि तय छायि दूद पान खोटमुत

मे वॉलिजि छ्वख छिम तु सीनस स्यठाह दग  
अँमिस नव बहारस बु दिमु खूनकुय सग



४३

## कनि मोजुरेन्य

कनि मोजुरेन्य हिश्य कांह मा वुछवोन  
कांह मा वुछवोन, ज़ांह मा वुछवोन

कनि मोजुरेन्य खसु तनि वछु त्रॉविथ  
फरि तलु आमच ह्यडुरस सॉविथ  
ह्यडुरस सॉविथ ऑफीम ख्यॉविथ  
बाम्बरि आमच रतु फेर्य चॉविथ  
सीनुक ऑरख वति छँकरावान  
कनि मोजुरेन्य हिश्य कांह मा वुछवोन

कनि मोजुरेनि हुंद युस छुय लोनुय  
सु ति ओस वक्ताह अकि नुंदबोनुय  
अर्कस तु खूनस म्युल करवोनुय  
म्युल करवोनुय ज़ी कुल प्रोनुय  
सुय दर-बिस्तर दम गँज़रावान  
कनि मोजुरेन्य हिश्य कांह मा वुछवोन



सु ति चोपमुत ओस येलि नादोरी  
 अमि नादोरी तु बेयि लाचोरी  
 करि क्याह पानस करि क्वसु योरी  
 बजि गरदोरी तु बेयि खानुदोरी  
 फलि फलि तँस्य कित्य फँल्य सोम्बुरावान  
 कनि मोज़ुरेन्य हिश्य कांह मा वुछवोन

कनि मोज़ुरेनि छुय बनि डेर खारुन  
 बनि डेर खारुन तु टोठ जुव गालुन  
 सितुमन लँजमुच जुलमाह चालुन  
 सम्सार ज़ोर येलि करि क्या नालुन  
 ड्वकुर्यव सुत्यन कनि फुटुरावान  
 कनि मोज़ुरेन्य हिश्य कांह मा वुछवोन

अखताबस ब्रौह हॉज़िर सपदिथ  
 ओंगुजन दालुव्य वेठ्य अदु खोरिथ  
 दिल छुस गरि तय वॉचुय लोरिथ  
 वॉचुय लोरिथ तु वति पँद्य सोरिथ  
 चलु लारि थँक्यमुत्य पँद्य वति त्रावान  
 कनि मोज़ुरेन्य हिश्य कांह मा वुछवोन

कनि फॅल्य फुटरिन वॅरिनख रेज़य  
 वॅरिनख रेज़य तु च़ोलुन तेज़य  
 च़चि फलिनुय छय तोति आवेज़य  
 सहि कुस ननि तनि प्यठ यिम नेज़य  
 बॉर्य व्यपरावान तु कॉर फुटरावान  
 कनि मोज़ुरेन्य हिश्य कांह मा वुछुवोन

कनि मोज़ुरेनि गँड्य गुल्य ठेकुदरसुय  
 तस ठेकुदरसुय तु नामावरसुय  
 फुटवॉटिस वनतम क्या करसुय  
 अमि सुत्य लगी मा वाठ यथ गरसुय  
 जुव जान च़ॅट्य च़ॅट्य फुटवोट प्रावान  
 कनि मोज़ुरेन्य हिश्य कांह मा वुछुवोन

यि ति छय बेनि तय यि ति छय मोजी  
 यि ति खानुदारेन्य यि ति खानुमोजी  
 फाकन शूब्या कालु तु कॉजी  
 कालु तु कॉजी सितुमव ज़ॉजी  
 वक्तुक्य हॉकिम यस मॅशुरावान  
 कनि मोज़ुरेन्य हिश्य कांह मा वुछुवोन

वक्तुक माने च़ारी बेनिये  
मेहनतकशु सुंज़ ह्यमुती रँनिये  
कोताह रोज़ख छँनिये नँनिये  
नँनिये ननिनुय करतल प्यनिये  
कवु छख च़ालान जुव सोचुरावान  
कनि मोज़ुरेन्य हिश्य कांह मा वुछवोन

दब दिथ अँड्यजन ओंगुजन सूराह  
सेकि मंज़ तकदीरस द्युन च़ूराह  
जिगरस च़ँड छम फवलि कर नूराह  
फवलि कर नूराह नोव दस्तूराह  
बोश असि खारान ड्यकु फवलुरावान  
कनि मोज़ुरेन्य हिश्य कांह मा वुछवोन



४४

## अथुवास

तिमय चेश्मु येति बालु यारन छि छारान  
 तिमय पेंद्य वतन तस छि छारान तु गारान  
 तिथय ज़ागि रूज़िथ छि लुख नव बहारन  
 तिमय नगमु गामन तिमय हुय शहारन  
 मे कुस छुम परुद, च़म तु नम छि मे सॉरी

तिथय कॅन्य शुर्यन माजि ख्यावन तु चावन  
 सियाह सर छि, सर-पोशनय सीर बावन  
 बेन्यन बॉय समखन लगन तिम छि ग्रावन  
 गॅछिथ यार यारस तसंज़ चिठ्य छु हावन  
 मे कुस छुम परुद, च़म तु नम छि मे सॉरी

मोजूरस मछन मंज़ तिछुय त्राय डीठुम  
 तु लूकन तिछुय अमनुची माय डीठुम  
 च़लान प्राणि ओबुरच स्व पर-छाय डीठुम  
 कुनी ग्रज़ कुनी क्रख तु गगराय डीठुम  
 मे कुस छुम परुद, च़म तु नम छि मे सॉरी

गुलालन तिमय दाग, चँद्रम ति छ्वकलद  
 तिथय कँन्य छि येति रुत्य तिथी ही छि येति बद  
 तिमय सॉन्य बुड्य बब तिमय सॉन्य बँड्य जद  
 तिथय कँन्य छु पेचानु छारान थोदुय कद  
 मे कुस छुम परुद, चम तु नम छि मे सॉरी

तिमय युप्य खसान यिम यिवान सानि वारे  
 तिथय कँन्य गँमुच अख बेयिस पथ छि तारे  
 स्वंदर माल मसवल स्वंदर वाँकु पारे  
 तु अक्लन तिथय कँन्य छि बेकल सवारे  
 मे कुस छुम परुद, चम तु नम छि मे सॉरी

जनूनन अंदर नव-जवानन वनुन क्या  
 तु अजमस अंदर बालु पानन वनुन क्या  
 तु कोर्यन कचन क्युत ति तानन वनुन क्या  
 तु पँछ्य लॉज्य मंज म्यजुबानन वनुन क्या  
 मे कुस छुम परुद, चम तु नम छि मे सॉरी

येतिक्य लुख ति काँशिर्य हिवी सेद्य तु सादय  
 तिथय कँन्य अँकिस कम बेयिस हुर ति ज़्यादय  
 सवाराह अँकिथ कुन अँकिथ कुन छु प्यादय  
 तिथय कँन्य छि बाक्य यिमन कृत्य वादय  
 मे कुस छुम परुद, चम तु नम छि मे सॉरी

यिम्न काम-गारन स्यठाह कामि कॅर्य कॅर्य  
 तु चेश्मन अंदर छख स्यठाह आशि बॅर्य बॅर्य  
 ह्यमत ज़ांह ति हॉरुख नु लॅस्य लॅस्य तु मॅर्य मॅर्य  
 ज़मानस छि पॉरान स्वंदर वस गॅर्य गॅर्य  
 मे कुस छुम परुद, च़म तु नम छि मे सॉरी

अमी किन्त्य यिम्न सुत्य छु अथुवास सोनुय  
 कुनुय सोन रोव तय कुनुय रास सोनुय  
 छु द्वह राथ सोनुय पहर मास सोनुय  
 कुनी ज़ॅन्य छि मा, लूकु अटहास सोनुय  
 मे कुस छुम परुद, च़म तु नम छि मे सॉरी

यिम्न कुन वुछिथ छुम हुरान नूर चेश्मन  
 यिम्न शूबि शाबश छि फवलरान तन मन  
 यिहुंज़ माय मोहबत छि नफरत ति गालन  
 यिहुंघ आसुनन पॉदु कॅर्य कुत्य कुन्दन  
 मे कुस छुम परुद, च़म तु नम छि मे सॉरी



४५

### शोक तु प्वनुसुन

थ्यकुर्वेन्य ब्रूठ्य आयि, शोक तु प्वनुसुन  
पॅत्य आयि ब्रूठ्य आयि, शोक तु प्वनुसुन

वदवन थक छा, बाक्य अख मा  
भानु बायि दर बायि, शोक तु प्वनुसुन

छायक बॅव्यनय, अँछ पूर थवनय  
रनु प्यव बे-वायि, शोक तु प्वनुसुन

दॅप्यतव राजस, सय दियि वाजस  
करि काहनाँव्य चायि, शोक तु प्वनुसुन

नाथु साँब केशन, ख्रेपि किन्य डेशन  
बाँचन छायि छायि, शोक तु प्वनुसुन

न्वशि हन म्यौनी, स्वनु म्वगुलौनी  
छम पोशि तुल डायि, शोक तु प्वनुसुन

नोकॅर्य ति नाथस, कॅट्य हन ति जायस  
न्वशि हन फ्रीच द्रायि, शोक तु प्वनुसुन

बुरज़य मेचि ह्यथ, कडुने आलथ  
मासु आयि प्वफु आयि, शोक तु प्वनुसुन

पँडितन गौड ना, बोड दसताराह  
वुछतन कमि आयि, शोक तु प्वनुसुन

बजि माजि गौडुनय, पूच तु तरंगय  
द्यदु नुय मंज़ चायि, शोक तु प्वनुसुन

ख्वनि ख्वनि ललुवन, कोछि कोछि फिरवन  
कुजि सानि म्यवु द्रायि, शोक तु प्वनुसुन

स्वंदर करुसय, वचुना परुसय  
रछिनस च्वंज़ु दायि, शोक तु प्वनुसुन

रुत रुत हाव्यम, रुम शेहलाव्यम  
आस्यम बडि पायि, शोक तु प्वनुसुन

नेत्रन नूराह, नोव दस्तूराह  
नोवरावि जायि जायि, शोक तु प्वनुसुन

ह्यथ दयि नावाह, गंडतस टेकिन्याह  
मदुसुदन बायि, शोक तु प्वनुसुन



कमि लोलु वुछुनस, तु रतु छेपि लगुनस  
माजि हुंजि अथ मायि, शोक तु प्वनुसुन

म्वम गोल चावनस, जुव वथुरावनस  
पूच थावनस छायाि, शोक तु प्वनुसुन

पॉरी लगुनस तु यॉरी मंगुनस  
पोत छायाि ब्रोंह ग्रायि, शोक तु प्वनुसुन

निकु सुंजि आयि ग्रायि, वदुनस त प्यांपुरायि  
माजि हुंजि ममतायि, शोक तु प्वनुसुन

**कुन्दन** चॉनी, रुच कया वॉनी  
ग्योवथम प्वत्रु ज़ायि, शोक तु प्वनुसुन

\*\*\*

४६

## गोश थव म्यान्यन कथन

लोलु मस की प्यालु बॅर्य बॅर्य लालु चावुन बॉलिये  
रोश मय अज़ गोश थव म्यान्यन कथन कुकॉलिये

डॉल्य ह्यथ यॅचकॉल्य आमुत छुय बरस तल नॉगराय  
हाय चलि अज़ वाय गलि अज़ बर मुन्नर ही मॉलिये

कॉसि हुंद ज़ांह केह वुछिथ योद ती चु मे ऑसुख मंगान  
यी वॅनिथ टालान ज़ि च़ठ कथ, यिम छि आसन वॉलिये

ग्रावु सारेय त्रावुनॉविथ, यी मंगख व्वन्य वाति ती  
खॉल्य माला, बुंगरि श्वनिदार बेयि कनन कनु वॉलिये

वॉसि हुंद्य हर कॉसि अरमान नेरनुक्य सामां सपुन्य  
वाद् सॉरी आदनुक्य व्वन्य पूर गछनख कॉलिये

अॅस्य तुलव व्वन्य ग्यूर जुल्मस अज़मुकुय रस फ्यूर व्वन्य  
अज़ च़टव हाँकल गॅरीबी हुंज़ गॅमुन्न योसु नॉलिये

हालुवन अथि वॉर ख्यावुन्य वन ति अॅस्य ज़ांह मा ज़ुरुव  
हालिवुय हालव दूहय पथ कुन ति मूलय गॉलिये

वारि साने गुल फवलन बुलबुल ग्यवन व्वन्य कुत्य काँल्य  
जल तु कस्तूर रंगु रंगय लोलु मँत्य यिन साँलिये

सोसुन्यार च्चलि योस्मनसुय गुल तु बुलबुल फाँफलन  
शबनमुक मस पोशि टूर्यन ह्यन फिरुन कलुवाँलिये

अश्कुपेचान म्यानि अरमानुक ति खसि अलमन स्यठाह  
जोति कुन्दन येम्य वुन्युक ताम नार तय गार च्चलिये



४७

## म्वख्तु

म्वख्तु छु शबनम वुर मा मालन  
 स्वंदर मालव तोर पनस मा ?  
 अटहोरा मा गोरनस काँसे ?  
 कनु वाजन, कनु दूरन खोत मा ?  
 येलि व्वपद्योव यिमनुय वॅथरन प्यठ  
 पोशन, टूर्यन बेयि पॅत्रन प्यठ  
 सुबहुक्य वावन छुन छॅकुराँविथ  
 मेच्चि मिलनाँविथ, लछि मंज त्राँविथ  
 यॅम्बुरजलि बोर पनप्रनिस फोतिसुय  
 वाँह्य सिरियन मा दिच्चनस फुरसथ !  
 पोशव जिगरुक वथरुन कोरहस  
 वावन दिच्चनस ब्रुंजा महलथ  
 पोशन हुंद यावुन नॅनिरोवुन  
 गिलुटूर्यन हुंज त्रेश मिटाँवुन  
 ब्रुंजा, च्युहा छे अँम्यसंज जिंदगी  
 म्वख्तु छु शबनम, म्वख्तु छु शबनम  
 म्वख्तु छु पां प्योर, साफ तु प्रोन प्रोन  
 ख्यलु वॅथरन प्यठ युस ज़न यीरान

नीजर तमिऴुय येम्य प्रऒुलुवुय  
 युस पम्पोशन ऑनु छु हावान  
 गाह छु कुनुय ऒोन, गाहे पंगत  
 यारन हुंऒ सब ख्यलप्रकेस सीनस  
 नालु रटान मँऒ्य बेयि बेयि फेरिनुय  
 दून फेरिनुय येलि अख फ्योर सपनान  
 ऒन तु छि दिल मेलान दिलदारन  
 ऒन तु च़लान छे दुय दून यारन  
 मंऒु छु प्यवान वँस्य डल वॉनिस मंऒ  
 अख छु बनान कुल, रावान बिलकुल  
 फिर्य फिर्य छुय ब्योन गँछ्य गँछ्य शॉमिल  
 अटु हारस मंऒु यि ति अख याराह  
 बुंऒा च्युहा छे अँम्यसंऒु ऒिंदगी  
 म्वख्तु छु पां फ्योर, म्वख्तु छु पां फ्योर

म्वख्तु छु अँश्य फ्योर, नून बोरुत सुय  
 चेश्मव किन्त्य युस बुकु बुकु नेरान  
 दारि वसान ओश, दारि अँछव किन्त्य  
 ऒन तु छु हारस टख दिनु आमुत  
 बुथ्य लबुवुय पेट्च प्राचन तामथ  
 दार लगान अँश्य दार वसान छय

हलमा ज़ांह मा दोरुस काँसे ?  
 हलमस मंज़ मा सोम्बुर व्यसुवय  
 जोर मा नालस दामानस ज़ांह  
 ओस गमुक या शॉदी हुंद ओश  
 अथ म्वख्तस गॅछ प्वख्तु नज़र कांह  
 वुछिहय जिगरक्य चाख यिमव ज़न  
 वुछिहय दिलुकी आख यिमव ज़न  
 अथ म्वख्तस अँश्य दारि ज़नम द्युत  
 ब्रुंजा च्युहा छि अँम्य संज़ ज़िंदगी  
 म्वख्तु छु अँश्य फ्योर, म्वख्तु छु अँश्य फ्योर  
 म्वख्तु छु पारुद, छूट छूट करवुन  
 युस मिलनोवुख शेंकराचारप्रचि श्रुच्चि मेत्त्रे मंज़  
 पूज़ करुन्य तस  
 युस ज़न लोलुक तडपुन काँपुन  
 युस ज़न वाँजि हुंज़ दुबरारय  
 तुर येमिस ज़न लँजमुन्न पानस  
 अलु अलु मदनस बदनस चामुत  
 युस ज़न वाँसन हुंज़ बेकराँरी  
 तुर्योमुत हुंदर्योमुत यावुन  
 थालन बॅर्यतोन या तोह्य रॅट्यतोन  
 मंज़ अथुसय प्यठ

तँम्य सुंज छूट छूट कम मा सपनान  
 तँम्य सुंद काँपुन रौंटे सपुद मा ?  
 च्युहा ब्रुंजा छे अँम्यसुंज ज़िंदगी  
 म्वख्तु छु पारुद, म्वख्तु छु पारुद

म्वख्तु छु म्वख्तय , क्याह छुस म्वलवुन  
 अँश्य फ्योर, पां फ्योर, पारुद शबनम  
 यथ रोयस मंज, तथ मंज स्वंदर  
 मँहलस मंज, छेयि पार्यन अंदर  
 म्वख्तु छु मेलान, म्वख्तु मय्यसर  
 तन तु मन तस साफ तु श्रूच्य  
 बदनस योद तस नज़राह त्रावख  
 डेशख ब्योन अख ब्याख जहानाह  
 वारु वुछक योद गाटुल्य चेशमव  
 फेरिसुय मंज डेशख तूफानाह  
 चिह्नसुय मंज छु बंद ज़मानाह  
 मलरि अँकिस मंज बोरमुत व्वलराह  
 अँक्यसुय सौंचस सौरी फलसफु  
 ज़ित्यनि अँकिस मंज नारु अलावाह  
 च्युहा ब्रुंजा छे अँम्यसुंज ज़िंदगी  
 म्वख्तु छु म्वख्तय, क्याह छुस म्वलवुन ?



४८

## शेछ नितम

बायि म्याने छायाि छाये सायिदारस शेछ नितम ।  
त्रायि कमि ताम ग्रायि मारान, आबशारस शेछ नितम ॥

पाद छलने परबतव प्यठु छूलु पानिक्य छिस वसान ।  
तँथ्य शहारस लालु ज़ारस, स्वरगु दारस शेछ नितम ॥

तिहरि प्यठुकी फेर्य प्यवान येलि पोशि वँथरन प्यठ छि ब्वन ।  
छ्यन लगान ज़न म्वख्तु हारस, प्वख्तु कारस शेछ नितम ॥

डल छु पम्पोशव बँरिथ तय ख्यल छि पारुद्य म्वख्तु ह्यथ ।  
डॉल्य क्या क्या छन मे थँवमुच्च, सोंतु जारस शेछ नितम ॥

वीरि वारन लोव ल्वकुचार आबुशारन ज़िंदगी ।  
वाँसि हुंद तजरुबु छु बोन्न्यन, बेद जारस शेछ नितम ॥

वाव सुबहुक ज़ाव बागस छारुने दिलदारसय ।  
व्वलसनस यिथ ख्वखशि द्रामुत, ल्वकुचारस शेछ नितम ॥



खूर तुल म्यान्यव रॅफीकव, आबु मलखन काँफ च्नाव ।  
मीठ्य दिनि यियि बोठ ति पानय, नावि तारस शेछ नितम ।।

मागप्रकिस तथ दबदबस असि डून्य फुटरॉव्य तालि प्यठ ।  
त्रापजार व्वन्य रोज़ि मा, तापस तु हारस शेछ नितम ।।

यारु संज़न चेश्मनुय हुंद मे ति छु चेश्मन मंज़ खुमार ।  
प्यालु बॅर्य बॅर्य चोवनस तॅम्य लोलु नारस शेछ नितम ।।

चेनुवन कुन्दन मे लॅज, पज़ि मा स्वखन लागुन कुनुन ।  
ह्यस मे येम्य द्युत तॅम्यसुंदिस तथ गाटुजारस शेछ नितम ।।

\*\*\*

४९

## दिवान कथ छुख बेयन निश म्यॉन्य बारव

दिवान कथ छुख बेयन निश म्यॉन्य बारव ।  
बु बदलोलुस मेहरबानव तु यारव ॥

छोलुतुय प्योम बॉथ येलि येलि वॉर्य वॉचुम ।  
दितुम मा ज़ांह ति बॉथाह म्वंजट हारव ॥

बे-ज़ान्यन क्या, तिमव विज़ि विज़ि बोरुम लोल ।  
अमा पोज़ काँपुनोलुस ज़ॉन्य कारव ॥

गरा शेहजार ज़न छुम नारु मनकल ।  
गरा ज़ोलुस बहारव आबुशारव ॥

र्वन्यन हुंद श्रवन्य गछान, तंबुलान छुम मन ।  
यि मा मँचुरोलुहस हारव तु द्यारव ॥

व्वलो बागस अन्नव, पोशन करव गँद्य ।  
व्वलो पेचानुनय अँस्य वॉकु पारव ॥

ओतामथ ओस्य गटि मंज गश छारान ।  
वैलिव गशस अंदर व्वन्य आश छारव ।।

यिमव सोवुस बु तिमवुय वुजुनोवुस ।  
खबर कोरुहम यि क्या बौतव तु शारव ।।

छु कुन कुन्दन तु अँद्य पँख्य फितनु वाराह ।  
कमन गोश दिथ कमन ओस्य सीनु दारव ।।



५०

### जवॉनी हिश रवॉनी आबुशारन

जवॉनी हिश रवॉनी आबुशारन  
अँछन मँस्ती यिवॉनी दोसदारन

यँबुरजल म्वख्तु फोट ह्यथ ब्रोंटु द्रायस  
दितुस म्यूठा ड्यकस अँम्य नव बहारन

थज़र दीनख कुल्यन खँत्य अँशकु पेचान  
थज़र तिमनुय नज़र थँज़ छख छि लारान

थँकिथ प्योमुत बुजर प्रथ कथ खरन छस  
कोडुस मा लोलु आलव ल्वकुचारन

कथन तहँज़न ति नेरी वाश योदवय  
कथन म्यान्यन सनन बेयि मानि चारन

छ्वकव सुत्यन दरेमुन्न तन छि सॉनी  
तमी बे-वायि ज़खमन सीनु दारन

सन्यर कोताह छु कुन्दन चानि वॉनी  
ब्रिज़िस मंज़ छुख समंदर फिकरि तारन

★ ★ ★

५१

## समयस ज़िठचव छु वोनमुत

समयस ज़िठचव छु वोनमुत चलुवुन छु वाव वैसिये  
वक्तुक ग्यवुन ग्यवुन छुय, नतु टाव टाव वैसिये

शायद छे छाय गटि हुंज व्वन्य काँपुवान खयालन  
नतु टूरिनय प्रबातस ओश क्याज़ि आव वैसिये

व्वशलुन बुथिस ग्वलाबस, सोसन छि योसमन थॅर  
कुस बे-अदब फेशुल कठ मंज़ बाग च़ाव वैसिये

रस्मव तु बेयि र्यवाजव खोटमुत पज़र तु ईश्वर  
येमि किन्त्य करान छु गॉफिल तस ग्राव ग्राव वैसिये

काँत्याह मरान ज़ि यॅच छुख, काँत्याह मरान छि छेन्य नॅन्य  
हाँसिल अँकिस छि न्यामथ, बेय च़ोल ताव वैसिये

यथ राँच मंज़ ति ताँजुब मा चोन ज़ून हिश युन  
काँदस अंदर न्यसुब शब श्री कृष्ण ज़ाव वैसिये

पम्पोश चेश्मु कूंजल, ड्यक् शीशु ज़न प्रज़लवुन  
असुवुन यि रोय डीशिथ चलि आमताव वेसिये

व्वलु पख च़ु बोनि शिहलिस, लोलुच कथाह करव कांह  
खसुवुन छु सोन यावुन लसुवुन छु चाव वेसिये

मॅस्ती मे छम तुफानन, छुस दोलु नाव त्रावान  
नतु छा सॅहल कथाह कॅह ह्योन चोन नाव वेसिये

**कुन्दन** छु लोलु मस चथ, शाबश तॅमिस छु हथ हथ  
लोलुक शराब येम्य चव, सुय माजि ज़ाव वेसिये



५२

## वुछिथ गुलि लालु अंदकुन

वुछिथ गुलि लालु अंदकुन हुंदर्योमुत ।  
 चे आसी नाव म्योनुय याद प्योमुत ।।  
 कोरुय येम्य बेकुलन यछि नाव ही थॅर ।  
 ज़ज़ुर चोनुय वुछिथ मा मंदछोमुत ।।  
 च़्चु फिर्य फिर्य अँछ वुछन छुख लालु मेय कुन ।  
 वनय क्याह हाल अँदर्युम यी मे गोमुत ।।  
 मे आँसुम ख्वय किताबन मीलि कलमस ।  
 मे थोवनम नफसनुय वँह्य ओम ज़ोमुत ।।  
 पलव च़ॅट्य च़ॅट्य जवॉनी द्रायि तस नँन्य ।  
 गॅरीबस छा बिचॉरिस कांह पच्योमुत ।।  
 छु युथ अंदकार पॉज़न नाव प्यव जल ।  
 बहारस रॉछ सुय येम्य माछ ख्योमुत ।।  
 मे कथ छुख हॉज बावन्य सोंथ हावन ।  
 मे छुम सतुवन्य क्वलन हुंद आब चोमुत ।।  
 छु कुन्दन युस वनान पज़रुच शैछा कांह ।  
 वनान छिस मोत छु च़ोर पहानथ मत्योमुत



५३

## कनन कनु वॉल्य स्वंदर

कनन कनु वॉल्य स्वंदर, पलव छिस नॉल्य स्वंदर  
 हॅटिस खसु माल लॉगिथ, तमिक्य छिस खॉल्य स्वंदर  
 मे वोनुमस मायि सानुय, छिहम ना बॉल्य स्वंदर  
 रटन बो नॉल्य नालय, अनन अज़ सॉल्य स्वंदर  
 बु छारन जायि जाये, वसस पातॉल्य स्वंदर  
 करस म्यूठा बु लालस, दप्यम छख लॉल्य स्वंदर  
 असुन मॉसुम वुठन प्यठ, तॅमिस क्या चॉल्य स्वंदर  
 अगर ओकचॉर्य मानन, तेली हाकॉल्य स्वंदर  
 यिमव लून खॉरु बोद फल, तिमय गॅयि हॉल्य स्वंदर  
 अड्यव शुर्य रॅछ ह्यडर ही, अड्यव कॅट्य पॉल्य स्वंदर  
 अगर शुर्य द्रायि गाटल्य, तेली छिय मॉल्य स्वंदर  
 वतन अछुवॅल्य अनंतनॉग्य, मटुन तय त्रॉल्य स्वंदर  
 असान आसान छु चॅद्र, खसान येलि बॉल्य स्वंदर  
 यिवान येलि सॉत वार्यन, लगान तेलि ऑल्य स्वंदर  
 गॅरिथ नक्शाह वुरूसी, छे पंजरन जॉल्य स्वंदर  
 येतिक्य चनु वॉल्य स्वंदर, ततिक्य कलु वॉल्य स्वंदर  
 ने-दोराह नाबुकाराह, वुछन ना कॉल्य स्वंदर



गुल्यन दिमुहख बु म्यूठा, यिमव अथु डॉल्य स्वंदर  
न रोज़स ज़ांह सर्वॉली, न नेरस खॉल्य स्वंदर  
तिमय दुश्मन छि बागुक्य, यिमव गुल गॉल्य स्वंदर  
परान कुन्दन छु बॉथाह, दिवान क्याह डॉल्य स्वंदर



५४

### मस चनु रोस्तुय मस्ती छम मे

मस चनु रोस्तुय मस्ती छम मे, मेति गँज़रिव मस्तानन मंज़ ।  
दिल छुम मोत गोमुत देवानय, जाय दियिव देवानन मंज़ ॥

वतनप्रचे ख्वशहॉली हुंघ कॉत्याह, सोपनु सजॉविम रॉन्न मंज़ ।  
सुबहप्रके यिनुकय अख अरमानाह, वुनि छुनु बानन सान्यन मंज़ ॥

बुतरॉन्न हुंघ खँत्य जंडु असमानन, वुनि छुनु बानन सान्यन वय ।  
चेश्मव किन्य असि डोट वसान गव, अख पयोर छुनु पैमानन मंज़ ॥

बेयि वँथ्य दीनुक्य तु दर्मुक्य फितनय, बेयि गव ब्योन अँलिफस निशि बे ।  
गोछ नु यि रावुन हॉसिल कोर युस, दशि थँव्य थँव्य असतानन मंज़ ॥

दज़वप्रनि मोम बति राहबर गँछ्य ना, गथ करुहँन लुख तिमनुय पथ ।  
यिम लेखुहोख जानानन मंज़ तय, हुम थवुहोख परवानन मंज़ ॥

साकी वोन्य हा मय मेचि मज़ ह्यू, पयमानन रुम, चांग्यन नु गाश ।  
म्वलुवुन्य तु फवलुवुन्य जिंदगी मा रुज़, बाक्य येति मैखानन मंज़ ॥

मेनुक्य तु तोलुक्य मीज़ान बदलेयि, बदलेयि पज़रुक्य तु अपज़िक्य रंग ।  
रॉयिज मा रुज़ नँव अज़ फरकाह, नाकारन बेयि जानन मंज़ ॥

ऑकुलन खँत्य बेकुल अटुबारे, त्रँक्य गँयि गाटुल्य प्रोवुख बोश ।  
हैवानन खोत कूत अलकाबय, लँग्य इनसान हयवानन मंज़ ॥

येम्य रोछ सुबहुक गाश तु मोसुम, पोशिक्य टूर्य तु ग्यवनुक सोज़ ।  
सुय इनसानाह सुय जानानाह, दुरदानाह दुरदानन मंज़ ॥

व्वन्य ल्वकुचारन नोव ह्योत सोंचुन, यावुन गव बुथ्य फ्युर ह्यू अज़ ।  
वक्तुच मंग बॉविव सुलतानन, शेछ कॅर्यतव ऐवानन मंज़ ॥

**कुन्दन** चान्यन शानन प्यठ छुय, मुल्कुक तु ज़गतुक बाराह गोब ।  
क्रख दि तु ग्रज़ तुल त्युथ लाय नादाह, बोज़न युथ असमानन मंज़ ॥



५५

## जेनि आँखुर म्यॉन्य सारँग्य

जेनि आँखुर म्यॉन्य सारँग्य साज़ तय सेतार म्योन ।  
जान गछिहे अँज्यकि प्यठनुय बोज़हख योद तार म्योन ॥

कँड्य खसन यथ वारि तथ वन दांद वॉयिथ नेरि क्या ।  
लोल बागस ब्योल वव अदु फचलि दिलुक वुजारु म्योन ॥

बूज़मुत छुम ब्रोंठ ओस गुलि लालु व्वज़लुय हेरि ब्वन ।  
वाय यनु प्यठ लोल बोर अँम्य तनु रोटुन अनहार म्योन ॥

छोव अँम्य कलु डुलु पलन सुत्य त्रोव मा अँम्य काँसि प्यठ ।  
शोकु कमि ताम ब्रोंह पकन गव जिंदुगी हुंद आरु म्योन ॥

ख्वश कोरुय पकनोवथस अज़ ख्वश कोरुय वति त्रोवथस ।  
आरु रोसत्यो अख लठाह ज़ांह वुछज़िहे व्यस्तार म्योन ॥

सारिवुय खोतु सोन कोरुथ युस छ्वख मे वॉलिंजि सुय रोछुम ।  
आश थॉवुम आर मा यी ज़ांह करख मा चारु म्योन ॥

चेश्म वंदुयो लालु म्यान्यो गाश वथरावय वतन ।  
यख्तियार छुय रछतु या अदु तछतु दिल दिलदारु म्योन ॥

ओस कुन्दन मायि वोलमुत छायि नीरिथ गव समय ।  
वॉर्य ख्यॉविथ तॉर्य थॉविथ छुम दपन कर चारु म्योन ॥



५६

## आव अज़ सोन

सोन आव सालस तु गरु सोन चावय  
 स्वख तय सावय आव अज़ सोन  
 वनि दामानस म्वख्तु तस छावय  
 स्वख तय सावय आव अज़ सोन

वॉछि वॉल्लिंजि तस शेछ बो बावय  
 कछि बो दिमुसो मोहबत प्रोन  
 यछि बो करु सो लछि बज़ु ग्रावय  
 स्वख तय सावय आव अज़ सोन

व्यसु येलि समुखन लोलु तु बावय  
 नोन नेरि नवि सरु सुय व्यसुतोन  
 मुचरनु यिन तिम बेयि दूद दावय  
 स्वख तय सावय आव अज़ सोन

चॅकरीशोरु पॅत्य चॅद्रमु ज़ावय  
 सॅम्यतव अॅस्य ति अज़ ख्वनि ललुवोन  
 छेत्य म्वख्तुव्य तस फेत्य अॅलुरावय  
 स्वख तय सावय आव अज़ सोन

अँद्य अँद्य लॅर तु जाय रचि रचि नावय  
चोंग दोद ज़ूरे मे ति आव म्योन  
दग ल्वति शेहलन मे ति आमु तावय  
स्वख तय सावय आव अज़ सोन

सुबहस पोशि मालु नॉल्य तस त्रावय  
शामस श्वंगवुन असुनावोन  
द्वहलि तस ऑलु नाबद बु आपुरावय  
स्वख तय सावय आव अज़ सोन

तस सुत्य सुत्यन कूत बो प्रावय  
फेकि कुय माज़ सुय मुश्कि चंदोन  
**कुन्दन** बु ति तस शार बोज़ुनावय  
स्वख तय सावय आव अज़ सोन



५७

## बागन मंज़ मुचरि अँछ गुलि लालव

बागन मंज़ मुचरि अँछ गुलि लालव  
 बालव पेठ्य हय सोंथ असि आव  
 वछि वॉलिंजि असि द्युत तस आलव  
 बालव पेठ्य हय सोंथ असि आव

वंदनुय जंदु लॉग्यमुत्य ऑस्य नॉली  
 ऑली ननि सानि तनि कॅर्यमुत्य  
 येमि किन्य अँछ आसु लॅजिमचु तालव  
 बालव पेठ्य हय सोंथ असि आव

गिंदुनस तु ग्यवुनस कति ओस वारुय  
 कॉरुय अथु मंज़ु व्यसुरेमुत्य  
 वॉन्य ओस वानन द्युतमुत फालव  
 बालव पेठ्य हय सोंथ असि आव

अँदरी अज़ ताम गोमुत असि च़स  
 वस ऑस चुहमुच़ नादॉरी  
 ऑखुर रंग होव सीनु परगालव  
 बालव पेठ्य हय सोंथ असि आव



सौतन बुलगार करनुक तुल दस  
 तस अँस्य रोज़व नालो नॉल्य  
 ल्वकचारुक्य सौर्य प्रन अँस्य पालव  
 बालव पेठ्य हय सौंथ असि आव

वावय शेछ ह्यथ आव असि कालय  
 सालय सौंथ याम बर तल वोत  
 गाह ह्योत त्रावुन संगरमालव  
 बालव पेठ्य हय सौंथ असि आव

सौनिस चमनस रंगु रंगु खोत बोश  
 ओश याम सौंथ तस आंगन चाव  
 गुलुवय दोप किथु दृह ग्यन्य चालव  
 बालव पेठ्य हय सौंथ असि आव

अथु डोल सौतन थौविन शीरिथ  
 नीरिथ आयि व्वन्य पनु बुबराय  
 मस बाँगुरोव नरगिसु क्यव प्यालव  
 बालव पेठ्य हय सौंथ असि आव

पोशि महारेनि बोश खोर स्वनु वस्तन  
 फ्रस्तन गौड शोकु फम्बु दसतार  
 व्वशलुन खोत याम दाग होव लालव  
 बालव पेठ्य हय सौंथ असि आव

गम ग्वसु व्वन्य लुख यस तस बावन  
 नावन डल कुन लॅज मानु मान  
 डूंगन बॅर्य बॅर्य नम तय गालव  
 बालव पेठच हय सोंथ असि आव

पां चादर वॅछ श्वन्य श्वन्य कॅरिथुय  
 हॅरिथुय दूख तय छॅलिथुय छ्वख  
 बुकु आयि बॅर्य बॅर्य छिकु तुजि नालव  
 बालव पेठच हय सोंथ असि आव

बामन अॅछ आयि मुचरनु कुलिनय  
 गुलनुय मॅस्ती तु क्याह चिकु चाव  
 यावुन तु सोंथ अॅस्य रथि हो खालव  
 बालव पेठच हय सोंथ असि आव

विरिक्योम फोल ट्येकु बटुन्यन छाये  
 माये यँबुरज़लि होव रोय  
 कन्दि दार चादर वॅज हीमालव  
 बालव पेठच हय सोंथ असि आव

बादाम वारे छावुनि फुलुये  
 सुलिये गॅयि लुख त्रॉविथ कार  
 वॉलिंजि गुल फवलु नोव शुर्य छालव  
 बालव पेठच हय सोंथ असि आव

आकाश रूढ प्यटु सरपोश सीरन  
 पीरन तु हरम्बखनुय कॅर रॉछ  
 लालव दोप अँस्य मशालि ज़ालव  
 बालव पेठ्य हय सोंथ असि आव

ज़मिनुय सॉन्य आयि सोंतस बागुनि  
 मागुनि दूर्यरु निशि म्वकुलेय  
 पोशि मुशखा नियि शर्तल द्रालव  
 बालव पेठ्य हय सोंथ असि आव

**कुन्दन** रटि कुत्य सोंतुक्य नामय  
 गामय प्यटु पॉगामय आय  
 तंग ओन सु ति द्दहदिशु क्यव सालव  
 बालव पेठ्य हय सोंथ असि आव



५८

## रिक्शा वोल

रिक्शा वोलाह - काँसि हुंद गोबुराह, काँसि हुंद मोलाह  
रिक्शा वोलाह - दिनि छुय लोगमुत सँदिज्यन ज़ोलाह

हलु कर, हसु कर, ह्यमुथाह समुथाह, खसुनस खसतो यॉरी मरदाह  
मछु मा लोसय गछु गछु कॅर्य कॅर्य, मँदिन्यन शामन लॅस्य लॅस्य मॅर्य मॅर्य  
नॉरन चान्यन लोगमुत चारो, सेतारन ज़न चार्यख तारो  
नीजर छुयि किनु सोसुन पानस, दग मा चॉनिस टॉठिस जानस  
चॉनी सदुमन कोरुनम होलाह, रिक्शा वोलाह

चै ति मा छय कांह मसवल प्रारान, चै ति मा मॉजाह वति वति छारान  
काका वॅन्य वॅन्य गोबुराह गारान, स्वनु कूराह मा ओश छय हारान  
यितुमो काको, हा बबु लालो, हटिके म्वख्तु तु मुनि फलि लालो  
बॅर्य बॅर्य थवुयो अशुकी प्यालो, कोत कुन लोगमुत मारान छालो  
मज़दूराह बेयि वॅमुल्याह होलाह, रिक्शा वोलाह

ज़ंगु मा दूदुरान सॉनिस लालस, गुलु क्या ज़ानी तस क्याह मालस  
लिथुवुनि द्रामुत तसुंदिस दालस, अथु छुय व्वथुरान कुरतनि नालस  
लालय डेश्यस कोलस गाल्यस, त्योंगुलव सुत्यन तन ताम ज़ाल्यस  
बरकरि लोग मा पोंसु ति ज़ेनान, वनतस गोय क्याह वतु छुख मेनान  
मन खंड दीतोस चनु तय छोलाह, रिक्शा वोलाह

अड रातन येलि गढ गॅयि बेदार, होटल टाकी सतु गॅज्य शिलवार  
रिन्द येलि गिंघ गिंघ वॅथ्य अति वापस, रिक्शा वोलाह छु लोगमुत शापस  
इनसानन क्यो हयवानन ह्यथ, सडुकन प्यठ छे अॅम्य संज वतु गथ  
कारस अटि खॅचमुच बेकॉरी, अक्लन रॅट्यथुय होट ज़न चॉरी  
तल गछू यारो लबि रोजू दोलाह, रिक्शा वोलाह

दिग्यने लोगुन वॅहरॉच रूदाह, त्रन त्रन ह्यथ गव यिति अज़ बूदाह  
मॅज़िलस वॉतिथ कुरतॅन्य चीरान, खयलु पेठ्य पानस पां फेर्य यीरान  
चादर बॉबिस रॅटसुय थॉवुन, मंज़लस मंज़ तस नैदुराह पॉवुन  
पानस गॅछ्यतन हेरि ब्वनु श्रानाह, ज़ोनुन बानाह यिति गव जानाह  
असि रोस कॅम्य सनु जुल्माह चोलाह, रिक्शा वोलाह

डबुलाह शामन दिन्य छस आगस, हारुनि ग्रेकि तय तुरनिस मागस  
चुनि रुख कॅरिथुय मोतस खेलान, वस ताम दॅज़मुच छुम यी तेलान  
इनसॉनियॅच येलि यिथ्य दाग आसन, आजॉदी हुंघ स्वछ कस बासन  
जोंग लॅग्यतन व्वन्य यिथ्यनुय कारन, तिलु सडुकन येति तलपॅघ लारन  
यॅड छस चोट तय नॉल्य छुस जोलाह, रिक्शा वोलाह

मछु अॅम्य संजु येलि वछु वछु करुनय, नॉरन कॉली वज़ि येलि स्वरुनय  
अॅछ त्रकुरॉविथ वुछि कलुवालस, स्योद नय मान्यस थफ दियि प्यालस  
इनसॉनियॅच हुंद खसि पेचानाह, नोन नेरि पज़ुराह रुत तय जानाह  
फ़ख त्रॉविथ अदु बु ति त्रावु शाहाह, यि ति मा कम कॅह यि ति ननि शाहाह  
बाज़स मंज़ येलि यिति दियि खोलाह, रिक्शा वोलाह



५९

## मुलाकात

टेलिफोनस प्यठ आलव द्युतुनम  
 आलव द्युतुनम लोलुक्य लालन  
 येछि तय पछि सान द्युतुमस कन मे  
 टूफॅल्य वॅथ्य गॉम सीनस नालन

टार्यन प्यठ मे सारुन्य हेतिनम  
 वेठ्य वेठ्य अॅश फेर्य पारुद्य फेर्य ज़न  
 दूर्यरसुय ओस पूर्यर गोमुत  
 मीलु बघन ओस शून्य मच्योमुत

फेकि पेठ्य माज़ खोतुम आवाज़ गॅयम यामथ  
 साज़ वज़न ज़न  
 नयि कुनि मंज़ अंदगाम कुनथ कांह  
 कोहु दामुन्य ज़न पोहुला अख म्वरली वायान  
 दिल वुज़ुनावान  
 यारस पनुनिस नादाह लायान

शोकन म्याँनी थनु प्यवुनुय, ख्वखजि लमुन ह्योत  
 काश कि पखु यिहन म्यान्यन फेकिनुय म्यान्यन शानन  
 वुफ निथ गछु हा, शोख परिंदा  
 यारस पनुनिस मँत्य करुहा बो  
 अकि फेकि बेयि फेकि गरदन लॉगिथ

वॉलिंजि हुंज़ दुबुराय हुरेयम  
 टुख निथ गछुहा शोख परिन्दा  
 यारस पनुनिस  
 बुथि बुथि वुछुहा

व्वशलुन मा गव कम गुलि लालस  
 अज़मुच रेह मा कम गँयि बालस  
 वुनि छा तिम अरमान बुथिस प्यठ खेलु करन तस  
 वुनि छा तस ज़ोतान इरादन हुंद व्वज़ुजाराह

वुनि छा दिल दुबुराय करन तस  
 ब्रॉह पकुनुच स्वय शेछ बावॉनी  
 तिछ मँस्ती तय तिछ शॉदी मा भरतस आसिहे  
 येलि ज़न रामु चँदुर वनु वासव पतु तस समख्यव

तिछ मॅस्ती तय तिछ शॉदी ह्यथ तस येलि समखय  
सौतस गछि अदु रंग वुछुन  
क्यथु प्रज़लान आसी  
अरुमानन यियि अंग नोवुय नोव  
बेयि प्वखुतन तिम सॉन्य इरादय

त्युथ समखुन मा नज़रि गोमुत ज़ांह  
चँद्रमसुय या तारक नबुसुय ?





६०  
नोव वॅरी

नवि वॅरियुक प्यव अज़ परतव तय, अज़ परतव तय  
तलय देदय चु ति व्वथ दानस प्यव तय, दानस प्यव तय

बे-फ़ुक रोन येम्य म्वख मा गँज़रिन, तस क्याह गँज़रुन  
वॅम्य ख्योव कोताह वॅम्य क्या ख्योव तय, दानस प्यव तय

ज़गतुक्य लुख गँयि ब्रोंह वुछ कौत्याह, वुछतख कौत्याह  
खाह मिलवन छय चु ति तुल दव तय, दानस प्यव तय

हरदस तु मागस क्युत छुय थावुन, प्रथ कांह ख्यावुन  
सौंतस मंज़ रुत रुत चु ति वव तय, दानस प्यव तय

तलय वन रामुन्य तु कृष्णुन्य गाथाह, कथाह तु बाथाह  
राक्षसन हुंज़ प्रॉन्य कथ बाथ थव तय, दानस प्यव तय

तलय तुल क्वछि तय, तलय कर हो हो, वाह वाह लो लो  
अडु कलिनय युथ ब्येयि यी ज़यव तय, दानस प्यव तय

हुतिक्यन तु येतिक्यन दूर्यर च़लि ना, क्रेर्यर च़लि ना  
स्वय क्वछ सौनी, सुय म्वमु चव तय, दानस प्यव तय

गटुकारस अज़ फ़टुतम गछि ना, दूर गम गछि ना  
रसु रसु अमनुक खोत नोव रव तय, दानस प्यव तय  
सुब्रहस वॅथ्यथुय देदि कॅर ऑही, रुच रुच ऑही  
कुलु क्यन गुलनुय ह्यथ फवल नव तय, दानस प्यव तय  
द्यु स्वय ऑही असि गटु कासे, ज़गुतस कासे  
तलय वेस्य संगुरन चु ति थव कव तय, ब्रुति थवु कव तय  
सोंतुक वाह वाह बादाम फुलयाह, रंगु रंगु फुलयाह  
कुन्दन साँबो बाँथाह ग्यव तय, वंदु मंदुछव तय



६१

## मुसाँफिर

म्यॉन्य हालथ तस मोज़ूर संज़ हिश  
 युस पडावस वॉतिथ नखु तल  
 शोकु पनुने बार गोब अटि ह्यथ  
 टुख निवान तय पौद तुलान जल जल

हॉर्य म्यॉन्यी च़ेर नॅम्य च़ेश्मन  
 मीठ्य दिनि छुस दोरान छम कल  
 च़ेर गॅछि मे योद म्यॉन्य हॉरी  
 दारि बरनुय थॅव्यज़ि नय हॉकल  
 अज़ पगाह या कौल्यक्यथ तामथ  
 वातवुन छुस प्रॉर्यज़्यम बर तल  
 च़ानि दिलची दुबु दुबुरारय  
 म्यानि कर्मुक छॅकरिथ अन्न ज़ल

योद च़े प्रारुन कूठ ह्यु बासी  
 च़ौर्य च़ौरी थॅव्यज़ि ब्यल मादल  
 क्याह छु तौजुब सफ़ुरस मंज़ ज़ांह  
 द्रींठ्य मा यियी शंकर सुंद पल  
 पूज़ि लागव तमिक्थन अछुरन  
 पम्पोश तय लोलक्य ही ब्यल

अदु प्रारुन कूठ मा बासी  
अदु लोलस वनि कुस हांचल  
येलि मंज़लुक शेहजार हॉसिल  
तेलि सफरुक्य कँड्य ताम कोमल

\* \* \*

६२

## खबर छय मा ?

खबर छय मा चु काँचाह टॉठ छख मे  
 मे ज़न वौनुमय नु वनुनुक छा ज़रूरथ  
 यि ज़न वक्तस यि गव नतु चॉन्य द्रुय छम  
 च़े नय अतलास तय ज़रबाफ ज़रु हय  
 मे ज़न वौनुमय नु वनुनुक छा ज़रूरथ

वसन येलि वारि मंज़ छख जामु लॉगिथ  
 अँकिस कूजस अंदर ही थँर छि व्वशुलन  
 वुछिथ यिम चानि वेछि वेछि चेश्म ज़ोराह  
 सरुक पम्पोश ब्वन कुन काँर नोमुरन  
 खबर छम चानि पकनुच त्राय डींशिथ  
 पकुन ह्योछ मस्त हँस्यत्यन राज़ु ह्योँजन  
 तिथय कँन्य चानि स्यज़रुक शोच़रुक रंग  
 छच़र लोब म्यानि वतनुक्य छेत्य ग्वलाबन  
 यि ज़न वक्तस यि गव नतु चॉन्य द्रुय छम  
 च़े नय अम्बार स्वनु सुँद्य वस गरुहय  
 मे ज़न वौनुमय नु वनुनुक छा ज़रूरथ ।

नन्यव मे चॉन्य ह्यमथ डीश येम्य येम्य  
 तिमव टेंगव ति बालन हुंद थज़र लोब  
 नन्यव मे चॉन्य दूख तय दौद्य डीशिथ  
 सुबहुक शबनम ति पोशन बार तय गोब  
 सरस सनिराह तु आरस बे-करॉरी  
 मच़र गिर्दाबसुय चोन हाल डीशिथ  
 मगर वख वोत फ्वलि चोन ड्यकृ ति वॅल्य वॅल्य  
 मे वोनुमय समयिकुय अज़ फाल डीशिथ  
 यि ज़न वक्तस यि गव नतु चॉन्य द्रुय छम  
 बु नय कम गीत ग्यवुहय बॉथ परुहय  
 मे ज़न वोनुमय नु वनुनुक छा ज़रूरथ ।

मे प्यव परतव तु हेत्य मे बॉथ लेखुन्य  
 मे बोर शब्दन अंदर चोन लोल च़ेनुन  
 थज़र बोज़ तय दिलस सनिराह च़े द्युतुथम  
 मे ह्योत येमि कायनातुक वॉत मेनुन  
 छु मुमकिन वक्त सपनी अज़ पगाह रुत  
 बजर डीशिथ यि चॉनी शानदॉरी  
 तमी किन्य छुम मे बासान सहल आसान  
 पज़र डीशिथ पज़र लबि पायदॉरी

यि ज़न वक्तस यि गव नतु चॉन्य द्रय छम  
बु कुन्दन चानि बापथ क्याह नु करुहय  
मे ज़न वौनुमय नु वनुनुक छा ज़रुरथ ।।



६३

## स्यज़र कोताह च़े छुय ?

चमन ज़ाराह तु फम्बाराह तु आराह  
 शिहिज बून्याह तु वनुकुय देवदाराह  
 मलख डलुकी, निशातुक आबुशाराह  
 संगर फॅल्यमुत्य तु शामुक तेज़ नाराह

स्यज़र कोताह च़े छुय डीशिथ यि सोरुय  
 पृछन छुख दोस कुस छुय यार कुस छुय

च़र्यन हुंद बोल बोशाह वारि म्याने  
 हिकट करवुनि थर्यन तल कोरि दाने  
 छकुर चाने वुच़न वनुवान साने  
 करान रोफ जायि जाये बोज़ लाने

स्यज़र कोताह च़े छुय बूज़िथ यि सोरुय  
 पृछन छुख बाँथ कम छी गीत कुस छुय

शुर्यन हुंज़ छाल तय फुटबालि खेलुन  
 अड्यन हुंद अख अँकिस ह्यडुना तु गेलुन  
 अड्यन हुंद पानुवॅन्य समखुन तु मेलुन  
 अँती तोशुन अँती रोशुन तु तेलुन



स्यज़र कोताह च़े छुय ज़ॉनिथ यि सोरुय  
पृछन छुख टोट कुस छुय प्योर कुस छुय

डबन प्यठ नक्श गीरन नक्शु गोरमुत  
हचन प्यठ त्वरकु छानन पोश कोरमुत  
यि शालस सुच़नि सुत्यन सोंत जोरमुत  
रंगा रंग पोट छॉविथ लोल बोरमुत

स्यज़र कोताह च़े छुय ऑसिथ यि सोरुय  
पृछन छुख शूब क्या छय नूर कुस छुय

वचुन छुम अँर्यनि हुंद ज़न पोश फवलवुन  
तु छोट छोट वाख़ ललि हुंद क्या छु म्वलवुन  
यि लोलुक बाँथ महजूरुन प्रज़लवुन  
तु कुन्दन गीत चोनुय विगनि वनुवुन

स्यज़र कोताह च़े छुय मॉज़िथ यि सोरुय  
पृछन छुख शान क्वसु छय मान कुस छुय  
स्यज़र कोताह च़े छुय अनज़ानु लालय  
यि सोरुय गाचि तय अनहारु म्याने  
अमी छम च़ेश्मनुय मंज़ यीच़ मँस्ती  
अमी छुस ज़िंदु रुज़िथ यारु म्याने



६४

## बु शॉयिर

बु शॉयिर, कॅवी, जान हुस्नुक व्पासक  
 ग्यवान गीत हुस्नुक्य वनान राज् अँश्कुन्य  
 व्वशान योद वुछान ओश अँछन प्यठ बहारस  
 जुवान आश डीशिथ तु प्रागाश डीशिथ  
 करान ज़ूनि हँज़ गथ यथ कायनातस  
 वुछान दाग लालस ह्यवान सीनु च़ेटुन  
 यँबरज़ल असान योद, खसान माज़ शानन  
 करान पूज़ प्रॉनिस तु तखलीक नविरुच

बु शॉयिर, कॅवी, जान हुस्नुक व्पासक

तुजिम मील कागज़ कलम ह्यथ अथस मंज़  
 दप्योम बॉथ लेखन रँस्युल म्यूठ कांछाह

मोदुर मांछ ह्योतमुत मँगिथ ताज़ु पोशन  
 तु पेडान प्रगाशाह, प्रबातुक नवीदाह  
 नव्यर ज़न तु सौंतुक, नतय ल्वकुचारुक  
 रवॉनी यिथ्यन आसि पां च़ादुरन हुंज़  
 येमिक्य शब्द आसन स्वंदर दॉन फँल्य हिब्य  
 तु माने म्वलुल म्वख्तु ज़न हाँगिन्यन मंज़  
 दप्योम बॉथ लेखन रस्युल म्यूठ कांछाह

सुबहुक वाव डलवुन तु शबनम ति ज़लवुन  
 यछोम नालु रटहन बु गेव्य गेव्य तु नॅच्य नॅच्य  
 दप्योम सौंथ अनुहन बु सालस यपौरी  
 गुलव सान बुलबुल ह्यथन बाशि करवुन  
 तु शब्दन अंदर लोलु अनुहन बु मौंसुम  
 तिहुंज माय मोहबथ, असुनाह तु गिंदुनाह  
 दप्योम पेश करहन बु नज़ुमन अंदर अज़

दप्योम साज़ु संतूरची तारु चौरिथ  
 ग्यवन बौतुकी ताज़ु सामानु करुहा  
 शकार्येच तु ग्रावन ज्यवाह पूरु अनुहा  
 व्वमेज़न तु आशन हुंदिस ऑनु पॅटिसुय  
 गर्द साफु कॅरिथुय शक्ल वारु वुछुहा  
 तु बौथाह बु ल्यखुहा जवान जोशि बोरतुय  
 च्ववापोर अज़मुक्य दज़न च़ाँग्य सौरी  
 तु सौरी दपन अँथ्य दपन दीपु माला  
 ग्यवन गीतुकुय ताज़ु सामानु करुहा

छु क्या गम छु योदुवय स्यठाह पेश मुशिकल  
 कॅमी योद छि आशक परन वालिनुय हुंज  
 स्वराह ज़ांह बु लेखुन गज़ल वोरु ज़ेवि मंज़  
 मे नय पनुनि ज़ेवि हँदय ति शोकीन मेलन

शहन हुंज़ मे खसवस योतथ ताम पोशम  
 ग्यवान गछु पनुन बाँथ पानय च्वपॉरी  
 सुबहुक शेंख ह्यू ग्रज़ बु तुलु प्रथ गरस मंज़  
 कनन मा थवन थॅप्य, पेयख बोज़नुय अज़  
 कॅमी योद छि आशक परन वालिनय हुंज़

बु ओसुस यि सौंचन तिथुय आयि ब्रोंह कुन  
 मे दोपुनम थवी आय, अख करतु कॉमाह  
 कलम छुय अथस मंज़ तु कागज़ ति ब्रोंह कनि  
 चु निख ना बनाँविथ बजट खरचिकुय अज़  
 वुछव क्या म्वच्यस क्या फल्यस क्या छ्वन्यस अज़  
 हरन मा ज़ु या त्र बन्यस मा गुंजॉयिश  
 दप्योम पानुसुय किच अनख अख कॅमीज़ाह  
 रुनेमचु छि सार्यय फेक्यन प्यठ हॅचिस निश  
 चु निख ना बनाँविथ बजट खरचिकुय अज़

शॅरीरस कोडुम वाश, ब्यूतुस हना स्योद  
 र्यतुक ह्योत बजट कागज़स प्यठ मे सावुन  
 तलब शांद थोवुमस वुरुन खरचिकुय ह्यथ  
 हिसाबाह लगोवुम मे होंजुक तु रादुक  
 ह्यवान लमु कलस कुन तु रोज़ान नॅनी ख्वर  
 दिवान द्रसु ख्वरन कुन तु रोज़ान नॅनी व्वड

पनुन्य किन्य थवेमस मे चौरिथ तनाबय  
मचर वोथ द्यमागस हुरान गव अज़ाबय

र्यतुक ह्योत बजट कागज़स प्यठ मे सावुन  
अमी किन्य दूहय खद दिलस तय द्यमागस  
यिमन कागज़न प्यठ नज़्म शूबहन रुत्य  
तिमन प्यठ छि तलबुच तु खरचुच जफा जेप्य

अमा पोज़ बु शौरिथ, परस्तार हुस्तुक  
दप्योम बॉथ ल्यखुहा रँस्युल म्यूठ कांछा  
दप्योम पेश करुहन बु नज़्मन अंदर अज़  
ग्यवन गीतुकुय ताज़ु सामानु करुहा

मगर ह्योत बजट कागज़स प्यठ मे सावुन  
अमी किन्य दूहय खद दिलस तय द्यमागस ।।



६५

## बजर इनसानु सुंद

सखर लॅज जिंदुगी ह्योत पान हावुन  
हवस सपनुस जहानुक बोश वुछि हा

सुसर सेयि लॅज जलस जलजल तुथुय आव  
हवावस तुर खॅच जॅम्नस दुनन गॅय  
ग्वडन्य पॉनिस अंदर तव पतु बॅटिस प्यठ  
गॅछिथ समयाह वुडव लोग आस्मॉनी

यिथय कॅन्य जिंदुगी हुंद क्रम चलान गव  
कमव शकलव कमव मुरचव ज़नम ह्योत  
कमव मॅजिलव पडावव कुस सफर कोर  
व्वटल छांटल चु-पंजल आयि ज़नुमस  
पॅतिस लाकन ज़नम ह्योत अदु मनोशन

अमा पोज़ अस मनोशस नव जवानस  
खसुन सनिरन वसुन व्वगुन्यारुनय प्यव  
अॅमिस पेयि क्वदुरतस सुत्यन करुन्य लड  
अॅमिस पेयि क्वदुरतस हावुन्य पनुन्य मछ

अँगुन ज़्योवरुन तु छेवरुन नार चोपुन  
 कोरुन शेस्तुर ति कोबू कॉम हेचुनस  
 बनाव्यन मकृच तीरो डाल खंजर  
 सुहन सुत्यन कॅरुन लडु पान वुठनक  
 खँसिथ गरदनि यिमन त्रोवुन गुगूसा  
 खँसिथ थॅर प्यठ यिमन आव सॉर कॅर्य कॅर्य  
 खाहन वॉलिन तु केंचन ज़ीन कोरुनख  
 अड्यन दूद ह्यथ अड्यन प्यठ बोर सोरुन  
 जॅमीनस दांद वॉयिन ब्योल वोवुनस  
 कमन बंजुरन बनोवुन बागि जनथ  
 सथुर खोरुन कॅरुन तथ जोरु कपटन  
 वॅवुन अन्नू म्वठ कोरुन पानस व्वदुर पुर  
 कुल्यन हुंघ म्यवु चॉपिन साद वुछनख  
 क्वलन हुंद आब चथ शेहजार छेवुन

यिथय कॅन्य वक्तु वक्तय बख्त बदलुन  
 हुरान गोस नज़रि हुंद बोड आरु क्वंडुल  
 हगुर गोर तँम्य तु लोग गॅर्यन्यन नोवुय ग्वड  
 थखुय मा लोग वुन्युक तामथ चिहिस ज़ांह  
 गरुन्य कौंचाह सपुज़ कम चीज़ व्वपदेयि

गरी बीह बीह जहानुक सॉर सपनान  
 नबस खँस्यतव तु तारक यार कॅर्यतोख  
 वॅसिथ सोदुरन चक्कुक ताम हाल वुछतव  
 गरज़ सरपोश गॅयि सीरन व्वथान थोद  
 नव्यर सोंतस बजर लोग ज़िंदुगॉनी  
 ल्वकट्च बॅड्य गॅयि, बड्यव लॅब जाविदॉनी

बजर ओस मनशु सुंदुय पूज़ि लायक  
 अमा पोज़ चानि द्रुह छम काँपुनावान

बु छुस ज़ानान पेयी होकुन नज़र व्वन्य  
 येत्यन मोतुक्य छि नॅव्य सामानु सपनान  
 दपान आसख, मचर कुस आव मनशस  
 यि कथ नॉरस ह्योतुन तस जुव अचुन व्वन्य

यपॉर्य ह्य ज़िंदुगी नॅव्य साज़ लागान  
 हुपॉर्य कवु मोतुसुय आवाज़ लायान  
 यपॉर्य किन्य सोंतु वावस शानु कॅर्यनय  
 हुपॉर्य कवु ज़हरका यिम प्यालु बॅर्यनय



लदावुक यूत ज़न वेख़चार होवुन  
तिथुय ह्यू लूहरनुक रफ़तार त्रुवुन  
कॅरिन अँड्य कार सेद्य तय अँड्य कॅरिन हँल्य  
यि नय करिहे बु चमहस खोर छँल्य छँल्य

\*\*\*

६६

## जवॉहिर लाल

गुल छि आसान कुत्य तय गुलज़ार आसान खाल कांह  
दिल छु आसान सारिनय दिलदार आसान खाल कांह

कूत्य रहबर डींठ्य अज़ ताम बेयि ति डेशोख ब्रोंट कुन  
लूकू मँत्यसुय सुत्य म्युल यकबार आसान खाल कांह

सथ समंदर छँड्य तु येम्य सतुवन्य क्वलन हुंद आब चव  
तोति रूद युस ताज़ु सुय ल्वकूचार आसान खाल कांह

कथ यसुंज़ प्रथ कांह मसल तय वथ यसुंज़ प्रथ काँसि रँट  
त्युथ यज़थ बेयि त्यूत बोड दसतार आसान खाल खांह

येम्य ग्वलॉमी दूर कॅर इनसानियतुकुय हक बुलंद  
सुय पज़र वरतावुन अवतार आसान खाल कांह

छल कपट या ज़ाल ताल मा ज़ानिहे पज़रुक पुज़ौर्य  
प्रथ अँकिस येम्य वातनोव शेहजार, आसान खाल कांह

वतनुकुय हुब ओस तस ज़गतुक ति ओसुस श्रेह स्यठाह  
नाल दिवनोव दुस्त यँम्य संसार आसान खाल कांह

लय तँमिस ऑस मॉसुमन सुत्यन ग्वलाबुक्य टूर्य टॉठ्य  
लूबुवुन वय शूबुवुन गुप्तार आसान खाल कांह

येम्य वतन गँजरोव जुव तय पान गँजरोवुन वतन  
सारिनय हुंद ओस यस अमार आसान खाल कांह

इतिहासुच साईन्सुच प्रथ अँलिमुची तस ज्ञान ऑस  
लेखनस मंज्र भानु भटुनुय यार आसान खाल कांह

मोतुकुय मा रछ गुमान पँत्यमिस चिहिस ताम ओस तस  
जिंदुगी हुंद युथ अलमबरदार आसान खाल कांह

लछ वँरी तेय पोशिहे सुय तोति ऑसुस वाँस कम  
गाठ ख्वसु ज़न वाति ऑखुर खार आसान खाल कांह

सतु रेश्यन हुंद्य सथ सिफत यकजा सँमिथ अँक्यसुय अंदर  
त्युथ जवॉहिर लाल ह्यू किरदार आसान खाल कांह

गँयि पशेमान तिम ति कुन्दन ऑस्य यिम तस कूठ कडान  
सीरुनुय सरपोश त्युथ सरदार आसान खाल कांह



६७

## ल्वकुचार

क्या सना यी ना सना ल्वकुचार पोत ?  
नव बहारुक यार मॉसुम मायि मोत

वतनि गुर यथ प्यठ गॅयम पकनुच मै ज्ञान  
लोरि कुटनस गुर बनावुन शानु सान  
टिकु वावुज ह्यथ करुन्य दवि मानु मान  
वुठु फल्यन प्यठ ओस असुनाह ज्ञन फवलान  
ज्ञून गाशाह जुचु खना या पोशि फोत  
क्या सना यी ना सना ल्वकुचार पोत ?

शीनु बगुवानाह बनोव मंज आंगुनस  
क्या वनस रेय वैर्यतनस फटु वांगुनस  
वुछ तु हुंदरेस कन तु तुरेयस यि नस  
लारि तस ज्ञन छुय यिवान पतु चोप ह्यनस  
कांगुर्यव वुशनोवमुत सुय लेफि गोत  
क्या सना यी ना सना ल्वकुचार पोत ?

ज़ोजि वोलमुत ग्रिश्मु कोरमुत पूचि वाव  
 पछि तु यछि कोरमुत येमिस निकु लाल नाव  
 शानु व्वगुनेस पानु यनु ज़न कृष्ण ज़ाव  
 आपुरावान बतु करान छस कावु काव  
 माजि ह्योतमुत क्वछि अंदर सुय नैदरि होत  
 क्या सना यी ना सना ल्वकुचार पोत ?

शीनु रज़नुय दूज तय जुज़दानु ह्यथ  
 ब्वछि हँतिस क्रपु हाख तय बतु गूज्य ख्यथ  
 वारि मुठ्य खोसा नतय शीर्य चाय चथ  
 ल्वकुचारस मंज़ कसुंज़ ऑसुम मे सथ  
 म्यानि देदि हुंद शालु फाह बैयि नालु मोत  
 क्या सना यी ना सना ल्वकुचार पोत ?

ल्वकुचाराह ज़ाव संगुरन गाश ज़न  
 च़रि बचन द्राव फम्बु फेकिनुय वाश ज़न  
 ज़्यवुनुय चँद्राह योहय अख काश ज़न  
 फ्यूरमुत गुहदाह यिहय रुच़ राश ज़न  
 पूर्य किन्य ज़न नूरि नूरान सिर्यि खोत  
 क्या सना यी ना सना ल्वकुचार पोत ?

ल्वकुचारस पॉर्य लगुहॉ नावसुय  
 लोल बॅर्यतिस म्वललिस शुर्य बावसुय  
 बे गमस, बे फिक्रसुय, तस वावसुय  
 ऑविलिस तय जॉविलिस चिकु चावसुय  
 ऑगजि पुचनिथ गॅर्यबिन्यव ज़न यँदुर कोत  
 क्या सना यी ना सना ल्वकुचार पोत ?

ख्वखशि करवुन गूकलुक नंद लाल सुय  
 सतु रेश्यन निश द्राव परबतु फाल सुय  
 आश दिलुची बेयि अँछन हुंद लाल सुय  
 वाय रटहन लोल नॉली नाल सुय  
 लोलु मच्चि माजे छु बासान ह्योत तु द्योत  
 क्या सना यी ना सना ल्वकुचार पोत ?

क्या सना यी ना सना, यी मा मगर  
 तोति हय पोशिहे मे सुय श्रोचर स्यज़र  
 ल्वकुचारुक्य पॉठ्य आसुन बे खबर  
 बालु पानुच मीठ स्वय मॉसुम नज़र  
 लालु फोल कुन्दन डलुक पम्पोश छोट  
 क्या सना यी ना सना ल्वकुचार पोत ?



६८

## पोज़, रुत तु स्वंदर

(पोज़)

फोतु फोल ह्यू ब्यॉल्य फोल  
जूर्य यथ मंज़ दालि फॅल्य  
वछ वछस सृत्यन रॅलिथ  
ज़िंदगी हुंद वेर नाग  
कानुजा ऑविज पिशिज  
उल्फतुक आलम मोदुर  
द्यल वॅलिथ सीरन वुरुन  
जामुसुय छुस सूप्य रंग  
शोख लोलस रोय छोट  
मोहबतुक आलम खॅटिथ

अख अजूबा छुय मत्यो  
ब्यालि फलिकुय कारुबार  
अथ अंदर सम्सार बंद  
अथ अंदर छुय तेज़ नार  
चूरि अथ मंज़ सब्ज़ु ज़ार  
अॅथ्य अंदर कुल सायिदार

रेश्य वनान अथ अख तु कुल  
 ब्यॉल्य फॅलिसुय मंज छु गुल  
 अज़ वुछख गॅयि अँछ सफल  
 काँल्य योद डेशख तु क्या  
 लोलु म्याने अँछ मुचर  
 यी छु हक तय यी पज़र

(रुत)

काँल्य नेरन म्येवु फल  
 फल मोदुर्य रसदार मीठ्य  
 फल रँसिल्य मज़दार मीठ्य  
 रस येम्युक चरनामृत  
 त्रेशि हतिनुय खॉस्य मस  
 ब्वछि हत्यन किच न्यामथाह

कुल्य खसन कम सायिदार  
 वँथरुनस कम सब्ज़जार  
 थँक्यमुत्यन शेहजार दिन  
 गुमु हत्यन वावाह करन  
 थॉथुरेमुत्य थख कडन  
 लूस्यमुत्य प्रावन जिलव



दूरि सफरुक फ़ख च़ल्यख  
 मँज़िलन हुंद पय लबन  
 श्रोकन्यारुक ज़ंग च़ल्यख  
 ल्वक़चारुक रंग लग्यख  
 बोनि शेहजाराह शुहुल  
 नागुबल कुय पोन्य श्रूच  
 रुत मोहबत बाँगराव  
 आस रुत तय बास रुत  
 लोलु म्याने अँछ मुच़र  
 आलमस क्युत यी रुच़र

(स्वंदर)

पोशि वार्यन बोश रुत  
 टूर्य फँल्यमुत्य रोश नोव  
 रंग व्वज़ल्य मखमँल्य ग्वलॉब्ब  
 योस्मन, विरि क्योम तु ही  
 जोशु आमुत्य जामु पॉर्य  
 नूर फोत ज़न पोशि डॉल्य

हुस्तुकुय बाज़र सँजिथ  
 नूर अंबाराह लँगिथ

शोलुवन्य महारेन्य वुछान  
 शूबुन महाराजु मौद  
 ही छे व्वशुलान परदु तौल्य  
 जाफरिस शूबान गौद  
 ब्यल तु ख्यल नीजर अँछन  
 ज़िंदुगी पम्पोश फोल  
 रंग रोयुक जोट च्वपौर्य  
 क्वदरतुक हुस्नाह म्वलुल  
 बेद मुश्कन हुंज़ स्वगंद  
 अँत्रि छिरकावाह करान  
 नूर नेत्रन क्युत वफूर  
 मुश्क हरनन नाफु ज़न  
 लोलु म्याने अँछ मुच़र  
 वुछतु आलम क्याह स्वंदर

पोज़ तु रुत स्वंदर रँलिथ  
 ज़िंदुगी मेछर बरान  
 तेलि छु कुन्दन सुबु दमस  
 मायि होत बाँथाह परान



६९

## सौदरुक लाल

मुबारक छु अज़ जिंदगी ज़्यून ज़ॉहिर  
मुबारक छु अज़ मोतसुय फ़ूर मोतुन

युथुय अँछ मे मुचर्यम कुल्यन द्रायि बामन  
हेतिन पोशि दूर्य पोश सपनुन्य च्ववापोर  
लयव काल कुठर्यन ह्योतुन गाश वातुन  
तु आल्यन अंदर जानुवारव चिरिव तुल

दोपुख रेडियो खबरनुय मंज़ मुबारक  
ज़ि सौदरुक हसॉ लाल अथि आव ऑखुर

दपान, ओस जवानाह तवानाह बहोदुर  
तँमी दोप बु करु मान समंदर्य शिकार्यन  
वुछव नाव कँम्य संज़ मँज़िल प्रावि ग्वडुन्यथ  
वुछव तार कुस लबि सौदुरस ब्रुंज़िस मंज़

यरादाह कोरुन द्राव मुल्खन मुकाबल  
समंदर छौडुन सीनु द्युत तँम्य तुफानन  
अमा पोज़ छु जिंदगी दूहय मोत लारान  
यिमन दून लडॉया छि पतु वथ चलॉनी

अँमिस वाव फोर ज़न तु विजि वाव व्वलुरुक  
कजन पाशि पटसुय तु ह्मत्तुल ति फुटरुन

जवॉनी मगर आशि हुंद च्रोंग दज़ुवुन  
अलम ज़िंदगी हुंज़ अथन मंज़ मशॉल्या  
तिथुय नावि गॅयि छलु शुन्या ताम काँप्योव  
खबर क्वसु छला तँम्य ति रँट यीरु साँपुन

दपान ज़िंदगी हुंज़ अलम थँज़ अथस क्यथ  
पुशुर पान तँम्य आशि हुंदिनुय जहाज़न

खबर कस छि कर वाति शेछ म्यानि लोलुच  
खबर हंगु तु मंगु मा मे बंद बाँय वातन  
खबर म्यॉन्य कल मा कर्यख बे-कराँरी  
सुसर मा लग्यख सीनु शेहजार राव्यख  
ग्रक्यख खून रगनुय मछन माज़ फोर्यख

अँती ओस साँचान तडपान तु काँपान  
'फरुन गोछ नु मोथुय मे यथ सागुरस मंज़'  
अँती प्योस ह्यस लोलु सुंज़ याद आयस  
स्व विज़, येलि वन्योमस 'मे मा साँथ पोशम

हरुद कालु रोज्या युथुय रंग चें लोलस'  
 मगर लोलु वार्यन हरुद छा यिवान ज़ांह  
 अमा आशि हुंदि चांगिकुय गाश पोशा  
 दर्या ज़िंदगी हुंज मशॉल्या तुफानन ?

यपॉर्य किन्य तलोलुतुम तुलुन ज़िंदगॉनी  
 द्वहन कुत्यनुय शोर फॅहल्योव च्ववापॉर्य  
 तु लोग तस जवानस च्ववापोर छांडव  
 हवॉयी जहाज़न समंदर्य जहाज़न

सुसर लॅज तु ग्रख खूनसुय खॅच जवानन  
 अॅकिस रछनु बापथ हतन बे करॉरी  
 वुछुक याम ड्युतुख अलम ह्यथ बराबर  
 करान मोतुसुय मलखनुय सुत्य मुकाबल  
 तुलुख नावि मंज वातुनोवुख बॅठिस प्यठ

दोपुख रेडियो खबरनुय मंज मुबारक  
 ज़ि सोदरुक हसॉ लाल अथि आव ऑखुर  
 समंदर मँदिथ अमृता दिवताहन  
 दज़ान ज़िंदगी हुंज मशॉल्या बराबर  
 हरान गाश आशन हुंदिस ज़ितनि चाँगिस

वोनुरख रेडियो खबरनुय मंज़ मुबारक  
 ज़ि सोदरुक हसॉ लाल अथि आव ऑखुर  
 खबर म्यानि ऑही ति मा कॉल्य फल द्युत  
 खबर म्योन कांछुन ति मा खोत चिकारस  
 व्वं लारन नु मारन नु इनसान ज़ादन  
 नु ज़ुरवन वुवुन्य शोरु रंगीन वार्यन  
 ऑकिस रछनु बापत हतन बे-करॉरी  
 हतन रछनु बापत ति सासन सुसर लगि  
 तु सासन लछन लछि बद्यन बेयि करोरन  
 वछस व्वथि तछुन सीनु सपन्यख परिन्य च़र

हतन गॅछ्य नु मारुन्य रतस गॅछ्य नु लारुन्य  
 नॅहॅज फीर अमिची च्ववापोर शायद  
 तु शायद अमी मायि वोल इबने आदम  
 यिहय ग्रख सुसर लॅज च्ववापोर मनुशस

मुबारक छु अज़ ज़िंदुगी ज़्यून ज़ॉहिर  
 मुबारक छु अज़ ज़िंदुगी ज़्यून ज़ॉहिर  
 ऑकिस रछनु बापत हतन बे-करॉरी



७०

## सोपुन तु सोंच

विज़ि विज़ि छुस सोपुनस मंज़ डेशान  
 तापु द्वहा मँज़्य रूदु लवाह मँज़्य  
 तापु द्वहा युस रू रू गालान  
 रूदु लवाह य्वसु तन शेहलावान  
 विज़ि विज़ि छुस सोपुनस मंज़ डेशान  
 शामुच रंगुताह, सुबहुक गाशाह  
 सुबहुच सेंदुराह शामुच माँज़ाह  
 तापु द्वहा मँज़्य रूदु लवाह मँज़्य  
 विज़ि विज़ि छुस सोपुनस मंज़ डेशान  
 सोपुनस मंज़ क्या द्वहली बिह्य बिह्य  
 चेश्मन ब्रोंह कनि द्रींठ यिवान छुम  
 छाँफ गछान छम अँछ टिटुरारय  
 तारक नबुची गुलि टूर्यन हुंज़  
 मँज़्य मँज़्य डेशान म्वख्तु ख्यलन प्यठ  
 पिशल्यन पम्पोशन हुंज़ तंदलाह  
 च़म ज़न स्वंदर मसवलनुय हुंज़  
 छाँफ गछान छम छा़य यिवान छम  
 नैन्य तय प्रैन्य फेक्थ संगर मालन

ग्रटु फिर्य फिर्य ज़न मोज़रेनि कस ताम  
 तनि वेंछु गॉमुच, फेक्य नॅन्य द्रामुत्य  
 संगर मालन गाश फवलान येलि  
 सिरिं खसान येलि प्रज़लान ज़ोतान  
 नूर फवलान तेलि सॉरिस ज़गुतस  
 अँत्य छुम ह्यस ह्यू फेरान मँज़्य मँज़्य  
 दिलसुय ज़ीर दिवान दुबरारय  
 कति छुख आमुत कोत कुन लारान  
 कस छुख छारान, प्रारान मा छय  
 कांह माशोकाह, नोश लबाह कांह  
 ज़ूनि डबे प्यठ चूनि जॅरिथ मा  
 नोश लबाह कांह होश रुबा कांह  
 ज़ीर दिवान छम दिल दुबरारय  
 ज़ांह छा मे ति अथ प्यठ च्यथ दिचमुच  
 कति छुस आमुत कोत छुस लारान  
 कस छुस छारान क्या छुस गारान  
 होश छुमा किनु छिम पँद्य पानय  
 आँकुवने किन्य ब्रोंह ब्रोंह लारान  
 नतु मा वेज़ आस्यख वथ पनुनी  
 या मा मँज़िल आस्यख गारान  
 मिकनातीसुचि रज़ि लमु लमु ह्यथ  
 पॉन्य पानय ब्रोंह ब्रोंह लारान



आँकुवुने किन्त्य योद मँज़िलस कुन  
 दूहली बिह्य बिह्य यी छुस सोंचान  
 द्रीँठ्य यिवान छुम छांफ गछान छम  
 तापु दूहा मँज़्य रूदु लवाह मँज़्य  
 स्वंदर कोताह लूबान शूबान  
 सूँचिथ छा किनु हंगतु मंगय यिम  
 अँड्य क्रकु लायान शोर तुलान अँड्य  
 जंग करान यिम टुंगि वदुनावान  
 मोसुम लालन स्वंदर मालन  
 हूल्य गिंदान यिम आदम रतुसुय  
 सूँचिथ छा किनु हंगु तु मंगय यिम  
 दिल फुटुरावान, आशन हुँद्य तिलु  
 चाँग्य करान छयतु, गटु नोवुरावान  
 तारक नबुसुय शाहिद थँव्य थँव्य  
 वादु करान यिम यारन सुती  
 तिम फुटुरावान, बेयि मंदुछावान  
 लोलस, मजनूनस, नॉग्यरायस  
 रांझस, महिवालस, मन्सूरस  
 दारस युस खोत पज़रुकि बापथ  
 यी छुस सोंचान दूहली बिह्य बिह्य  
 यी छुम द्रीँठ यिवान, अँछ गाशुक  
 वथरुन छुस यारस वयुत शेरान

पॉरान, डेशन ब्योन ब्योन रंगुवय  
 शक्लु बनावान लोलस पनुनिस  
 ज़िंदुगी दिथ नॅन्य पॉठ्य नॅनुरावान  
 सूचिथ छा किनु हंगु तु मंगय यिम  
 जुव गालान शॉयिर शारस प्यठ  
 फनसुय पथ फनकार मरान बेयि  
 रॉचन हुंद आराम छि त्रावान  
 छांफ गछान छम द्रींठ यिवान छुम  
 तापु द्वाहा मंजु रूदु लवाह मंजु  
 तापु द्वाहा युस रू रू गालान  
 रूदु लवाह य्वसु तन शैहलावान  
 याद यिवान छिम र्वनि श्वन्य करवुन्य  
 नचुनस मंजु मस अख मस्तूराह  
 या साजंदर ह्यथ संतूराह  
 छोट छोट वाख परान लल देदि हुंद  
 या गजुलाह या वचुनाह, भजुनाह  
 अॅक्य कॅर हिकटा, अॅक्य कोर नचुनाह  
 ब्राँत्य गछान छिम याद यिवान छुम  
 वीगिस प्यठ मासन हुंद नचुनाह  
 सोदुरन व्यसुनुय हुंद अख असुनाह  
 याद यिवान छुम गामन शामन

मस मलुर्यन हुंद कछुकर नरिवुय  
 दानि मुनुन मुहल्यव अकि ताले  
 याद यिवान ब्योन ब्योन दीशन हुंद  
 हॉकी गिंदुनाह या फुटबाले  
 येति ज़न अख अँक्यसुंघ जंडु ज़ालान  
 येति ज़न मुल्कन हुंद दुश्मनुथाह  
 खेलन मंज़ ताम छी वरतावान  
 याद यिवान छुम छांफ गछान छम  
 कँड्य कँड्य यिवान खुर्य येति डेंजन  
 सोंचस बेयि बोज़ ग्यूर व्वथान छुम  
 नतु क्या वाठ छु लोलस गोल्यन  
 वीगिस नचुनस जगडु लडायन  
 नतु क्या वाठ छु सोपुनस सोंचस  
 सुबकिस नूरस या फुटबाले  
 वलनु यिवान छुम खुर पनु डेंज्यन  
 शोर कँरिव कम, कथ ल्वति पहानथ  
 द्यवु मे ति अथि यी अंद यथ कुनि किन्थ  
 द्यवु बु ति नवि सरु सूचिथ ह्यकु कैह  
 दूहली छुस कवु फिर्य फिर्य डेशान  
 रूदु लवाह मँज्य, तापु दूहा मँज्य  
 रूदु लवाह य्वसु तन शैहलावान

तापु द्वहा युस तुरन गालान  
विज़ि विज़ि छुस सोपुनस मंज़ डेशान



७१

## वक्तुक जंग

अज़ छु लोगमुत पोशिनूलन वारिल्यन हुंद जंग तय  
वाय लगी ना ज़िंदगॉनी नव बहारुक रंग तय

पानुवँन्य ऑस ल्वकुचारस बालु यारस बॉज बठ  
व्वन्य छि सॉज़िश हर्द वावस थथरि नारस बॉज बठ

अज़ छि कुकिलन बुलबुलन बेयि कँतिजि ख्यजिनय लारु लार  
बेयि हिशर अज़ ग्रद तु गाँटन, वारिल्यन छी पॉज़ यार

कुच़ मेहनत कँर तु असि पँज़ीन तु जाफ़ुर्य तंदलि लॉग्य  
कँतिजनय हुंज़ लॅट सज़ॉव रँछ्य बुलबुलन हुंद्य यावु छॉग्य

क्या खबर ऑस कँड्य खसन बेयि स्वयि नवन यथ वारि मंज़  
क्या खबर ऑस ज़ागि रुज़िथ कुस स्वरुफ वन यारि मंज़

गम मु बर दिलदारु म्याने वुनि छि असि ह्यमथ जवान  
वुनि छु लालन खून ग्रेकि तय वुनि छु पोंपुर येति नचान

वुनि छु आरन जोश यारन होश काँत्याह शेरि नर  
वुनि छु दिल पम्पोश यस छी ख्यल च्वपासे राँछदर

योद चु ह्यस तय होश थावख दिल रछख बोज़ काँम ह्यख  
योद कदम थावख चु पज़ि वति ज़ांह अगर नय बांबुरख

वुछ तु तेलि यँच च़ाँग्य छ्यतु गँयि तीत्य तारख शोलुनय  
यीत्य बे ज़्यव कँल्य सपुन्य अदु तीत्य कोस्तूर बोलुनय

पोशिनूलय ज़ेनि येलि अंद वाति वक्तुक जंग तय  
वुछतु कुन्दन ज़िंदगी लागि नव बहारुक रंग तय



७२

## चोन तसवीर

दोपुम अज़ बनावय बु तसवीर चोनय  
तु ज़गतस ति हावय बु तसवीर चोनय

गुलालस ह्योतुम रंग व्वज़ुल नारु तिख ह्यू  
सब्ज़ रंग मे द्युतुनम डलुक्य लॉव्य ख्यलुनय  
ह्योतुम न्यूल रंग यथ नबस मायि सानुय  
सफेदी दिचुम ज़ून गाशन प्रगाशुच

रंगन डेर गॅयि आयि कम टूर्य बॅर्य बॅर्य  
अॅरिन्य आयि, ही आयि, विरि क्योम तु सुम्बल  
तु जीलान तु प्रज़लान तु व्वशलान ति कम गुल

कुहुन रंग ति गोछ चानि अमि जुल्फु बापथ  
तमी किन्य गॅडिम गुल्य यिमन कालु रॉचन  
खबर छय छु मा नतु मे गटुकार रोचान

ग्वलाबन दोपुम बुथ्य लबन लॉग्यज्यम मे  
सुबुक्य नूरनुय चोन ड्यकु छोर माये  
तु शामन कोहन पॅत्य छि ख्वसु माँज़ आसान  
सु ऑडुर मे टूर्यन नमन चानिनय किच

बनावुन ह्योतुम अदु मे तसवीर चोनुय  
 ड्यकस निश मे पम्पोश फोलमुत थवुन प्यव  
 अँछन निश ति पम्पोश वँथरुय सजॉविम  
 वँथुर दुबु थँविथ बुथ्य लबन हुंद थज़र नोन

अथन दून ति पम्पोशिवुय नाप ह्योतुहय  
 खरन हुंज़ ति पम्पोशि चॉलय मे डीठम  
 रंगस मंज़ ति पम्पोशिची स्वय ग्वलॉली  
 तु होट ज़न तु डलु वानि पम्पोश छोलमुत

स्वंदर च़म तु पिशजार पम्पोशिकुय छुस  
 बोरुत वछ तु शेहजार पम्पोशिकुय छुस  
 पवलान मोर अनहार पम्पोशिकुय छुस  
 असान वुठ तु व्यवहार पम्पोशिकुय छुस

खबर बिह्य बिही कथ जहानस बु वोतुस  
 खबर म्यॉन्य बुरशन कत्यथ क्या च़े ड्यूतुय  
 अँछन दिच़ मे मूरन तु डेशान क्या छुस  
 बन्योमुत छु पम्पोशि गौद वारु कारय

बनावुन ह्यवान येलि बु तसवीर चोनुय  
 खबर क्याज़ि पम्पोशि गौद छुस बनावान  
 च़ु मा ज़िंदगी हुंद यि आकार असली  
 तमी मा छु पम्पोश ह्यु रोय चोनुय



बनावुन ह्यवान येलि बु तसवीर चोनुय  
खबर क्याज़ि पम्पोशि गोंद छुस बनावान  
खबर क्याज़ि पम्पोशि गोंद छुस बनावान



७३

## सिरु कथ

ब्रोंहय ओसुय मे वोनमुत यारु म्याने  
 जि ऑखुर कॉल्य ज़ेनी म्यॉन्य सारंग्य  
 जि ऑखुर कॉल्य नेरन म्यॉन्य अरमान  
 जि ऑखुर कॉल्य प्रज़लन सॉन्य तारख

मे मा ओसुम ज़हुन्य बयि रोट कालुक  
 बु मा खूचुस ज़हुन्य नारस अलावस  
 मे मा खँच तुर ज़ांह डीशिथ तुफानन  
 बु मा रोवुस ज़हुन्य अखताब लूसिथ

मे ओसुम गाश अज़मुक, आश सुबहुच  
 बु ओसुस कव थँविथ कथ सोंतु कालस  
 असूलव म्योन कोरमुत सीनु शेस्तुर  
 तु आदर्शव मछन बोरमुत कुवत नौव

मे ऑस वीदन अंदर पॅरमुच यिहय कथ  
 पोजुय पज़ि ऑखुरस अपज़िच मु रठ वथ  
 पनुन्य किन्य आलुमस ओसुस वनान यी  
 दूहय अज़ ताम यिहँय शेछ वॅन्य मे ज़गतस

अमा पोज़ रोट मोकल द्रोंत ह्यथ रूद्य  
 तिमव कोर खंदु म्यॉनिस एतिबारस  
 तिमव वोन मोत छु मचुरस, छुस हुर्यर अज़  
 तिमव दोप दहलि डेशान खाब बेकल

मगर अज़ बाज़ वक्तुक ज्यून येलि मे  
 गॅयख पोत छाय फीरिथ हेसु बेसय  
 दोपुख अफसूस अज़ यथ क्याह सना गव  
 रवुच प्रवु गॅयि अँछन तॅर्य तॅर्य यिमन अज़

बु छुस अज़ बेयि तिथय कॅन्य लोलु चेशमव  
 वुछान हर काँसि लोलुक मस अथस ह्यथ  
 अगर ज़न च्यन, शिलुक शेहजार प्रावन  
 नतय छँकरुख बन्यख वेह ताल ज़ाल्यख

छुसय अज़ बेयि वनान दिलदारु म्याने  
 दूहय ज़ेनी यि म्यॉनी टाँठ सारँग्य  
 यि कुन्दन गीत परि लोलुक्य तु प्रेमुक्य  
 चु गछ मिज़राबु सुत्य सेतारु वायान



७४

## अख मंजर अख खयाल

रॉत्य रातस ओस तारख नब फवलान  
 बिंदरि ज़न कुनि डुपट दामानस जॅरिथ  
 कालु गटकारस करान अँछ नाट नब  
 प्यव चिहिस मंज़ वुछतु गटकारुय हॅरिथ

गाश फोल अदु रोगि रोगे सिरिं ज़ाव  
 परनि छॉन्याह गाशि फोत्य थँव्य अँम्य बॅरिथ  
 जायि जाये आसमानस ओबरु लंग  
 नक्श गीरन ज़न तु छुय थोवमुत गॅरिथ

न्यूल आकाशाह प्रज़लवुन्य ओबरु थोस्य  
 फम्बु तूदन वंपु वरक ज़न छी मॅरिथ  
 शेर गाहे मँज्य गछान छख ब्रॉर ज़न  
 छट शिकॉर्याह मँज्य तु गॅयि आबस तॅरिथ

ओबरु तूदस मँज्य बनान ज़न शुर तु मॉज  
 छुस वछस तल मायि छस दूदु बब बॅरिथ  
 या यिहोय राज़ाह तु रँन्य कांह थामि ज़न  
 बॉज्यगारन ज़न तु थँव मॉथुर पॅरिथ

पहरि बर तल वहरि कचि ताम नारु छप  
वाय कुस सनु गव अँमिस यावुन फँरिथ  
युन ह्योतुन आकॉश्य ज़न क्रकृ नाद ह्यू  
टासु रारय छम गछान वॉलिंजि तँरिथ

कर चलन सम्सारु मंजु यिम दूख तु दौद्य  
युथ यि कुन्दन हेकिहा येतिनस दँरिथ

\* \* \*

७५

## थनु प्यव तमि विज़ि श्रूकाह शाराह

ओबुरन वोल येलि नाल आकाशस  
 क्रेहन्यर चोट फ्यूर पूरिस पछिमिस  
 गगुरायव ठसुराय करुन्य हैच  
 द्रायि चॅटिथ येलि ओबुरस वुज़मल  
 थनु प्यव तमि विज़ि श्रूकाह शाराह

गुलि टूरिस म्वख छोल शबनमुनय  
 पोम्पुर मोत गव प्रक्रम दी दी  
 पनु वॅथुरन प्यठ नीजर पिशल्यव  
 टूर बुडुख दिथ फोल येलि पोशाह  
 थनु प्यव तमि विज़ि श्रूकाह शाराह

चरि ऑलिस मंज़ चरि बचु जोराह  
 चॅर छख आंपु दिवान कमि माये  
 काँटुर लंजि प्यठ रॉछ दरा ह्यू  
 याम चिरिव वोथ फम्बु फेक्य वुशनेय  
 थनु प्यव तमि विज़ि श्रूकाह शाराह

बालस प्यठ गुजराह अख थामे  
 आशन मोयूसी खुर आमुत  
 कोठस कुन तस लाल दरस लॅग्य  
 ज्ञा शुर्य सुंद चिकुन्यार युथुय गव  
 थनु प्यव तमि विजि श्रूकाह शाराह

महारेन्य येलि लॅगुनस प्यठ खॉरुख  
 ऑनु अँदॅर्य तस होवुख नोशाह  
 दयि बतु ख्यवान व्वशलुन खोत तस  
 अथुवासस मंज अथु येलि कुमलेय  
 थनु प्यव तमि विजि श्रूकाह शाराह

क्रीचम क्रीचम कोर येलि खपुचव  
 यँदुरन येलि ज़न कॅर गुंगुरारय  
 कनुर्यन येलि ज़न मॅलिलय लोगुख  
 फम्बु कान्यन येलि वार खसान गॅय  
 थनु प्यव तमि विजि श्रूकाह शाराह

निगियि अंदर येलि चाँठच वसान गॅय  
 दार दूदस लॅज च़डु वार्यन मंज  
 वॅछिनुय फेक्य येलि खॉरिख ल्वंगुन्यव  
 वछरि युथुय चुह चुह द्युत बबुनुय  
 थनु प्यव तमि विजि श्रूकाह शाराह

येलि गव कू कू गोव्यंद गू गू  
 चिरिव चिरिव गव टिटू टिटू टू  
 वेंत्यजन लॅट रूज़ शीरिथ पौरिथ  
 बुलबुलनुय येलि छोग बडान गव  
 थनु प्यव तमि विज़ि श्रूकाह शाराह

माजि शुरिस येलि दूद बतु आपुर  
 मायि वुछान गॅय अँछ गॅयि रूज़िथ  
 ज़ाल्यव किन्य दूद पोन्य वसान गव  
 दुनन दिचुन अँछ गॅय टिटुरारय  
 थनु प्यव तमि विज़ि श्रूकाह शाराह

म्वख्तु छँकुर येलि सुबहुक्य वावन  
 बौबरन यँबरि बुथिस द्युत म्यूठाह  
 फ्रस्तन येलि कोड काड नबस कुन  
 बोनि युथुय रँट्य बेबि मंज़ थँक्यमुत्य  
 थनु प्यव तमि विज़ि श्रूकाह शाराह

म्यानि ति ज़ूरे दोद येलि चोंगाह  
 अस्तानन दशि थवुनन फल द्युत  
 म्यॉनिस लालस मँत्य कॅर ऑही  
 माज़ फेक्यन खोत येलि ज़न कुन्दन  
 थनु प्यव तमि विज़ि श्रूकाह शाराह





७६

कथ हसॉ कथ

कथ हसॉ कथ  
यिहय अख कथ  
कॅर तु म्वकुलेयि

यी छा सॉ वथ  
कॅड तु कॉयिम  
यि छे अख कथ  
हेछ तु व्वतुलेयि  
रॅछ तु शेहलेयि  
तॅछ तु तेजेयि  
कॅर तु म्वकुलेयि

यि छा सॉ खत  
ल्यूख तु दॉयिम  
यि छे अख कथ  
सॅन्य तु सनुवुन्य  
नॅन्य तु प्रनुवुन्य  
वॅन्य तु ललुवुन्य  
कुन्य तु खनुवुन्य  
कॅर तु म्वकुलेयि

यि छा सॉ व्यथ  
 छुस नागु आगुर  
 यि छे अख कथ  
 अँती फिरि माय  
 अँती लायि लाय  
 तचर ज़न क्राय  
 शिहिज ज़न छाय  
 वुठव पेठ्य द्राय  
 दिलस छस जाय  
 छैन्य तु वँह्य वाय  
 रूज़ तु वोथ न्याय  
 वँर तु म्वकुलेयि

यि ज़न छनु वथ  
 यि ज़न छनु खत  
 यि ज़न छनु व्यथ  
 मगर छय कथ  
 कथ हसॉ कथ  
 यिहय अख कथ  
 अख शिहिज कथ  
 हावि य्वसु वथ  
 पोशि पतु वथ  
 यारु संज़ सथ

स्वय हसॉ कथ  
वॅर तु म्वकुलेयि

कथ यिहय कथ  
मानि छुय यथ  
शूबि स्वय कथ  
रोज़ि स्वय न्यथ  
तॅथ्य मरन पथ  
मॅत्य गछन ह्यथ  
स्वय रछन कथ  
रुत्य छुनन च्यथ  
क्रुत्य करन कथ  
कथ हसॉ कथ  
वॅर तु म्वकुलेयि



७७

## कॅन्य तु थॅन्य

दिल छु तमि विज़ि कॅन्य गछान  
 येलि नफरतुक, हसदुक, ज़िदुक या नखवतुक  
 वुहवान आस्यस  
 नार मन्कलि मनुचि ... या आस्यस अज़रवुन  
 काँसि हुंद हँस्तिस खसुन  
 या अगर कूदन कॅरुस रज़  
 दंद हेतिन चीरुन्य  
 तु बुम त्रकृजार होवुन  
 माज़ फोर्योस माज़ु मछुनुय  
 दिल छु तमि विज़ि कॅन्य गछान  
  
 दिल छु तमि विज़ि कॅन्य गछान  
 येलि काँसि लॉजिस हांछ अपज़िच  
 येलि तसुंघ अरमान छ्वकवनु आयि  
 लिथुवनु आयि तॅम्य सुंज़ सादुगी  
 येलि तसुंज़ मेहनत तु मश्कत  
 जुव चटुन बेकार गव  
 येलि अपुज़ पज़रस करान गुर  
 येलि यिवान खुर लोलुसुय  
 दिल छु तमि विज़ि कॅन्य गछान

दिल छु तमि विज़ि कॅन्य गछान  
 येलि मोत मुहिथ छुस निवान  
 अडु फॅल्य गुलालन, या अगर  
 कांह मोसुमा छुय बालु पानय  
 बे ग्वनाह रावान  
 गछान येलि मॉल्य रोस  
 या युथुय ठोकर बुथ्यन क्रेहन्यार फेरान  
 माजि रोस डोलान वतन  
 दिल छु तमि विज़ि कॅन्य गछान

दिल छु तमि विज़ि थॅन्य गछान  
 येलि गुल फवलान, बुलबुल ग्यवान  
 येलि पोंपुराह पखु टासुरान  
 चुह दिवान पोशस बुथिस  
 येलि बोंबुरन्य गुंगुराय  
 शोकुक टोट वनुवुन ह्यु गछान  
 दिल छु तमि विज़ि थॅन्य गछान

दिल छु तमि विज़ि थॅन्य गछान  
 येलि मॉसुमन हुंज़ु बाशि डीशिथ  
 सीनु सनिरव मंज़ु खसान

खंगालु असनुक्य  
 येलि ख्वखुज कॅर्य कॅर्य पकान बालक  
 कडान ज़न ज़िंदगी हुंदि ज़ेठि सफरुक  
 अख आदनुक यिवनुक पडाव  
 दिल छु तमि विज़ि थॅन्य गछान

दिल छु तमि विज़ि थॅन्य गछान  
 येलि मारु मोत कांह आरु होत  
 डेशान लोलस पनुनिसुय  
 येलि बेहोशी मंज़ फिरान  
 कौत्याह वरक  
 अमि लोलुचे किताबि हुंघ  
 येलि बिहिथ आसान छस नखु मॉर्य मँज़  
 बेयि च्वपासे तिछ खमोशी  
 यथ अंदर ज़न बोज़ि अख, बेयि सुंदि दिलुच दुबुराय ताम  
 दिल छु तमि विज़ि थॅन्य गछान

दिल छु मँज्य मँज्य थॅन्य गछान  
 दिल छु बाज़े कॅन्य गछान



७८

## कुल तु थॅर

कुल बु छुस बागस अंदर वुछ  
 स्यौद तु थोद असमान ताम  
 ग्वड मे छुम मज़बूत, शेस्त्र  
 अलु करुस, वुछ व्योठ तु पूठ  
 तॅम्य दयन दिचुनम जवॉनी  
 कद मे द्युतुनम थोद तु ज्यूठ

सोंतु ब्रोंह ओसुस कुनुय ज़ोन  
 तन मे ऑसुम पनु रछुय  
 छुस करान शुकरानु सोंतस  
 संग मे प्रोवुम मायि होत  
 पोशि थॅर अख ज़ायि जॅमिनस  
 मेय नखय बागस अंदर  
 सग दितुस रूदन तु प्रज़ुलॉव  
 सिरिं प्रागाशन यिहॅय  
 ज़ून गाशन मायि मंज़ुलिस  
 मंज़ ललुव अदु यीच वॉच

यावुनस मंज़ नालु मति रोटुनस  
 तु कॅर्यनम मीठ्य मे  
 वुछ च्ववापोर अलनु वलुनय  
 आयि किथु पॉठ्य मायि मॅच  
 सीनु शेहजाराह मे प्रोवुम  
 बेयि फुलय बरजस्तु लॅज  
 म्युल सपुन यनु प्यठु अॅमिस मे  
 तनु हुरान गॅयि शान सॉन्य  
 लोलु नागस लॅज वुज़िन्य  
 यनु रॅलिथ यिम प्रान सॉन्य  
 अॅम्य सुंदी सुत्यन बु छुस शूबान  
 लूबान म्योन कद  
 म्यानि सुत्यन रॉछ अॅम्य सुंज़  
 पोज़ छु अॅम्य सुंद मान मद

काँपुनावान छुम मे कुनि कुनि  
 बद खयालाह छुम व्वथान  
 योद हॅरिथ गॅयि थॅर यि म्याँनी  
 कैह लग्यम मा द्दुरनस  
 अख लंडुर ह्यू, टूठ ह्यू  
 कूजस अंदर गछु मा चॅमिथ



या अमा पोज़ मेय अगर  
ज़ज़रुन ह्योतुन पानस खसुन  
बे वफा योदवय बु द्रासस  
कॉल्य गोसस दाग दिथ

थॅर हॅरिथ पेयि च़ड लग्यस  
बागस अंदर पेयि टास दिथ  
म्वखसरन अख अँक्य सुंदे  
सूत्यन छे द्वक्षुन्य ज़िंदगी  
जोरि मारान जूर्य रूज़िन  
दय दियिन नॅव ताज़गी

सोंत पूशिन वोंतु रोस्तुय  
पोश नीरिन आँथु रोस्य  
मति रटन **कुन्दन**  
तु आँसिन हार तोत या शीनु थोस्य



७९  
दिल

युथुय दिल गव शिकस लद हार मॉनिन

त्युथुय छुय आंप व्यसरान जानुवारन  
त्युथुय छिख ऑल्य थरि प्यठु ब्वन प्यवान वॅस्य  
त्युथुय छुख ठूल पींत्यन टास नेरान  
खसान छिख तुरि कॅड्य तीरि नेरान  
गछान छुख पॅत्य व्वंदुक वुशन्यार सोरान

युथुय दिल गव हचर ज़द वावु लद ह्यू

त्युथुय छी पोश ज़रदान टूर्य च़मठान  
त्युथुय वॅथुरन प्यवान रुखु नीजर छु ज़रदान  
त्युथुय पेचानुसुय खसुवुन लगान टख  
ख्यलस लॉविस त्युथुय खरु खरु गछान च़म  
फुलय बरजस्तु सपुनान डोटु बुज़्य हिश

युथुय दिल गव न्यराशाह ना-व्वमेदाह

त्युथुय छुय डुव लगान तारख नबस छट  
 प्यवान छुय जून गाशस ग्रहनू क्रेहन्यार  
 प्रबातस ज़न मथान कांह छुय कृहन्य मील  
 करान ज़न चाँग्य अकि अकि छयतु खबर कुस  
 तमी विज़ि छुय यि मोत अखताबु लोसान

युथुय ज़न लोलु बॅर्यतिस लॅज दिलस ग्राय

नेंदर छय मॉसुमन पाटॉस्य सपनान  
 सेद्यन सादन मनोशन वथ छि रावान  
 गछान छुय कुक्यलि कोस्तूरस ग्यवुन पॅत्य  
 स्वतान ज़न मुशिके बुदजन हुंज़ स्वगँदी  
 मलख आबुक्य छयनान लूसिथ प्यवान वॅस्य

युथुय छुय दिल फुटान ज़न चुन शीशस

कमन हरनन गछान छय चेश्मु रूज़िथ  
 मशान मिनि मरि छे वतनुय लांपु मेनुन्य  
 प्यवान छलि छलि कुठ्यन हुंद गछ सरासर  
 खुत्मबँद्य तालुवस हचि पचि गछान ब्योन  
 तु व्वस्तादन अचान छुनु सुचुन्यनुय पन

अमी दोपुमय दूहय दिलदारु म्याने  
दिलुच यिनु रावुरावख पादशाँही  
दिलस यिनु रावुरावख पादशाँही  
दिलाह यिनु हारुनावख रावुरावख  
यिनो दिख बननु दिलसुय ज़ांह हचर ज़द

दिलुच आशा छि बख़्शान नूर नेत्रन  
दिलस युथनो लगी ज़ांह ग्राय लालो  
दिलस युथनो लगी ज़ांह ग्राय लालो

दिलाह छुय शीशु आँव्युल रॉछ कॅर्यज़्यस  
अमी दोपुमय दूहय दिलदारु म्याने  
दिलुच यिनु रावुरावख पादशाँही



८०

**इन्कलाब**

बरन दार्यन लबन लाद्यन वुरूस्यन तु गंजीनन  
तला लीखिव बड्यव अछरव सॅमिथ सॉरी ... 'इन्कलाब'

फेर्यन च्वन निश थॅविव पम्पोश लॉगिथ  
ख्यलव सुत्यन डलस अंद कुन, तला लीखिव 'इन्कलाब'

डलुक युस पोन्थ नॉपान छुय  
मंज़स गछि तथ युथुय बासुन  
छु ज़न तथ नाग कॉरिथ त्रोवमुत र्वपु दथ  
ज़ितनि ज़ोतान दूरि प्रज़लान 'इन्कलाब'

ओताम ऑस्य तारुकन मंज़ हल तु सतु रेश्य  
तिमन ग्रहद्यन वॅथिव व्वन्य जाय बदलॉविव  
थॅव्यून व्वन्य तंदलि तिथुवॅन्थ अज़ यि तारक बोक  
ज़गत बुतरॉच प्यठ ह्योर कुन वुछिथ परि 'इन्कलाब'

प्रबातस करन येलि खेलु शुर्य इस्तादु रुज़िथ  
वुठन मॉसुम असुन आस्यख  
ड्यकन प्यठ आश गाशा ह्यू  
तंदल यिथु वॅन्थ गछ्यख व्यस्तार दिन्य नॅव  
अॅछन वाल्यन परुन तगि लॉनि अंदर 'इन्कलाब'

यि क्या बागन अंदर कपटन कॅरिथ ज़ंड  
 बनॉविथ छिख गुपन गुर्य बेयि हॅस्य तु हांगल  
 यिमन व्वन्य शूबि नॅव कपटन  
 गछन सॉलॉन्य, पर, पनुन्य, सॉरी पनुन्य  
 अचान बागस अंदर 'इन्कलाब'

संगर मालन फेक्यन  
 जूनि अखताबस  
 चर्यन हार्यन पखन  
 कुल्यन फ्रस्तन लंजन  
 आसमॉन्य डबि  
 प्रथ अॅकिस लबि  
 नट्चन नार्यन  
 खवरन पुलहार्यन  
 यिमन गछि सारिन्य लीखिथ थवुन व्वन्य 'इन्कलाब'

अमा पोज़ अख शर्त छुय यारु म्याने  
 ग्वडन्य गछि युन खयालन इन्कलाब  
 तव पतु गछि नज़रि आसुन इन्कलाब  
 पॅतिस लाकून्य छि वातान वॉर्य माहोलुच  
 अॅती यी पूर पॉठ्यन इन्कलाब  
 च़े कुन्दन युस वुछुथ कर ताम खाब



८१

## लोसुवुन अखताबु

छु सौंचान लोसुवुन अखताबु वुन्यक्यन  
 यि आलम क्याज़ि माज़ान अनि गॅटिस अज़  
 दितुम मे गाश गटुकारस कॅडुम चँड  
 दप्योम गाशुच अक्य च़ादर वलख अज़  
 सन्यर व्वगुन्यार युथ हमवार सपुनन  
 तु युथ तुरेमुत्यन वुशनेर फेरी  
 पनुन पानुय मे ज़ाजोव अज़ ऑव्युल  
 हेच़ॉम सामाह सौरिस आसमानस  
 कोडुम मा थख ज़हुन्य गरु बार त्रोवुम  
 दोपुम प्रथ लॅयि अंदर गोछ गाश वातुन  
 मे वुज़ुनॉविम प्रबातस नैदरि हँत्य लुख  
 मे कडुनॉव्य जानवर सौरी पखन वाश  
 करेयोम संज़ जि टूर्यन पोश सपुनन  
 दपेयोम लंजि लंजे म्यवु गॅछ्य पेन्य  
 तिमय तारक लुकन यिम सावुनावान  
 नैदर पावान जि युथ ज़न चूर फरुनख  
 दिवान छिख आलछ्युक यिम मस मोदुर चोन  
 मे ब्रॉह कुनि कांह ति मा द्रायोव ज़ांह नोन

अमा पोज़ लॅज यि शरबत आलमस टर्चेठ  
 तिमन प्रवु द्वहलि गाशुच आयि मा रास  
 त्युथुय चूरव लुटेरव बाँज वठ कॅर  
 ग्यवुन्य हेतिहख स्यठाह ग्वन अंदुकारुक्य  
 छि मा कॉम्य करुन्य कांह रोत कालस  
 शौंगिव पानस तु त्रॉविव डाफ बे गम  
 व्वं गव शुर्य बाँच या बैयि खानु दारेन्य  
 तिमन रछि पानु परमीश्वर तॅमिस चेट्य  
 छु सौंचान लोसुवुन अखताबु वुन्यक्यन  
 यि आलम क्याज़ि माज़ान अनि गॅटिस अज़  
 युथुय आलव द्युतुख गटुकार फॉल्यव  
 कोहव पॅत्य किन्य तिमव कोड मे कुनुय कश  
 च्ववापोर आयि नीरिथ रोत तारख  
 ब्रॅम्यव आलम युहय गव गाश शायद  
 वदान छुय लोसुवुन अखताबु वुन्यक्यन  
 ब्बदुय गॅयि कवु फिरिथ यथ आलमस अज़

मु बर गम यारु म्याने आफुताबय  
 खसुन चोन रूद नय लोसुन ति रोज़्या  
 छु पोज़ ग्वनमाथ छुनु कांह ज्योतुशी दफ  
 मे वोनूमय तोति थव कन म्यानि वॉनी



यि गटकारुय द्वहय मा रूद ज़गतस  
 वक्त यियि बेयि सुबुहस आलव दिनय च़े  
 गँडिथ गुल्य पूर कुन ऑही मंगन तिम  
 खँसिन बेयि सिरिं सुय प्रागाश हाविन्त्य  
 यि कैह यवु दँह्य द्वहस ओसुथ च़े कोरमुत  
 चु वुछ तर नेरि तथ कैह चोन राव्या

पगाह यिम यिन करन कालुक्य ति तॉरीफ  
 ल्यखन स्वनु मीलि सुत्यन नाव चोनुय  
 दपन सिरियस वनुन क्या सिरिं सिरिये  
 द्वहय पूशिन यि सोनुय गाशि आगुर

अँती कुन्दन बडी च़े ति शादमॉनी  
 वुछख येलि फवलुवनिस अखताबुसुय बुथ



८२

## मे छि यार वनान

### चोंग

कलु प्यटु नल ताम रेह हेचुनम  
येलि ठॅर्य थॅविनम अथ प्रागाशस  
तिलुन्योम बदन  
क्रेहनेयम तन  
मॅत्य वॅर्य मे नारस व्वजुजारस  
सुबु दम ताम ज़ोलुम जान पनुन  
मे छि चोंग वनान  
तिलु चोंग वनान

### शमाह

मे ति रेह रॅट नालय सरि शामय  
मे ति नारुक ताज कलस प्यठ थोव  
व्यगुल्योस हन हन  
हॉरिम खॅन्य मन  
गटुकारस अख बॅड छल ज़ॉजुम  
बु ति मोत गाशस देवानय  
मे छि शमाह वनान  
छिम शमाह वनान

### लालु

छिम क्रॉर्य बिहित ज़न  
दिलुक्यन ज़खमन  
नारुव्य छिम जामु वलिथ  
प्यालु ह्यथन छुस खूनि दिलुक  
मे छि लालु वनान  
गुलि लालु वनान

### गाश

लशि नार वुहन येलि चॉंग्य दज़न  
येलि लालु फवलन शमाह व्यगुलन  
गटुकार दज़न  
अथि यिनुखा पन  
संगुरन हुंज यिमु हुमु मालु फवलन  
सिर्यि प्रज़लवुन तापुन्य फोत्य  
मे छि गाश वनान  
प्रागाश वनान

### कुन्दन

कलु ठॉस्य अड्यव अदु रेह हेचुनख  
थज़रव प्यठु पेयि तेलि नार ह्योतुन

अदु यि ति वुछतन  
यि हसँ कुन्दन  
छुस स्वन सपद्योमुत नारु दँजिथ  
मे छि यार वनान  
दिलदार वनान



८३

## सिरु कथ

हंगु तु मंगय गट ज़ैलिस मंज़  
 ज़ूरि प्यठ दौद चोंग ज़न  
 गाशि अंबाराह च्चवापोर  
 नारु तँत्य ज़न लब तु चीन्य

कालु ओबुरस ज़न फिह्यव सुत्यन  
 दितुख दकु, ताफ प्यव  
 सोन व्यगुलमुत, गॉम्य गामस  
 गाशि च़ादर वलनु आय

काड कोड फ़रस्तन नबस  
 सुत्यन कोरुन अथुवास ह्यू  
 वाश कोड अमि बोनि फ़ैर्यसुय  
 तल रँटिन थँक्यमुत्य गबर

नागु रादस लँज वुज़िन्य  
 बुकु बुकु ह्योतुन आबस गछुन  
 पोशि टूर्य फवलनुक सदा  
 बूज़ुम अँछव पनुन्यव अँछव

लूज्याथाह खेन्य दिचुख तस  
 ब्वछि हँतिस नीलेयि दंद  
 दारि किन्य तस चाव अँज ज़न  
 प्राचुवय तस लाल वँछ

माल फिरवान अख बुडाह अख  
 लेफि गँत्यसुय मंज़ चँमिथ  
 गाशि रछु चेश्मय अमा पोज़  
 तँम्य तिथय कँन्य ड्यूठ दय  
 बालु दामुन्य कटु म्वंगुर अख  
 प्यांपुरारय हिश करान  
 गँब बरान बबु म्वमु चेयम ना  
 शामु चांटे म्योन लाल

दीन दुनियाह त्रोव अँम्य  
 हलकॉर्य ह्यू लार्योव पतय  
 शोक व्वतुल्योव लोलु बोछ  
 फलवॉय गव सोदॉय गव

कागज़ी बादाम फुट येलि  
 पॉन्य पानय खाँट्य ब्योन  
 गोजि जूर्याह द्रायि मंज़ु कनि  
 लूबुवुन तय शूबुवुन

ख्यलु वेंथुर अँद्य अँद्य तु  
मंज़ बाग द्राव पम्पोशाह फँटिथ  
अँड्य वेंथुर वाहरॉव्य तँम्य तय  
अँड्य वेंथुर थॉविन वँटिथ

क्वदरतुच क्वदरथ ति पोज़, दफ  
मन ति ऑखुर मायि च़ोड  
म्यॉन्य वॉलिंज सँन्य तु सनिरस  
मंज़ खँटिथ अरमान कुत्य

छुस वुछान कुन्दन बु येलि  
पोत छायि पनुन्य टॉठ्य शुर्य  
चेश्मु टिट्रारय, अँछर वालव  
छुसख ऑही करान

\*\*\*

८४

## ज्यव कॅज छम

येमि जोशु छु टूर्यन पोश बनान  
 सुय जोश जवॉनी म्यानि ति छुय  
 येमि नफरतु दुख लोग कुल्य मूलन  
 स्वय नफरत मे ति मिस्मार करान  
 ज्यव कॅज छम वनु क्या गुलि टूर्यन  
 चमठेमत्य वंदु वावय छी  
 मे ति यावुन चमठोव वंदु वावन

येमि ताकतु छावान कलु पलनुय  
 कोहु बॉल्य छि पानिक्य छूल वसान  
 सुय ताकत ग्रकुवुन खून मे छुम  
 कोर येम्य सरबंदुय तुलु कतर्यव

सुय म्यॉनिस खूनस शिठुरावान  
 ज्यव कॅज छम वनु क्याह नागु बलन  
 विह्य श्रोपुराँव्य सोचुराँव्य येम्य शापन  
 मे ति रगु चुहमचु छे तँम्य शापन



येमि अथु गिर्दाबन ग्यूर व्वथान  
 सुय वखरावान मनु मन्कलनुय  
 युस वावस चारान लाकम ज़न  
 सुय फुटुरावान छुम खूर्य तु हम  
 ज़्यव कॅज छम वनु क्या तस मनुशस  
 युस यव खोरुख यथ फहि कूटिस  
 छय मारन वाल्यन सॉनी च़म

वक्तुचि ट्रिकु च़ोह नागु वुजुन  
 गव छवकु लद लोल तु दारि वोदुन  
 युस रथ ज़न लछि गव रोव नु बॅल्य  
 सुय अंग अनि छवकुलद दिलि जिगुरस  
 ज़्यव कॅज छम वनु क्या असमानस  
 क्यथु मनुशन स्वरगुक नेब कोडुय  
 येति तारख छी अॅछ नाट करान

ज़्यव कॅज छम वनु क्या लोलु मॅतिस  
 यस केम्य डीशिथ छुय दिल रावान  
 मे ति वगुविस तल छुय सुर स्वर स्वर  
 अॅछ छम अमा पोज़ स्वर्गस कुन  
 दिल छुम अमा पोज़ लोलु बॅरिथ

ज्यव कॅज छम वनु क्याह यारु गुलन  
ज्यव कॅज छम वनु क्याह यारु दिलन



८५

## गज़ल

वनय लोलुक बु क्याह अफसानु यारय,  
बन्योस अफसानु लोलुक पानु यारय ।

खोतुस वोगन्यन्य वोथुस सनिरन दिच्चम वॅन्य,  
मगर म्यूलुम सु मा कुनि वानु यारय ।

अॅछन अंदर मे वॅरमस जाय स्वन्दर,  
मे थॅव्यमस टॉर्य दिथ ज़न ठानु यारय ।

अॅछन हँदि गाशि किन्य जिगरस अंदर चाव,  
मे कोरमस दिल पनुन कोरबानु यारय ।

युथुय वुछमस मे मस्तस पेच तय खम,  
मे बोरमस लोल कोरमस शानु यारय ।

वन्यम बोद बुलहवस छुख, वुछ मु होकुन  
दिलन वौननम, बु किथु वॅन्य मानु यारय ।

कदुर कोरनम अॅछन पोशुक निगारन  
मे कोरनम अॅश्य फ्यर्यन दुरदानु यारय ।

तसव्वुर छुम तसुन्द ज़न चोंग हावान,  
वतन छँकरिथ तवय नूरानु यारय ।

मे द्युतनम गीत ग्यवनुक होश तय ह्यस,  
बु कुन्दन छुस ग्यवस क्याह क्याह नु यारय ।

\* \* \*

८६

## गज़ल

अज़ छि म्यॉनी वॉर्य अँश्य फ्यर्य त्रावनस,  
अज़ छि म्यॉनी वॉर्य यिम छोख हावनस ।

सिर कोडुम ख्वशबो मे रॉवम पोश छुस,  
वोन ज़िठ्यव अथु ख्यावुनुय अथु हावनस ।

ओसु सवु तसली दिवान तोहि राथ ताम,  
अज़ बु वनु क्याह पनुनिसुय दिल रावनस ।

यँम्य शिवस वँर पूज़ पतु रामस सु फोर,  
सादु मँहन्युव क्याह वनी तस रावनस ?

दिल मे छुम असुनाह कोरुम, दिल छुम वोदुम  
ख्यावनस युस छुम मे सुय छुम पावनस ।

काँसि मा प्रज़नोवनस वुछनम दिलस  
क्याह शरफ रूद लोल काँसी बावनस ?

कृत्य अरमान ऑस्य वँथिमृत्य न्यँद्रे ज़न  
क्याज़ि पानय अज़ लोगुस तिम सावनस ?

अँश्य फ्यर्यन मे जाय वँर चँशमन अंदर  
अज़ प्यवान फ्यरि फ्यरि लँगिम मंदु छावनस ।

कूत तजरुबु वॉसि कुन्दन कूत सोन  
खेलु लोकचारस तु शोखाह यावनस ।।

\* \* \*

सोपुन तु सोंच  
sópún tû sònych

त्रिलोकी नाथ दर 'कुन्दन'

इंटरनेट देवनागरी एडिशन  
म.क.रैना

अगस्त २००८